

Älönzil n-Ÿisa Älmasex wa iktäb Luqa

Äšajəš

¹ I-Täyofil wa əkney semyar:

Əttärän äddinät äjjootnen, ad-əktəbän s-älmäxna isälan wi jänen jere-näx,

² s-əmmək-wa-däx s-hanäx-tän-äsoxälän äddinät wi tän-ənhäyner s-tiṭṭawen-näsän s-tizarät, ija Mässinäx imawayän n-mäjräd-net.

³ A-wen-däx a fäl näkk-däx, ijjäš-ahi-dd ənniyät n-ad-əmmäxäx i-isälan-en-däx s-iyyan-iyyan xur-aläšäl-näsän, hundäx har ašäl-i-däx, i-ad-hak-hasän-in-äjäx akätab äsisäjrähän,

⁴ təkkəssäd äššək a-s teḡäre ta təjräwäd, tətbat.

Isälan wi ija änjälos däx-tiwit n-Exya

⁵ Äzzäman wa d-ämoos Harudəs ämänokal n-teje ta n-Älyähudəyät, ill'-e ähaləs iyyän däx-wi n-käl-tikutawen s-isəm-net Zäkärya, išxal däx-ehän n-ämudd wa mäqqärän däx-taggayt n-käl-tikutawen ta n-ihäyawän n-Abya, isəm n-hännes Elizäbät, tahäyawt n-Harun a tämoos.

⁶ Oxadän issənän-essän dat-Mässinäx, əṭṭafän s-älxaqq färədən d-alämärän n-Emäli,

⁷ mäšan wär len ara ed Elizäbät, täjjojra, täwwäḍ-tän-dd daḡ tušäre issənän-essän.

⁸ Ašäl iyyän dd-täqqäl tasəssäxlit taggayt n-käl-tikutawen ta iha Zäkärya, isl'-e əššäxəl-net dat-Mässinäx hundäx har fälla-s ođanät tisäxeren,

⁹ ämoos a-wen älxadät n-käl-tikutawen n-a-s afäl ođanät tisäxeren fäll-äwadəm, ənta a-madän-isəhhuh matälxer dāx-ehän wa šaddijän n-Emäli.

¹⁰ Ašäl-en, isihəwhəw matälxer dāx-ehän-en-dāx, a-s itäj a-wen-dāx, älžamaxät wa n-inaxbadän, itəddal Mässinäx dat-emm n-ehän n-ämudd wa s-ijjäs Zäkärya ammas-net.

¹¹ A əndärrän, änfäläl-as-dd änjälos n-Emäli fäll-axil n-tasəskärt-ta fäll-tihuh matälxer.

¹² Inhäy Zäkärya änjälos xas, iggäd ənniyät, irmäx

¹³ məšan, inn'-as änjälos: «Zäkärya! A-wa təttäräd dāx-Mässinäx, ad-äj, hänne-k Elizäbät, ad-təkrəš ara, təjəd-as isəm: Exya.

¹⁴ Ad-hak-umas əssəbab n-tedawit d-tisrawt, səddəwət dāx tiwit-net äddinät äjjootnen.

¹⁵ Ad-umas ere ilan isəm xur-Emäli d-idəm xur-Mässinäx, wär mad-isəw aman n-läxnäb äxxiimmärnen wäl' asməd wäl' iyyän, ad-t-idnəy Unfas Šaddijän n-Mässinäx härwa iha täsa n-ma-s.

¹⁶ Ənta a dd-madän-isuxəl a äjjeen dāx-käl-Işrayil Emäli-näsän, Mässinäx,

¹⁷ ilkəm-as s-ənniyät d-äşşahät wa n-ännäbi Yəli i-ad-dd-isuxəl ulhawän n-abbatän aratan-näsän, əkrəšan iməkkeddəlän tayətte ta kar-räšan äddinät lanen idəm dat-Mässinäx, isəbdəd tamətte täsidawät i-ad-təlkəm i-Emäli.»

¹⁸ Innä Zäkärya dərät-a-wen i-änjälos: «Ən-

dek a-wa s-mad-əlmədäx a-s a-wa hi-jänned tidət? Näkk, amyar wäššärän a ämoosäx, hänne-x dəx ti-wäššärät.»

¹⁹ Inn'-as änjälos: «A-wa näkk Žibril-wa s-härkuk əbdädäx dat-Mässinäx, äšmašäl-ahidd sār-k i-ad-käy-dd-səssiwəḍäx isälan-wi-däx ähuskätnen.

²⁰ Ämära, šämad wär hi-təfləsäd a-s hak-əmməjrädäx s-tizarät, ad-itwəṭṭəf emm-näk, ikrəs iləs-näk hundäx har ašäl wa d-mad-itbatän isälan-wi-däx hak-jeḡ.»

²¹ A-s itäj a-wen-däx, tamətte täqqal i-Zäkärya, tof'-et täkunt n-a-wa t-in-išlän d-a-wa t-in-itṭafän.

²² Älwäqq wa dd-izjār, ittär ad-ämmäjräd i-äddinät mäšan, indär-as, əlmädän a-s härät a has-dd-änfalälän dəx-ehän-en-däx, ad-hasän-isitufəy i-ad-tän-isəfhəm a-wa ijän.

²³ Issəmdä Zäkärya täqqän-net dəx-əššäxəl ɣas, iqqäl ehän-net.

²⁴ Təkräš hänne-s ḍarät-a-wen ənniyät ɣas, ja səmmos orän təffär iman-net dəx-ehän-net,

²⁵ janna: «Enta da a-wa hi-ija Emäli-nin, ənta a dəx-i dd-iswädän, ikkäs fäll-i täkrakidṭ ta ämoosäx jer-äddinät.»

Isälan-wi ija änjälos dəx-tiwit n-ḡisa Älmasex

²⁶ Təjjäš Elizäbät ewär-net wa s-säḍis ɣas, äšmašäl Mässinäx änjälos-net Žibril s-taxrəmt tiyyät s-itawänna Näširät hat teje ta n-Galila,

²⁷ ässok'-e tämawaḍt wärät təzzey meddөн s-isəm-net Märyäma, ittar ähaləs n-ahäya n-ämänokal Dawəd s-isəm-net Yusəf.

28 Osä-dd änjälos Märyäma, inn'-as: «Ejeḡ-am äsafu kämm-i tønnöfränät ed, tøkrašäd idəm ḡur-Emäli-näm.»

29 Issärmäḡ-tät mäjräd-wen-däḡ, ad-tattär älmäyna n-manäwen-wa-däḡ.

30 Inn'-as änjälos: «Märyäma, wär tärmeyäd, äzzäbbät-dd Mässinäḡ ännuḡmät-net fälla-m,

31 kämm da-däḡ, ad-tøkrašäd önniyät, tøkrašäd ara, tøjöd-as isəm Ḣisa.

32 Ad-ikröš isəm, iwär-t isəm Rure-s n-Mässinäḡ wa iknän aḡkul, ad-äj Emäli Mässinäḡ öttöbəl wa n-ämänokal Dawöd-i t-äshäyāwän däḡ-ifassän-net,

33 ad-immukəl härkuk fäll-ehän wa n-ihäyāwän n-Yaqub, tiḡlal tömmönuköla.»

34 Tönnä Märyäma ḡarät-a-wen i-änjälos: «Endek ömmök wa s-e-äj a-wen ed näkk, wär-özzeyäḡ meddön.»

35 Inn'-as änjälos: «Ad-fälla-m dd-izzubböt Unfas Šaddijän, täls'-im tärna n-wa iknän aḡkul, a-wen-däḡ a fäl ara wa šaddijän dd-e-iwön, ad-t-iwär isəm Rure-s n-Mässinäḡ.

36 Ara n-meddön-näm, Elizäbät, wädden ti-wäššärät mäšan, ad-tøkroš ara önta-däḡ, önta-i s-käla tämoos temöjjejrut, ha ämära ewär-net wa s-säḡis

37 ed, wär t-illa a-s wädden äddoobät-t Mässinäḡ.»

38 Tönn'-as Märyäma: «Näkk, taklit n-Emäli, itwöjjet-ahi a-wa s-tönned.» Ifäl-tät änjälos ässaḡät-wen-däḡ, iglä.

Tökkä Märyäma Elizäbät

39 Tökkä Märyäma išilan-win-däx taḡrəmt tiyyät n-käl-Yähuda hat idaḡän.

40 Täwwäd-in ehän wa n-Zäkärya, ad-tinmöjj isofan d-Elizäbät.

41 Diha-däx d-has-təja Märyäma äsafu, ad-iggäd, iḡbär-tät alyaḡ wa ihän täsa-net, idnäy-tät Unfas Šaddijän älwäqq-wen-däx.

42 Tədkäl Elizäbät emäsli-net, tənnä: «Təndəḡ-am kämm jer-tiḡeḡen, təndəḡ daḡ i-ara wa ihän täsa-näm.

43 Ənta näkk-i-däx, ma ämoosäx tis-ahi-dd anna n-Emäli-nin?

44 Ijmaḡ-t äššäk a-s diha-däx d-əslänät timəzzujen-in i-äsafu-näm, ad-iggäd ara-wa ihän täsa-nin s-tedäwit.

45 Təndəḡ-am kämm-i təfläsät a-s Emäli a ijän-däx, ilkam ḡas, ad-isətbət a-wa s-ijjäš ärkäwäl-net.»

Təmmal n-Märyäma i-Mässinäx

46 Tənnä Märyäma:

«Timələn iman-in təmḡäre n-Emäli,

47 äddiwät ulh-in fäl төssəba

n-a-wa hi-ija Mässinäx-i n-Ämaḡlas-in.

48 Ikyäd-dd däx-təmmäḡrit n-taklit-net.

ḡur-ašäl-i-däx, e d t-illäm

ere ilkamän fäll-äröri n-äkall,

ad-hi-änn: <Təndəḡ-am>

49 fäl-a-s, Wa ilän tärna, ij'-ahi a äjjeen, šaddiij isəm-net.

50 Tähanint-net tənsa fäll-əzzurəyatän

ti t-äksudnen däx-iwətyan iket-näsän.

51 Issəkna tärna n-äfuss-net,

äsmäḡräy s-äššahät-net äddinät wi iha əttəkəbru,

52 ikkäs-dd daw-käl-äſſahät tömmönuköla-näsän,
 issəfrär tilaqqiwen,

53 äsyäwän iməlluza dāḡ-a-wa äzedän,
 äſḡär ifassän n-käl-ehäre.

54 Idhäl käl-Işrayil-i n-eklan-net,
 wär hin-ittef fälla-sän tähanint-net

55 ed, ämoos a-wen ärkäwäl iḡlalän
 iijaş i-imärawän-nänäḡ wi n-ibda
 s-əmmək wa s-t-ija i-Ibrahim d-ihäyawän-net.»

56 Təzzäḡ Märyäma ḡur-Elizäbät har tässakäy
 əddəkud n-käraḡ orän təzzar, täqqäl ehän-net.

Tiwit n-Exya wa n-Enəsselmäḡ

57 Täwwäḡ-dd täqqän ta dāḡ-jarräw Elizäbät
 eḡäf-net, təkräş ara n-eyy.

58 Əslän änhärajän-net d-işäqqaqān-net ti-
 husay n-a-wa has-ija Emäli ḡas, ohärän dār-s
 tedäwit ta ja.

59 Ikräş ara əttaḡ išilan ḡas, ämeläy, jän-as
 äddinät isəm Zäkärya i-ad-umas anəmmäḡru n-
 ti-s

60 mäšan, tənn'-asän ma-s: «Äbo! Iwäret-t
 isəm Exya.»

61 Əḡḡädän-dd sār-s äddinät, ənnän-as: «Wär
 t-illa äwadəm dāḡ-ihänan-näwän iwar isəm-
 wen-däḡ.»

62 Ästafäyän i-ti-s n-alyaḡ i-ad-änn ənta isəm
 wa s-irha ad-iwär rure-s.

63 Ästafäy-asän i-ad-t-dd-əkfən a fäll-iktäb,
 iktäb-asän fälla-s: «Isəm-net: Exya.» Əqqälän-
 dd äddinät ḡas oran imawän.

64 Ämera iləs n-Zäkärya älwäqq-wen-däḡ, ad-
 itamäjrad, itiməl Mässinäḡ.

⁶⁵ Tärmäs tuksəda n-Mässināḡ äddināt-wi əzzāḡnen dāḡ-attayān-en-dāḡ d-kāl-iḡaḡān wi n-Ālyāhudəyāt, ad-timsiḡulān isālan-wi-dāḡ.

⁶⁶ Ɔttāfān äddināt iket-nāsān wi əslānen a-wa ijān dāḡ-ulhawān-nāsān, äqqimān-dd ḡas, jannen: «Ak ara-wa-dāḡ, ma mad-umas?» Ara-i, äsiwār-t Mässināḡ äfuss-net.

Ālolāy Zākārya s-tārna n-Unfas Šäddijān

⁶⁷ Zākārya-i n-ti-s n-alyaḡ, iḡkār-t Unfas Šäddijān, ālolāy, inna:

⁶⁸ «Təmmal i-Emāli-i n-Āmakraš n-Işrayil fāl-a-s, ənta, ad-dd-işšārjāšān tamətte-net, äsdārf'-et.

⁶⁹ Āsfāqqāt-anāḡ-dd isək n-əlḡəllas dāḡ-ehān n-akli-net Dawəd.

⁷⁰ A-wen äru tān-inna Mässināḡ s-imawān n-ännābitān-net wi n-iməşšeddəjān.

⁷¹ Issəlmād-anāḡ a-s ad-hanāḡ-agəz dāḡ-işənjanānāḡ, ikkəs-anāḡ dāḡ-ifassān n-imiksānān-nānāḡ iket-dāḡ-nāsān.

⁷² A-wen-dāḡ a fāl oḡān tāhanint i-abbatān-nanāḡ wi n-ibda, iktā-dd ärkāwāl-net wa n-tassaḡt šäddijān hasān-ijjāš.

⁷³ Āmoos a-wen tahuḡe ija i-abba-nānāḡ Ibrahim

⁷⁴ a-s has-innä, ad-hanāḡ-agəz dāḡ-işənjanānāḡ, ad-nəzzaḡ jere-sān māšan, wār tān-nāksud.

⁷⁵ A-wen ij'-e, i-ad-t-nāḡbəd hak ašāl dāḡ-təşədje d-iqqud dāḡ-tuksəda-net.

⁷⁶ Käyy day i n-rure-ḡ, ad-kāy-iwār isəm ännābi n-Mässināḡ wa iknān aḡkul,

käyy a-madän-izar i-Emäli i-ad-təknəd ibaran-net,

⁷⁷ səlmədäd äddinät-net s-əlxəllas

wa t-illän xur-Mässinäx i-tenäšše n-ibäkkadän-näsän

⁷⁸ fäl-a-s, Mässinäx ođän-anäx təhanint.

Däx-idəm n-ehäf n-ärräxmät-net,

ad-hanäx-dd-isəssiwəy Ämaɣlas

olähän d-täfukt dd-təjammädät išənnawän

⁷⁹ i-ad-impləwləw ännur-net

fäll-äddinät wi äqqimänen däx-tihay,

han tele ta n-tamättant,

i-ad-hanäx-išärjəš däx-tabarät ta n-älxer.»

⁸⁰ Idaggäl Exya, tiwwađ tayətə-net, izzaɣ tinari-wen hundäx

har ašäl wa t-dd-ašmašäl Mässinäx s-käl-Işrayil.

2

Tiwit n-Ÿisa Älmasex (Mätti 1:18-25)

¹ Äzzäman wa d-äsiṭäbäl Qäyşär Ojärtän e d t-illäm ämänokal, omär s-ad-tiđan tamətə fäll-äröri n-äkall.

² Täđint-ten-däx täzzarät, təja däx-äzzäman wa d-ämoos Kirənyus gəfär n-teje ta n-Surya.

³ Däx-təssəba n-a-wen-däx inn' ämänokal wa mäqqārän, a fäl hak äwadəm, iqqäl taɣrəmt-ta däx-iwa i-ad-iđan.

⁴ Ifäl-dd Yusəf taɣrəmt ta n-Näşirät häť teje ta n-Galila, ikkä taɣrəmt n-amɣar-net Dawəd ta s-itawänna Bätlehäm häť teje ta n-Älyähudəyät, ed ahäya n-Dawəd a ämoos,

⁵ i-ad-ıdan ənta d-Märyäma ta n-tämutärt-net-i s-a-s itäj a-wen-däx, la ənniyät.

⁶ Han tayrəmt-ten-däx, a-s dd-tosa täqqän ta däx-jarräw Märyäma eḡäf-net.

⁷ Təjräw eḡäf-net, təkräš teḡäfädde-net, tətäl-t däx-ikäršäyän, təssəns'-e däx-efäyd fäl-a-s, ehän wa n-imäjarän, äbas t-iha edägg.

Anfiləl wa dd-ija änjälos i-imädanän

⁸ Äkall-en, han-t imädanän ässinbärnen irəzzejän-näsän däx-isalwan illa-hin i-aḡrəm sihen.

⁹ A əndärrän, ibdäd-dd änjälos n-Mässinäx data-sän, äsmäläwläw-dd älxurmät n-Emäli edägg wa hän, əknän-däx tarəmməxt

¹⁰ mäšan, inn'-asän änjälos: «Wär tärmeḡäm, ənhəywät, äwwayäx-awän isälan n-älxer maden-umas əssəbab n-tedäwit i-tamətte iket-däx-net.

¹¹ Ašäl-i, iw'-awän Ämaḡlas däx-tayrəmt ta n-ämänokal Dawəd, ənta a-s Älmasex n-Emäli.

¹² Ənta da a-wa s-t-mad-təzzəyäm: ad-tənhəyäm ara s-iket iwa, ittal däx-ikäršäyän, insa däx-efäyd.»

¹³ Diha-däx d-issəmdä änjälos tənna n-a-wen-däx, ad-dd-äddew abrək n-änjälosän timələn Mässinäx, jannen:

¹⁴ «Təmmal i-Mässinäx däx-išənnawän, älxer ija fäll-ärori n-äkall i-äddinät-wi fäll-tənsa tärha-net.»

Tikawt n-imädanän i-Bätlehäm

¹⁵ Əqqälän änjälosän išənnawän ḡas, änmännän imädanän: «Adiš, näkket Bätlehäm

i-ad-nənhəy a-wa ijän d-a-wa hanäx-issəlmäd Emäli.»

¹⁶ Äšwänken älwäqq-wen-däx, ogäzän-in dihen Märyäma d-Yusəf d-ara wa s-iket iwa, insa däx-efäyd.

¹⁷ Ənhäyän-t imädanän xas, ässoxälän i-äddinät a-wa hasän-ätwännän fäll-ara wa əndärrän.

¹⁸ Äkunän äddinät iket-näsän wi əslänen i-a-wa ənnän imädanän

¹⁹ mäšan, Märyäma-i n-ma-s n-alyaḍ, tətṭäf isälan-win-däx iket-näsän däx-iman-net, siməktəw-tän däx-ulh-net i-ad-təlməd älmäxna-näsän.

²⁰ Əqqälän imädanän ḍarät-a-wen, ad-samyarän Mässinäx, tiimələn-t fäl tössəba n-a-wa əslän d-a-wa ənhäyän s-əmmək-wa-däx s-hasän-ätwänna.

²¹ İkräš ara əttam išilan xas, əmeläy, jän-as isəm Yisa, isəm wa s-hasän-innä ənjəlos ad-has-t-əjən härwa wär-iwa.

Amiwi n-Yisa s-ehän n-ämudd wa məqqārən

²² Däx-isälan n-a-wa tənna Ättäwrät ta n-Mosa, äddew Yusəf d-Märyäma s-ehän n-ämudd wa məqqārən ihän Yärussälam i-ad-šəşdəjən iman-näsän, äwwäyän daḡ ara i-ad-t-säxləfän tärna n-Emäli

²³ fäl-a-s, iktab däx-alämär n-Emäli a-s: «Alyad n-eyy wa n-teyäfädde, umaset eməşšeddəj n-Mässinäx.»

²⁴ Däx-isälan n-a-şəşdəj n-iman-näsän, lan s-ad-əjən takute n-sänatät tidäberən däx-ti n-əroj

mex daḡ sənātät mällolnen dāḡ-ti n-aḡrəm ed, a-wen-dāḡ a iktabān dāḡ-alāmār n-Emāli.

Tittar ti ija Šamyun wa wāššārān i-Ḡisa

²⁵ A əndārrān āhaləs iyyān da-dāḡ izzayān Yārussālam s-isəm-net Šamyun. A ija a-wa-dāḡ, ijar ātṭāma n-əlyəllas wa s-inna Māssināḡ i-Işrayil, əssinsa daḡ Māssināḡ Unfas Šāddijān fälla-s.

²⁶ Aru d-has-dd-ānfalāl Māssināḡ dāḡ-tāharjit, ijjāš-as ārkāwāl s-tārna n-Unfas Šāddijān n-a-s wār mad-āmmāt wār-inhey Ālmasex n-Emāli.

²⁷ Aşāl-en-dāḡ, imhāl-t-dd Unfas Šāddijān s-ehān n-āmudd wa māqqārān i-ad-imzəyyət d-imārāwān n-Ḡisa əlwāqq wa d-tajjān a-wa fälla-sān irha əlyadāt dāḡ-isālan wī n-ihuk-net i-Māssināḡ.

²⁸ Irmās-t-dd Šamyun dāḡ-ifassān-nāsān, ad-itiməl Māssināḡ, ijanna:

²⁹ «Emāli!

Āmāra, ārməs unfas dāḡ-akli-nāk i-ad-igəl dāḡ-əlxer ed, a-wa s-has-tənned, ijā.

³⁰ Ājjunfānāt tiṭṭawen-in dāḡ-əlyəllas-nāk

³¹ wa dd-tāsmājned i-əddunya iket-dāḡ-net.

³² Əlyəllas wa s-ənta a-s ānnur i-inəzzulam†

i-ad-hasān-dd-tənfilələd,

āmoos əlxurmāt-nāk i-kāl-Işrayil-i n-taməttenāk.»

† **2:32 2:32** – Үр-кәл-Алыәһуд, ere wārān āmoos ägg-Älyähud s-alāşāl mex ere wārān ilkem i-äddin-nāsān, iket-net, änəzzalim a āmoos. A-wen-dāḡ a fäl tiwsaten ti iyyādnen iket-nāsānät, ti n-inəzzulam. — Aşāl-i-dāḡ, änəzzalim, äkafār (ere wārān issen s-Māssināḡ).

³³ Iqqäl-dd ti-s d-ma-s ɣas tof'-en tākunt n-a-wa itawännən fäll-alyaḍ-i-däɣ.

³⁴ Ittar Šamyun darät-a-wen a däɣ-sän ijän älbäraka təzzar, innä i-Märyäma-i n-ma-s: «Alyaḍ-i, ənhəy, əsnäfrän-t Mässinäɣ i-ad-umas tebädde d-ejädäl i-käl-Işrayil, umas daɣ əssəbab n-tamɣənnant i-äddinät äjjootnen.

³⁵ Däɣ-təssəba-net, ad-dd-iffukkär a-wa ihän ulhawän n-äddinät äjjootnen. Kämm daɣ, ad-ham-umas əssəbab n-uɣşad n-iman olähän d-tidij n-tākoba.»

Tajuhe n-Hännätu ta n-tännäbit

³⁶ Äzzäman-en, төll'-ee tännäbit təknaḥ tuşäre la tawset ta n-dägg-Aşir s-isəm-net Hännätu wälät Fanwäl. Däɣ-təmmädrit-net, käla tät-idäs adubən däɣ-təja əssa iwətyan,

³⁷ äb' ähaləs-net ɣas, täqqiimä-dd, wär toles adubən, la ämära-däɣ a iwwaḍän əttamät timərwen n-awätay d-əkkoz. A ija a-wen-däɣ, käla wär fel ehän n-ämudd wa mäqqārən, ehäd d-aşäl ɣabbäd Mässinäɣ, täxdam-as, tuzam.

³⁸ Ässaɣät-wen-däɣ ad-dd-tosa ənta-däɣ, ad-tiiməl Mässinäɣ, tadj isälan n-Ÿisa i-äddinät iket-näsän wi järnen ätṭäma n-ad-dd-izəzzubbət Mässinäɣ tädarfit-net fäll-Yärussälam.

Təmmiwəda n-Ÿisa

³⁹ Əssəmdän imärawän n-Ÿisa a-wa fälla-sän ifräḍ alämär n-Emäli ɣas, əqqälän taɣrəmt-näsän Näşirät, däɣ-teje ta n-Galila.

⁴⁰ Idaggäl Ÿisa, itişuhut, itəggar-t sərho däɣ-isälan n-a-wa irha Mässinäɣ fäll-ägg-adəm, ikna daɣ fälla-s Mässinäɣ asəns n-ännuɣmət-net.

Ikrāš Ȳisa māraw iyətwan d-əssin

41 Hak awātay, əkkan imārawān n-Ȳisa Ȳārussālam i-āmudd wa n-Faška.

42 Ikrāš Ȳisa māraw iwətyan d-əssin Ȳas, əddewān dār-s ed, a-wen-dāḡ, a innā əlyadāt n-āmudd.

43 Assakāyān āmudd dihen Ȳas, əqqālān ihānan-nāsān māšan, əqqiima-hin Ȳisa dāra-sān dāḡ-Ȳārussālam. Wār t-odənān hundāḡ har hin-əjrāhān a-s wār dār-sān əddew.

44 Əjān ašāl imdan n-asikəl ija Ȳur-sān a-s əddew d-iməssukal-wi iyyāḍnen dār-sān ohārnen tabarāt, əjrāhān-in a-s wār dār-sān əddew Ȳas, əqqālān dāḡ-adāriš-nāsān, ad-has-tammāḡān Ȳur-išəqqaqān-nāsān d-imuzāyān-nāsān

45 māšan, əba-hasān-t hundāḡ har hin-əwwāḍān Ȳārussālam.

46 Šāmad okayān kāraḍ išilan ad-t-əjrāwān āniḡāyma dāḡ-ehān n-āmudd wa māqqārān d-əlḡulam n-Əttāwrāt, əsijād-asān tafāssarān əlkəttabān n-Māssināḡ, isastan-tān.

47 Äkunān əddināt iket-dāḡ-nāsān wi sallānen i-a-wa ijānna dāḡ-tayətte-net d-əlwižabān-net.

48 Əlwāqq wa d-t-ənhāyān imārawān-net dihen, əqqānān iyāfawān-nāsān, tənn'-as ma-s: «Alyad-in, ma āmoos a-wa hanāḡ-jed? A ija a-wa-dāḡ, nətammāḡ-ak nəkk d-abba-nāk ed nəḡel asujjəl a jed.»

49 Inn'-asān: «Mafāl hi-tammāḡām, ajān wār təssenām a-s leḡ s-ad-hi-əsləwān əššəḡəlān n-Abba-nin dāḡ-ehān-net?»

50 Wār t-illa a əjrahān dāḡ-a-wa hasān-innā.

51 Äddew dār-sän darāt-a-wen s-Nāširät, äqqim isajäd i-a-wa has-jannen. Təttaf anna-net härätän-winnin-däx, wār tən-ihā-i hin-tatāwa.

52 Idaggäl Yisa däx-eyäs-net, itisārhut, ijraz i-Mässinäx hakt dagg-adəm.

3

*Älxuṭbät wa ija Exya wa n-Enəsselmäx
(Mätti 3:1-12; Marqəs 1:1-8; Exya 1:19-28)*

1 Awätay wa s-märaw d-səmmos däx-təmmənukəla n-Qäyşär Tibäryus, ämoos Bunəs Bilatəs gəfär n-teje ta n-Älyähudəyät, ämoos Harudəs ämänokal n-teje ta n-Galila, äñña-s Fəlibb äminakäl fäll-Taräkunit d-Əyyadurəya, Lisanyas ənta äminakäl fäll-äkall wa n-Abila.

2 Äzzäman-en, Hənnan d-Qayäf a äminakäl-nen fäll-käl-tikutawen. İsilan-win-däx, ad-imməjräd Mässinäx i-Exya ägg Zäkärya däx-tenere.

3 İkk' Exya darāt-a-wen ikallän iket-näsän wi hänen attayän n-əjäns wa s-itawänna Yurdəni. İxaṭṭāb, ijanna i-äddinät: «Utabät, tət-wəsəlmäxäm däx-aman i-ad-təjrəwäm tenäşşe n-ibäkkadän.»

4 A-wen-däx işlän Exya, a iktabän däx-əlkəttab wa n-ännäbi Saya† älwäqq wa d-inna däx-s: «Säjdät, ija eməsli iyyän ijannen: <A-wa eməsli ässewälän däx-tenere, äknät tabarät n-Emäli, səssiğədät ibaran data-s.

† 3:4 3:4 A-wa ännäbi dd-äzzarän i-Yisa, äloläy däx-isälan-net əssayät timad n-awätay dat-tiwit-net.

⁵ Ixəſran-wi ɣəſnen, ad-ənbəlän,
iɗaxän d-ijefän, ad-aləmən,
ibaran-wi äkränbäyenen, ad-aɣədən,
tabaräten-ti ärbäɣrəbäɣnen, ad-agdəhnät,

⁶ e d t-illäm ägg-adəm,
ad-inhöy əlxəllas wa dd-əzzäbbät Mäſſinäɣ.» »

⁷ Osän-dd äddinät äjjootnen ärhanen ad-tän-
isəlmäɣ Exya dəɣ aman, inn'-asän: «Ya taſſälən-
i-däɣ! Wädden tənnäm təmsädäm! Əyya,
a tärham ad-tətwəsəlmäɣäm i-ad-təfləm daw-
äſſərəɣa n-Mäſſinäɣ wa s-iſwar fälla-wän dd-
oɗa. Ləɣätät-ahi, mi kəwän-issəlmädän s-a-
wen?»

⁸ Sətbətäm tətubt-nəwän s-imärkedän,
təyyəm fälla-wän tənna n-a-s əzzurəyät n-
Ibrahim a nəmoos ed afäl täqqäl s-isəlan n-
əzzurəyät ɣas, äyyät-ahi ad-hawän-ännäɣ a-s:
Mäſſinäɣ, äddoobät ad-isəmməskəl tihun-ti-
dəɣ hannäyäm, ixlək-dd dəɣ-snät əzzurəyät
i-Ibrahim.

⁹ Ajät ənniyät fäl-a-s emm n-tutäla äru d-insa
fäll-ikewän n-ihəſkan, e d t-illäm ahəſk wärän
itirəw aratän ih'-älfäyda, ad-hin-ättänkäd,
itwəjər-in dəɣ-efew.»

¹⁰ Əssəstänän-t äddinät wi has-əsijädnen,
ənnän-as: «Ma s-nəla s-ad-t-näj?»

¹¹ Äwwežəb-asän, inn'-asän: «Ere dəɣ-wän
ilän əssin iməlsan, äkfet iyyän i-wa wärän ila
wäl' iyyän, wa ilän a ikša, äkfet ere wa t-wärän
ila.»

¹² Osän-t-dd ɗarät-a-wen inarmasän n-tiwse i-
ad-tän-isəlmäɣ dəɣ-aman, ənnän-as: «Älxəlim,
ma s-nəla s-ad-t-näj?»

13 Inn'-asän: «Wär tötteräm däḡ-äddinät ar a-wa s-omär əlxəkum.»

14 Əssöstänän-t əssärdusa, ənnän-as: «Näkkäned-i-š, ma hanäḡ-iwarän?» Inn'-asän: «Wär toheḡäm əwadəm, wär tössədlämäm əwadəm s-bahu, äjät ärramät däḡ-timzal-näwän.»

15 Äddinät iket-däḡ-näsän wi əslänen i-a-wa ijänna Exya, järän ättäma, ad-tinmösəstinän kunta wädden ənta-i-däḡ a-s Älmasex.

16 Äwwežäb-asän, inn'-asän: «Näkk, aman a däḡ-käwän-salmaḡäḡ mäšan, ilkam-ahi ähaləs hi-ijan mijraw wa-däḡ s-wär-änhäjjäḡ wälä-däḡ d-ad-ədəsäḡ issal n-tifädelen-net, ənta ad-käwän-isəlmäḡ däḡ-Unfas Šäddijän d-efew i-ad-hin-istəb a-wa läbasän.

17 İttaf tesäyt-net ta s-hin-e-izzuzzär allon-net, isədəw allon wa oläḡän, äj'-e däḡ-əjänd-net, irməs ahošär wa wärän infa härät, äj'-e däḡ-efew ähijäljälän härkuk.»

18 İkk' Exya dədi, itajj isälan n-älxer n-Älənžil-wi-däḡ, isamätar daḡ äddinät s-älmäḡnatän äjjootnen.

19 Äzzäman-en-däḡ, ad-äsmähäd Exya fäll-ämänokal Harudəs Intibbas däḡ-isälan n-Härudəyyas ta n-hänne-s n-änḡa-s Fəlibb däḡ-s ohäḡ, illäḡät-as daḡ ibäkkadän äjjootnen ämešäl säl wen-däḡ.

20 Ässewäd Harudəs fäll-a-wen-däḡ iket-net iji n-Exya däḡ-takärmüt.

*Atwəsəlmaḡ n-Ḣisa däḡ-aman
(Mätti 3:13-17; Marqəs 1:9-11)*

²¹ A-wen-däx iket-net, ija darät a-s ässilmäx Exya äddinät äjjootnen d-ÿisa iman-net däx-aman. Älwäqq wa d-iritwəsəlmey ÿisa, itəddal Mässinäx dihen-däx a-s dd-ämerän išənnawän,

²² äzzubbät-dd fälla-s Unfas Šaddijän däx-ännu x n-tedäbert mällät, ijmäç-dd eməsli išənnawän, innän:
«Käyy-i-däx a-s Rure-x wa əkneex tərha, käyy a däx-əsriwän iman-in.»

*Ättarex n-ÿisa Älmasesx
(Mätti 1:1-17)*

²³ Ila ÿisa əddəkud n-kəraqät timərwen n-awätay a-s issənta əmašal-net, ija xur-äddinät iket-näsän wi t-hannäynen a-s rure-s n-Yusəf wa n-əgg Xali.

²⁴ Xali ənta, əgg Mätata, Mätata əgg Lewi, Lewi əgg Mälki, Mälki əgg Yännay, Yännay əgg Yusəf,

²⁵ Yusəf əgg Mətašiyas, Mətašiyas əgg Yämmosa,

Yämmosa əgg Nəxwama, Nəxwama əgg Xəšli, Xəšli əgg Naggay,

²⁶ Naggay əgg Mätti, Mätti əgg Mətašiyas, Mətašiyas əgg Šəmxi, Šəmxi əgg Yosəx, Yosəx əgg Yoda,

²⁷ Yoda əgg Exya, Exya əgg ÿisa, ÿisa əgg Žərrubabil, Žərrubabil əgg Äššəlat, Äššəlat əgg Nəyri,

²⁸ Nəyri əgg Mälki, Mälki əgg Äddi, Äddi əgg Kosəm, Kosəm əgg Älmädäm, Älmädäm əgg Err,

- 29 Err ägg Үisa, Үisa ägg Үөлыазәр,
 Үөлыазәр ägg Yurim, Yurim ägg Mätata,
 Mätata ägg Lewi,
- 30 Lewi ägg Simyon, Simyon ägg Yähuda,
 Yähuda ägg Yusəf, Yusəf ägg Yonäm,
 Yonäm ägg Ilyakim,
- 31 Ilyakim ägg Mälaya, Mälaya ägg Mäyna,
 Mäyna ägg Mätata, Mätata ägg Natan,
 Natan ägg Dawəd,
- 32 Dawəd ägg Isaya, Isaya ägg Äxbäydi,
 Äxbäydi ägg Boḡaz, Boḡaz ägg Sala,
 Sala ägg Nasun,
- 33 Nasun ägg Aminädab, Aminädab ägg Ädmin,
 Ädmin ägg Arni, Arni ägg Xäšrun,
 Xäšrun ägg Faris, Faris ägg Yähuda,
- 34 Yähuda ägg Yaḡub, Yaḡub ägg Isxaqq,
 Isxaqq ägg Ibrahim, Ibrahim ägg Taräxa,
 Taräxa ägg Naxur,
- 35 Naxur ägg Sarux, Sarux ägg Raggäw,
 Raggäw ägg Faläx, Faläx ägg Үäbbir,
 Үäbbir ägg Saläx,
- 36 Saläx ägg Käynäm, Käynäm ägg Arfäḡšad,
 Arfäḡšad ägg Säm, Säm ägg Nox,
 Nox ägg Lamäx,
- 37 Lamäx ägg Mätussaləm, Mätussaləm ägg
 Inuk,
 Inuk ägg Yarät, Yarät ägg Mäxlälyil,
 Mäxlälyil ägg Käynäm,
- 38 Käynäm ägg Anuš, Anuš ägg Šetti,
 Šetti ägg Adəm, Adəm ənta, Mässinäḡ a t-dd-
 ixläkän.

4

Ažurrəb wa ija Iblis i-Ŷisa
(Mätti 4:1-11; Marqəs 1:12-13)

¹ A-s dd-ifäl Ŷisa ejänš wa n-Ŷurdəni, idkar Unfas Šəddijän s-əşşahät. Unfas-en-däx a t-oşädän s-tenere.

² Ijä dihen əkkožät timərwen n-aşäl itizərrub-t Iblis. Täqqän-ten-däx, ij'-et iket-net wär t-illa a ikkan emm-net təzzar, əlluz.

³ Os'-e hi-dd Iblis, inn'-as:

«Šəmad käyy a-s Rure-s n-Məssinəx, amär i-təhünt-ta-däx ad-tumas tajəlla.»

⁴ Äwwežəb-as Ŷisa, inn'-as:

«Iktab dəx-məjrəd n-Məssinəx:
 <Təmədre n-əgg-adəm, wär təmda fäll-tetäte
 xas.> »

⁵ Iwwäy-t Iblis s-edəgg iknan adkul, issəkn'-e dəx-eşäfəlli n-tişt, e d t-illəm əddəwəl iwarän ərori n-əkall,

⁶ inn'-as əməra:

«Ad-käy-əkfəx tərna d-təmyər fäll-əddəwəlän-wi-dəx hannäyəd iket-nəsän fäl-a-s i-nin, hakkəx-tän dəx i-ere wa s-ərheç,

⁷ a-wen-dəx a fäl, hakkəx-ak-tän iket-nəsän afäl hi-təxbädäd.»

⁸ Äwwežəb-as, inn'-as: «Iktab dəx-məjrəd n-Məssinəx a-s:

<Eməli-nək Məssinəx a dat-e-tärkäxəd,
 ənta xas a fälla-k ilan əlyibadät.> »

⁹ Iwwäy-t Iblis dərät-a-wen s-Yərussəlam, issəbdəd-t fäll-afälla n-ehän n-əmudd wa məqqārən təzzar, inn'-as:

«Šămad kăyy a-s Rure-s n-Măssinăġ, äyy iman-năk s-ăkall ed, iktab dăġ-edăgg iyyăn dăġ-măjrăd n-Măssinăġ a-s:

¹⁰ <Ad-dd-išəmmišəl änjălosăn-net

i-ad-kăy-agəzən dăġ-ăššar,

¹¹ əkbəlăn-kăy dăġ-ifassăn-năsăn

i-ad-wăr hak-răssəl wăla-dăġ tăhunt tiyyăt ħas.>

»

¹² Inn'-as Ÿisa: «Iktab dăġ-măjrăd n-Măssinăġ a-s:

<Wăr-e tarməd Emăli-năk Măssinăġ.> »

¹³ Äžžurrăbăt-t Iblis s-a-wa s-ăddobăt iket-net, indăr-as ħas, ujəj-t, ad-isimăqqul i-ad-săr-s ijrəw taffawt tiyyăt dăġ.

*Sănto n-ălxidmăt n-Ÿisa dăġ-teje ta n-Galila
(Mătti 4:12-17; Marqəs 1:14-15)*

¹⁴ Iqqăl Ÿisa đarăt-a-wen teje ta n-Galila, toġad-t tărna n-Unfas Šăddijăn dăġ-a-wa ităjj, intăj isəm-net dăġ-teje-ten-dăġ iket-net.

¹⁵ Isayra äddinăt dăġ-ihănan n-ăddin wi n-kăl-Ălyăhud, ässiimġărăn-t äddinăt iket-năsăn.

*Tăġart n-ulh n-kăl-Năširăt
(Mătti 13:53-58; Marqəs 6:1-6)*

¹⁶ Ifăl Ÿisa dihen, ikkă taġrəmt ta n-Năširăt-i-dăġ idwăl, ij'-e ašăl wa n-əssəbət-i n-tăsonfat, ikk' ehăn n-ăddin wa n-kăl-Ălyăhud ed, a-wen-dăġ a-s izzay ad-t-ăj.

17 Tøddalän äddinät Mässinäx dihen-däx a-s ibdäd Yisa jere-sän, økfän-t ølkøttab wa n-ännäbi Saya† i-ad-hasän-däx-s iḡär. Ikkäs-in i-ølkøttab aḡh wa ija tøzzar, or'-e däx-edägg wa däx-iktäb:

18 «Insa fäll-i Unfas n-Emäli, äsnäfränän-ahi i-ad-äjäx isälan n-Älønžil i-tiläqqiwen, äšmašäl-ahi-dd i-ad-äjäx isälan i-wi hänen tikärmuten, øjrøwän iman-näsän, zuzøyäx imøddorḡal, søddärfey äddinät-wi ätiwäkräšnen,

19 zøzzubbey-dd awätay n-ännuḡmät n-Emäli fäll-ärøri n-äkall.»

20 Issømdä Yisa teḡäre ḡas, iḡfäl ølkøttab, ässoḡäl-t i-änaxdim-wa ijän ønniyät i-ehän wa n-äddin. Iqqäl-dd, äqqima ḡas, äsbälaläḡän däx-s äddinät-wi hänen ehän n-äddin-en-däx iket-däx-näsän.

21 Iḡkäl mäjräd, inn'-asän: «Mäjräd wa s-tøsläm ašäl-i-däx, itbät.»

22 Èqqälän-dd ḡas oran imawän, tof'-en täkunt n-tihusay n-imøjridän wi dd-zajjärnen emm-net, ad-jannen: «Ak ajän a-wa wädden ägg-Yusøf wa-däx nøzzäy?»

23 Inn'-asän Yisa: «Èssanäx a-s ad-hi-dd-søktøwäm ozz wa innän: <Läxtur, käyy-ak søssøfär i-iman-näkk tøzzar>, tønnøm-ahi: <Tømmaž jed däx-äkall-näk a-wa s-nøsla jed-t däx-aḡrøm wa n-Qäfärnaxum.> »

† 4:17 4:17 A-wa ännäbi dd-äzzarän i-Yisa, äloläy däx-isälan-net øssayät timaḡ n-awätay dat-tiwit-net.

24 Inn'-asän daḡ: «Tidət-däḡ a-s wär t-illa ännäbi ätiwäqbalän däḡ-äkall-net.

25 Äsidätteḡ-awän a-s käla t-öllänät tinuḡäfen äjjootnen däḡ-Işrayil däḡ-äzzäman wa n-ännäbi Үeli. Äzzäman-en, oḡäy mäna i-äddinät, jän käraḡ iwətyan d-säḡis orän wär t-təlla teddamt n-ajənna watät äkall-en-däḡ, ija laḡ s-käla wär-ätwänhäy a dār-oläh fäll-ārori n-äkall.

26 Ija a-wen iket-net mäšan, wär dd-äşmaşäl Mässinäḡ ännäbi Үeli ar s-tänuḡäft tiyyät ḡas däḡ-snät təzḡayät taḡrəmt ta n-Saräfta däḡ-teje ta n-Säyda.

27 Darät Үeli daḡ, osä-dd äzzäman wa n-ännäbi Ilyas. Äzzäman-en, əllan-t äddinät äjjootnen däḡ-äkall wa n-Işrayil ijraw jəri mäšan, wär tän-iha-i s-dd-äşimaşäl Mässinäḡ Ilyas a säl ähaləs iyyän n-amäjar il' äkall wa n-Surya s-isəm-net Näḡma i-ad-t-işəşdəj.»

28 Eslän äddinät i-härätän-win-däḡ hasän-innä däḡ-ehän n-äddin ḡas, käfän a-wa-däḡ hasän-ija aḡkär-net,

29 ämḡäyḡäyän-t iket-näsän, əzzəwen-t hundäḡ har afälla n-aḡaḡ wa fäll-idäy aḡrəm i-ad-t-in-səttərəkken, ämmät

30 mäšan, ikka Үisa jere-sän, iglä.

*Äzozäy Үisa ähaləs n-amälşon
(Marḡəs 1:21-28)*

31 Ätrarä-dd Үisa darät-a-wen, ikka taḡrəmt ta n-Qäfärnaxum hät teje ta n-Galila ad-isayra dihen äddinät hak aşäl n-əssəbət-i n-täsonfat;

³² Ɔqqälän-dd äddinät ɣas oran imawän fäll-
 Ɔjjäruzät-i-däɣ hasän-ija a-wa isäɣra ed isaxr'-
 en s-älxikmät äšsohen.

³³ Ehän n-äddin-en, ih'-e ähaləs ih' alšin,
 inhäy Ƴisa ɣas, ad-isaxärat s-afälla, ijanna

³⁴ «Ya Ƴisa wa n-Näširät, ma däɣ-näɣ tärhed?
 Ajän ahälak-nänäɣ a-s dd-tosed? Ɔssanäɣ ere
 wa tämoosäd, käyy-i-däɣ a-s: Wa Šäddijän dd-
 äšmašäl Mässinäɣ.»

³⁵ Äsmähäd däɣ-s Ƴisa, inn'-as «Ɔttəf emm-
 näk, təzjärad ähaləs-i-däɣ!» Ijjädlät alšin ähaləs
 jer-äddinät təzzar, izjār-t, wär t-illa a has-iɣšad.

³⁶ Ɔqqälän-dd äddinät ɣas oran imawän,
 tinmännin: «Ma ämoos mäjräd wa? Wa Ɔnta
 wäl' alšinän e-d fälla-sän äsmähäd s-tärna-net,
 ad-əzjäran äddinät.»

³⁷ Intäj isəm n-Ƴisa ɗarät-a-wen-däɣ, wär t-
 illa edägg däɣ-teje-ten-däɣ s-wädden timsiɣulän
 däɣ-s isälan-net.

*Äzozäy Ƴisa taɗäggalt n-Bətrus d-imarhinän
 äjjootnen*

(Mätti 8:14-17; Marqəs 1:29-39)

³⁸ Izjār Ƴisa ehän wa n-äddin ɣas, ikka ɣur-
 Simyon. Ämzäyyät-in d-a-s tärmas tenäde
 täšsoohet taɗäggalt n-Simonyon, Ɔttärän däɣ-s
 äddinät ad-tät-izuzəy.

³⁹ Ibdäd-dd Ƴisa jənnəj-s, äsmähäd fäll-
 tenäde, tärza fälla-s. Tənkär-dd älwäqq-wen-
 däɣ, ad-tän-simjurut.

⁴⁰ Toɗa täfukt ɣas, ämewäyän-dd sār-s
 imarhinän s-hak iyyän d-turhənnə-net i-ad-tän-
 izuzəy, äswär hak iyyän ifassän-net, äzozäy-tän.

⁴¹ Zajjārān alšinān äddināt äjootnen, saḡāren, jannen: «Käyy a-s Rure-s n-Mässināḡ» māšan, isamāhaḍ fälla-sān, wār tān-itöyy ämmijrādān ed, əssanān a-s ənta a-s Älmasex.

⁴² Äffāw ḡas, ikka ḡisa tenere n-iman-net māšan tömmāḡ-as tamətte här t-təjrāw, ad-tattārān äddināt əmmək s-t-əṭṭāfān edes-hasān i-ad-wār-ilkem ad-tān-ifal;

⁴³ inhāy tayətte-nāsān ḡas, inn'-asān: «Iwar-ahi ad-äxṭəbāḡ isālan n-älxer n-Təmmənəya n-Mässināḡ i-iḡārman-wi iyyādnen əntāneḍ-dāḡ ed a-wen-dāḡ a-s dd-ämešälāḡ.»

⁴⁴ Ad-ixatṭāb ḍarāt-a-wen dāḡ-ihānan n-äddin wi n-kāl-Älyāhud n-teje ta n-Älyāhudəyāt.

5

Inəṭṭulab n-ḡisa wi äzzarnen (Mätti 4:18-22; Marqəs 1:16-20)

¹ Ašāl iyyān d-ibdad ḡisa dāḡ-asālim n-əjäns wa n-Žännāsarāt, tāḡläyḡälāy-t-dd tamətte tājjeet tārhat ad-səjəd i-mäjrād n-Mässināḡ wa itājj.

² Inhāy sānatāt turfen n-aman ojaynen s-äqqiimān mössaw-snāt dāḡ-asālim n-aman, saradān titarren-nāsān.

³ Ijjāš dāḡ-snāt ta n-Simyön, ittār dāḡ-s ad-has-tāt-in-imhəl hundāḡ har təfəl asālim n-aman, äqqima dāḡ-s, ad-isaxra tamətte.

⁴ Issəmdä mäjrād ḡas, inna i-Simyön: «Səḡləw turāft-nāk hundāḡ har ammas n-aman, təjrəd käyy d-imidiwān-nak titarren-nāwān.»

⁵ Inn'-as Simyon: «Äłxalim, ehäđ imdan a nøja nøşxal wär t-illa a nārmas māšan, fäl tønna-nāk, ad-nøjär titarren-nänäx.»

⁶ Jän a-wa hasän-innä, ärmäsän-dd ašäl-en-däx imānan-i-däx äjjootnen har dd-äqqälñät titarren-näsän, tössarnät.

⁷ Ad-talläfän i-imidiwän-näsän wi hänen turäft-ta iyyädät i-ad-dd-ašölön, ilalän-asän. Osän-dd, eđnäyän turfen-näsän tissönen hundäx har-däx tilkəyyitñät.

⁸ Inhäy Simyon Bətrus a-wa ijän xas, irkäx dat-Ŷisa, inn'-as: «Emäli, ajəj-ahi fäl-a-s näkk anəsbäkkəđ a ämoosäx.»

⁹ Tärmäs tarəmməxt-i-däx mäqqärät Simyon d-imidiwän-net fäl tössəba n-əjut n-imānan-i-däx ärmäsän.

¹⁰ Tākunt-ta tärmäsät Simyon, ənta dəx a tärmäsät Yaquub d-Exya wi n-dägg-Zäbdi-i dār-ohār älxidmät. Innä Ŷisa i-Simyon dərät-a-wen: «Wär tärməxäd, xur-ašäl-i-däx, ad-tumasäd äwadəm sār-i dd-isadawän äddinät i-ad-tän-äxləsäx.»

¹¹ Äsoxälän-dd dərät-a-wen turfen-näsän asälim n-aman, oyyän a-wa tän-išlän iket-net, əlkämän-as.

*Äzozäy Ŷisa ähaləs ijraw jəri
(Mätti 8:1-4; Marqəs 1:40-45)*

¹² Iha Ŷisa iyyän dəx-iğərman a-s t-inhäy ähaləs ilsa jəri, ikk'-e-hi-dd, irkäx data-s, ad-t-ilaqqäd, ijann'-as: «Äłxalim, afäl tärhed a-wen-däx, täddoobed ad-hi-šəşdəjäd.»

13 Izzäl Yisa äfuss-net, idäs-t, inn'-as: «Ärheey a-wen, išdaj», ifäl-t jəri älwäqq-wen-däy.

14 Äsmätär-t Yisa, inn'-as: «Wär jed isälan i-äwadəm wäl' iyyän n-a-s näkk a käy-äzozäyän; änn-ak, ägləw, səkən iman-näk i-u-tikutawen, təjəd takute ta n-təšədje s-älmäyña wa s-tän-innä alämär wa n-ännäbi Mosa i-ad-hasän-umas a-wen tajuhe n-a-s təzzäyäd.»

15 Hak ašäl tiwwaḍ-dd terše n-isəm i-Yisa, tidaw-dd sār-s tamətte täjjeet i-ad-səjəd i-isälan n-Älənžil, təzzəy däy-turhənnawen-net.

16 Mäšan Yisa ənta, ässoof edägg ištärän däy-ijraw s-tamädilt n-Mässinäy.

*Äzozäy Yisa ähaləs ibdanän
(Mätti 9:1-8; Marqəs 2:1-12)*

17 Ijraw Yisa xur-Emäli tärna täššoohet ässitbät azuzi wa itäj i-äddinät. Ašäl iyyän d-isayra, äqqimän edes-has käl-faris d-älɣulam n-Ättäwrät dd-falnen tidbi n-Galila d-Älyähudəyät d-Yärussälam.

18 A əndärrän meddən iyyäd-da-däy ämisawäyän anäbdon insan fäll-asəftäy. Ettärän a-wa däy-he-əjən ərəsän tamətte, sənsən-t dat-Yisa

19 mäšan, äba-hasän älmäyña n-a-wen fäl əjut-i-däy ja tamətte. Äyläyän, äwwänän afälla n-ehän, sārän däy-assətax n-ehän edägg s-äddooben ad-sār-s dd-šujəšan anäbdon, ästärärän-t-dd ḍarät-a-wen har t-dd-əssənsän däy-amməs n-tamətte, dat-Yisa.

20 Inhäy Yisa immun-näsän ɣas, innä: «Ähaləs, ätwänšän-ak ibäkkadän-näk.»

21 Eslän älyulam n-Ättäwrät d-käl-faris i-a-wen ɣas, ad-jannen däɣ-iman-näsän: «Ma ämoos wa äwadəm isikuforän s-əmmək-wa-däɣ? Mi äddoben tenäšše n-ibäkkadän säl Mässinäɣ?»

22 Ilmäd Yisa ɣur-iman-net a-wa ämiɣännänän ulhawän-näsän, inn'-asän: «Ma tämmizäɣäm däɣ-ulhawän-näwän?»

23 Ma ojärän täräɣse jer-ad-tənnəd i-äwadəm: «Ätwänšän-ak ibäkkadän-näk» d-ad-has-tənnəd: «Ebdəd, ärjəš.»

24 Ašäl-i, ässiilmädäɣ-käwän a-s Ägg-ägg-adəm, ijraw fäll-ärori n-äkall turhajät n-tenäšše n-ibäkkadän.» Inna darät-a-wen i-anäbdon: «Enney-ak, əbdəd, ədkəl asəftäɣ-näk, əqqəl ehän-näk.»

25 Ibdäd anäbdon ässaɣät-wen-däɣ dat-äddinät iket-näsän, idkäl asəftäɣ-net, iqqäl ehän-net itiməl Mässinäɣ.

26 Äqqiimän-dd äddinät ɣas tof'-en täkunt n-a-wa ijän, tiimlən Mässinäɣ. Təj'-asän tarəmmeyt arämas wa-däɣ fäl jannen: «Ašäl-i, iman-net, nönhäy härätän äqqannen eyäf.»

*Iyrä-dd Yisa Mätti s-iman-net
(Mätti 9:9-13; Marqəs 2:13-17)*

27 Ifäl Yisa edägg-en ɣas, inhäy ähaləs irammäsän tiwse s-isəm-net Lewi, äqqiima däɣ-edägg n-älxidmät-net, inn'-as: «Elkəm-ahi.»

28 Ibdäd Lewi, ibdä d-a-wa t-išlän iket-net, ilkäm-as.

29 Āsmājarāt Lewi Ƴisa ɗarāt-a-wen s-ehān-net. Itaxāyma Ƴisa dāḡ-edāgg wa n-imənsiwān a-s erk āddināt han inarmasān n-tiwse ājjootnen da-dāḡ, osān-dd, ānyāymān ɗār-s ənta d-inəṭṭulab-net.

30 Ēnhāyān kāl-faris d-ālyulam n-Āṭṭāwrāt a-wen ḡas, āmjānjānān jer-iman-nāsān ad-jannen i-inəṭṭulab-net: «Mafāl tattām, sassām, tihrəm ikassān d-inarmasān n-tiwse d-erk āddināt?»

31 Āwwežāb-asān, inn'-asān: «Āddināt āssoxātnen, wār-āmḡatārān s-lāxtur, imarhinān a sār-s āmiḡatārnen;

32 nākk, wār dd-āmešälāḡ s-āddināt-wi ordānen iman-nāsān iqqud, ināsbākkadān a-s dd-āmešälāḡ i-ad-utabān.»

Isālan n-āzum

(Mātti 9:14-17; Marqəs 2:18-22)

33 Ēnnān-as ɗarāt-a-wen: «Inəṭṭulab wi n-Exya hakd-dāḡ kāl-faris, hārkuk tuḡamān, tumadān māšan, wi-nāk əntāneɗ, tattān, sassān.»

34 Issāḡlāy-tān tangalt dāḡ-hasān-inna: «Kāl-tuksest, wār tān-ilzem āzum a ikka āmaḡlay ill'-e ḡur-sān

35 māšan, ilkam ad-dd-ass āzzāman-wa tān-mad-ifəl āmaḡlay, āzzāman-en, ad-uḡamān.»

36 Ij'-asān Ƴisa tangalt tiyyāt dāḡ-hasān-innā: «Wār t-illa ere dd-isaxārrawen tikəst dāḡ-erāswāy āynayān i-ad-sār-s isəmməkukəs i wāššārān ed, afāl ija a-wen, ad-dd-isāqqərriwət erāswāy wa āynayān bānna, ɗarāt-a-wen daḡ, tabdoḡt-ta tāynayāt, wār mad-talāh d-ta wāššārāt ini.

37 Wār t-illa daḡ ere itajjān aman n-lāḡnāb āynaynen āxxiimmārnen dāḡ-ijdad, ere ijan a-wen har kāfān aman ənnin āynaynen dāḡ-ijdad, ad-has-səbbuggen ijdad-net, ifut ɗarāt-a-wen dāḡ-aman hakt-dāḡ dāḡ-ijdad.

38 Aman n-lāḡnāb āynaynen āxxiimmārnen, iddidān āynaynen a dāḡ-tān-itajj āwadəm.

39 Āwadəm daḡ wa iswān aman n-lāḡnāb s-āru d-āxximmārān, ābas āsidārhan tesāse n-wi āynaynen ed ad-ānn: <Wi s-āru d-əxxemārān a āzednen.> »

6

Isālan n-əssəbət, ašāl wa n-tāsonfat (Mātti 12:1-8; Marqəs 2:23-28)

1 Ašāl iyyān n-əssəbət-i n-ašāl wa n-tāsonfat, ālliil Ḡisa isəkraš n-ālkāma, əlkamān-as inəttulab-net, nakkādān tiḡāḡānen n-ālkāma, tifəffərun-tānāt jer-ifassān-nāsān, taffāžān tiblalen-ti tānāt-dd-zajjārnen.

2 Əggādān-dd hārāt dāḡ-kāl-faris tān-hannāyenen, ənnān-asān: «Mafāl tajjām a wārān itətwəjj dāḡ-ašāl wa n-əssəbət-i n-tāsonfat?»

3 Āwwežāb-asān Ḡisa, inn'-asān: «Adiš kāwāneɗ, wār tāḡrem dāḡ-əlkəttab a-wa ija Dawəd ašāl wa d-ālluz ənta d-əjhān-net?»

4 Wādden ātwānnā, ijjāš ehān n-Māssināḡ, idkāl dāḡ-tijəlwen ti n-tikutawen s-wār t-illa ere s-xālal tetāte-nāsnāt sāl kāl-tikutawen māšan, ənta, ikš'-enāt, ikfā dāḡ-snāt daḡ imidiwān-net wi dār-āddew.»

⁵ Inn'-asän Ȳisa ɗarät-a-wen: «Ägg-ägg-adəm a ännihäðän dāḡ-a-wa s-ila ägg-adəm d-a-wa s-wār ila s-ad-t-äj dāḡ-ašāl wa n-əssəbət-i n-tāsonfat.»

*Äzozäy Ȳisa ähaləs s-äqqur äfuss-net dāḡ-ašāl wa n-əssəbət-i n-tāsonfat
(Mätti 12:9-14; Marqəs 3:1-6)*

⁶ Iqqäl-dd əssəbət-i n-ašāl wa n-tāsonfat ḡas, ijjäš Ȳisa ehän n-äddin wa n-käl-Älyähud ad-dāḡ-s isayra. Ehän-en, ih'-e ähaləs s-äqqur äfuss-net wa n-aḡil.

⁷ Jan-as älyulam n-Ättäwrät d-käl-faris ənniyät, tassänän ihäl ad-t-izuzəy dāḡ-ašāl wa n-əssəbət-i n-tāsonfat meḡ i-ad-t-əḡdləmän.

⁸ Ilmäd Ȳisa ḡur-iman-net a-wa dāḡ-zinəzjumän, innä i-ähaləs wa s-äqqur äfuss-net: «Eyyäw, əbdəd dāḡ-amməs n-älžəməḡät.» Inkär-dd ähaləs, ibdəd diha s-has-innä.

⁹ Inn'-asän Ȳisa ɗarät-a-wen: «Ässiistänäḡ-käwän: Ak a xälälän dāḡ-ašāl wa n-əssəbət-i n-tāsonfat iji n-emärked meḡ iji n-a läbasän, igguḡ n-iman meḡ iji n-iman?»

¹⁰ Issäḡläy-tän-dd Ȳisa asəwaɗ-net iket-dāḡ-näsän təzzar, innä i-ähaləs: «Ezzəl äfuss-näk.» Ija a-wa has-innä, izzäy äfuss-net älwäqq-wen-dāḡ.

¹¹ Ija a-wen ḡas, wäsän käl-äddin, änmänhäyän jer-iman-näsän dāḡ-isälan n-a-wa he-əjən i-Ȳisa.

*Inəmmušal wi n-māraw d-əssin
(Mätti 10:1-4; Marqəs 3:13-19)*

12 Išilan-win-däx ad-iwwän Yisa taḍaxt, ikkäs dihen ehäḍ imdan, itəddal Mässinäx.

13 Äffäw xas, iyrä-dd inəṭṭulab-net, äsnäfrän däx-sän märaw d-əssin, äswär-tän isəm inəmmušal.

14 Ēntāneḍ da inəṭṭulab-wi äsnäfrän: Simyon wa s-ija isəm Bəṭrus d-əñña-s Idris; Yaqub d-Exya, Fəlibb d-Bärtälamma,

15 Mätti d-Tomi; Yaqub wa n-ägg Älfa d-Simyon wa s-itawänna äššažex,

16 Hudd ägg Yaqub d-Yähudəs wa n-Isxaryut-i ämoosän ämaḡdar.

*Äzozäy Yisa äddinät äjjootnen
(Mätti 4:23-25)*

17 Äzzubbät-dd Yisa taḍaxt ḍarät-a-wen ənta d-inəṭṭulab-net, ätrarän-dd fäll-əxärxär däx-təbdaḍ tamətte täjjeet d-äddinät äjjootnen dd-falnen Älyähudəyät d-Yärussälam d-iyärman wi n-Tir d-Säyda hänen asälim n-ejäns.

18 Äddinät-en-däx, osän-dd iket-däx-näsän i-ad-səjdən i-a-wa isaḡra, əzzəyän däx-turhənnawen-näsän, əjrəwän däx-sän wi hän alšinän iman-näsän.

19 Tattär taxləkt-ten-däx iket-net ad-t-təḍəs ed zaijār-t-dd tärna tän-zizuyät iket-däx-näsän.

*Tisundəḍ
(Mätti 5:1-12)*

20 Iswäḍ Yisa däx-inəṭṭulab-net, innä:
«Təndəḍ-awän käwāneḍ-i
äzoznen iman-näwän dat-Mässinäx ed,
Təmmənəya n-Mässinäx, ti-näwän.

21 Təndəḍ-awän käwāneḍ-i inäqq laz

ašäl-i-däx ed, ad-täyyäwänäm;
 tøndəḍ-awän käwäneḍ-i hallänen
 ašäl-i-däx ed, ad-täddäwem.

²² Tøndəḍ-awän afäl där-wän okäḍän dägg-
 adəm,
 afäl käwän-əkkäsän jer-iman-näsän;
 afäl käwän-gaggärän;
 afäl ətärän uḡšad n-ismawän-näwän
 däḡ-äddimmät n-Ägg-ägg-adəm.

²³ Däwätät, taləwəm däḡ-ašäl-wen-däḡ fäl-
 a-s ad-ijat marušät-näwän däḡ-älžännät; erk
 älخال-wen-däḡ hawän-han ašäl-i-däḡ, a əjjäšan
 abbatän-näsän i-ännäbitän.»

Isəmmäqq

²⁴ «Iməskay käwäneḍ-i n-imärrəzäḡän ed,
 älxer-näwän, ih' ifassän-näwän.

²⁵ Iməskay käwäneḍ-i n-imäyyäwänän n-ašäl-i-
 däḡ ed,
 ad-tulazäm.

Iməskay käwäneḍ-i dazžänen ašäl-i-däḡ ed,
 ad-təṭṭəfäm iba, təlhəm.

²⁶ Iməskay käwäneḍ-i timələn äddinät ed, älخال-
 wen-däḡ a
 əjjäšan abbatän-näsän i-ännäbitän wi n-bahu n-
 ibda.»

Tārha n-iməksänän-nänäḡ *(Mätti 5:38-48; 7:12)*

²⁷ «Käwäneḍ-i hi-äsijädnen, ənneḡ-awän:
 Ärhät išənja-näwän, äjät a olayän i-äddinät-wi
 där-wän okäḍnen,

28 äjät älhimmät i-wi hawän-ärhanen a läbasän, ädölät Mässinäx i-wi fälla-wän jannänen bahu.

29 Afäl hak-istäx äwadəm fäll-täjomäst-näk tiyyät, sögdəl-as daḡ ta iyyädät; afäl irmäs äwadəm tanäkkäbbat-näk, äkf'-e daḡ anäkkäbba-näk.

30 Ere käy-idälän-däx, äkf'-e; wär tötteräd däx-äwadəm ad-hak-isuḡəl a-wa däx-k irmäs.

31 A-wa s-tärhäm, ad-hawän-t tajjän äddinät, äjät-asän-t käwäneḡ-däx.

32 Afäl wär tärhem ar imärhan-näwän, əndek marušät-näwän? Wädden, inäsbäkkäḡän-däx, ärhan äddinät wi tän-ärhanen.

33 Afäl wär təjjəm a olayän ar i-wi hawän-t-tajjänen, əndek irhuj-näwän? Wädden, wäl' inäsbäkkäḡän, a-wen, tajjän-t.

34 Afäl daḡ wär səmərwisäm ar i-äddinät wi däx-tordäm timzal, əndek marušät wa s-mad-təjrəm äṭṭäma-net? Wädden, inäsbäkkäḡän-däx, samärwasän i-imidiwän-näsän ed, ordan xur-sän azäbäna.

35 Ärhät išənja-näwän, tajjät-asän a olayän; səmmərwəsät i-ere däx-wär jeräm äṭṭäma n-timzal. Dihen, ad-ijat marušät-näwän, tumasäm aratan n-Mässinäx wa iknan aḡkul ed, ənta, milyaw-net, wär sār-s izley wi wär ha tämayit hakt-däx wi n-inälläbasän.

36 Təjjəšet-käwän təmxäre n-təhanint ta hät Abba-näwän.

*Wär säḡlamät äwadəm
(Mätti 7:1-5)*

37 Afäl wär tennem dāḡ-āwadəm, wär mad-dāḡ-wän änn āwadəm, afäl wär tössödlämäm āwadəm, wär kāwän-e-isödləm āwadəm, naššät i-ad-töjrəwäm tenäšše.

38 Äkfät, ad-töjrəwäm; ere wa ihakkän, ad-ijrəw a äjjeen dāḡ-asəbbətär-net ed, ilkam ad-hanāḡ-ikət Mässinäḡ isuf-net s-əmmək wa s-nətəkkat isuf-nänäḡ i-äddinät.»

39 Issäḡläy-tän-dd Ḳisa tangalt dāḡ-hasän-inna: «Ajän emödderyəl äddoobät ad-ilwəy emödderyəl? Wädden, ad-iḡwən issənän-essän dāḡ-anu?

40 Wär t-illa änätṭalib ojarän älyalim-net mäšan, änätṭalib iket-net iḡradän, ad-aläh d-älyalim-net.

41 Uhən käyy, mafäl hannäyäd tezewt ta hät tiṭṭ n-änḡa-k, a-s ija a-wen, wär hönneyäd afäḡot wa ihän tiṭṭ ta-näk?

42 Meḡ daḡ, əndek əmmək wa s-mad-tənnəd i-änḡa-k: <Äyy-ahi ad-hak-əkkəsäḡ tezewt dāḡ-tiṭṭ-näk>, a-s ija a-wen, käyy iman-näk, iha afäḡot tiṭṭ ta-näk. Älmunafey! Äkkəs-in afäḡot wa ihän tiṭṭ-näk təzzar i-ad-tudabed ahänay d-ukəs n-tezewt ta hät tiṭṭ n-änḡa-k.»

A-wa ihan ulh a ijanna emm

(Mätti 7:17-20; 12:34-35)

43 «Wär t-illa ahəšk olaḡän itiirəwən aratan läbasnen, wär t-illa daḡ erk ahəšk itiirəwən aratan olaynen.

44 Hak ahəšk-dāḡ aratan-net a-s ititwəzziy. Wär mad-dd-təkkəsäd ara n-ašar fäll-ewärwär, wär mad-təkkəsäd daḡ läxnäb fäll-tahəjjart.

⁴⁵ Āwadəm-wa oläxän, miļaw n-ulh-net a dāx-dd-itakkäs a-wa oläxän mäšan, enälläbäs ənta, tälläbäst n-ulh-net a dāx-dd-itakkäs a-wa läbasän ed, a-wa idkärän ulh n-ägg-adəm a dāx-itamäjräd emm-net.»

Āssasän wi n-əssin
(Mätti 7:24-27)

⁴⁶ «Mafäl hi-jannem: <Emäli, Emäli!> a-s ija a-wen, wär təjjəm a-wa hawän-jannex.

⁴⁷ Ere hi-dd-ikkän-däx, äsjäd i-mäjräd-in, ad-itamašal a-wa ənneḡ, ad-käwän-säknäx ere wa dār-oläh.

⁴⁸ Oläh d-āwadəm itəddayän ehän, iḡäš ässas-net har iwwäḡ tähunt, idäy fälla-s. Ij' akäsa, ij' anji äššoohen, inkäf i-taḡäšamt siha d-siha mäšan, wär tät-äsmäramär ed, təkñ' äntum dāx-äkall

⁴⁹ mäšan ere wa islän i-mäjräd-in wär has-äsjäd, oläh d-ere idäyän ehän-net fäll-tasənjit wärät la ässas, osä-dd anji, inkäf i-ehän, immärt-in s-iyḡät, ij'-as tenäde təmdat.»

7

Āzozäy Ȳisa ānaxdim n-käbtän iyyän
(Mätti 8:5-13)

¹ Issəsla Ȳisa isälan-win-däx i-tamətte ḡas, ijḡäš aḡrəm wa n-Qäfärnaxum.

² Ill'-e dihen käbtän ilan akli ikna tärha-i s-a-s itäjḡ a-wen-däx ija turhəнна ta-däx s-išwar hin-ässijja.

³ Islä kăbtăn a-s dd-ijjaš Ÿisa äkall ȝas, äšmašäl sār-s hārät dăȝ-inušămăn n-käl-Ălyăhud i-ad-dăȝ-s öttărăn ad-dd-ass, izuzøy akli-net.

⁴ Osăn-dd käl-Ălyăhud Ÿisa, dälăn-t dăȝ-ad-t-izuzøy, ənnăn-as: «Ăhaləs-i-dăȝ, äniihăjja s-ad-has-tökkəsäd tekăriđt,

⁵ irha tumast-nănăȝ hullan, ənta a hanăȝ-issəkrăsän ehăn n-ăđđin wa nəla.»

⁶ Äđđew dăr-săn Ÿisa. Wăr-ujøj a-s has-dd-əlkdăđăn imidiwăn n-kăbtăn dd-ăšimašäl, ənnăn-as: Inn'-ak kăbtăn: «Ăȝalim! Wăr täslăyyăȝăđ iman-năk făl-a-s, wăr-ănhăjjăȝ d-ad-dd-tøjješăđ ehăn-in,

⁷ a-wen-dăȝ daȝ a făl wăr-ăsnăhăjjăȝ iman-in d-ad-kăy-in-ăkkăȝ, änn tiyyăt täfert, ad-izzøy äanaxdim-in.

⁸ Năkk, əllan-t imănokalăn jənnøj-i, ley daȝ năkk əssărdusa daw-i t-əllanen, e-d ənnəȝ i-iyyăn: <Ĕgləw>, ad-igləw, e-d ənnəȝ i-wa iyyăđăn: <Ĕyyăw>, ad-hi-dd-ass; akli-nin daȝ, e-d has-ənnəȝ: <Ăj a-wa>, ad-t-ăj.»

⁹ Islä Ÿisa i-a-wen ȝas, ijrăz-as kăbtăn, innăđ-dd s-ăđđinăt wi has-əlkdămmen, inn'-asăn: «Ăsidătteȝ-awăn a-s wăla dăȝ-ăkall wa n-Işrayil, wăr kăla ənhăyăȝ ere s-ogdăh immun-net d-wa n-ăhaləs-i-dăȝ.»

¹⁰ Ĕqqălăn meddən-wi dd-ămešălnen, ogăžăn-in akli wa s-kăla ärhin, izzay.

Issənkăr-dd Ÿisa rure-s n-tănuđăft tiyyăt jer-inəmmuttan

11 Ašäl wa n-darät wen, äddew Yisa d-inəṭṭulab-net s-taxrəmt s-sisəm-net Nayin, təlkaṃ-asän daḡ tamətte täjjeet.

12 Diha-däḡ dd-əjjäšän aḡrəm, ad-ämmoqqäsän d-äddinät äwwäḍnen härät äwwaynen enəmmettən s-tizəska; enəmmettən-en, alyaḍ s-wär təla ma-s ar ənta, ti-s daḡ wär-idder.

13 Ojjä Yisa tamäḍt-ten-däḡ, täḡḡ'-e tähanint-net, inn'-as: «Əlḡən Iblis.»

14 Ikkä-dd enəmmettən, idäs-t, əbdädän äddinät-wi t-ämisawäyнен, innä i-enəmmettən: «Ämawaḍ, ənnex-ak: ənkär!»

15 Äqqimä-dd enəmmettən ässaḡät-wen-däḡ, ad-itamäjräd, ässoḡäl-t Yisa i-ma-s.

16 Ärmäḡän äddinät iket-näsän, ad-tiimələn Mässinäḡ, jannen: «Ašäl-i, änfaläl-dd ännäbi mäqqoorän jere-näḡ, Mässinäḡ osä-dd tamətte-net i-ad-tät-iḡləs.»

17 Ämsaḡäl mäjräd-wen-däḡ ätwännän fäll-Yisa däḡ-Älyähudəyät d-attayän-net.

Isəstanän wi ija Exya wa n-Enəsselmäḡ däḡ-isälan n-Yisa

(Mätti 11:2-19)

18 Osän-dd inəṭṭulab n-Exya, jän däḡ-s isälan n-a-wa ijän iket-däḡ-net.

19 Iḡrä-dd däḡ-sän əssin, äšmašäl-tän s-älḡalim i-ad-t-səstənän kunta ənta a-s Wa s-ätwänna ilkam ad-dd-ass meḡ ilkam iyyän säl ənta.

20 Osän-dd meddən, ənnän-as: «Exya wa n-Enəsselmäḡ a hanäḡ-dd-äšmašälän sär-k, inn'-anäḡ ad-käy-nəsəstən, <kunta käyy a-s Wa s-

ätwänna ilkam ad-dd-tasəd meḡ ilkam ere säł käyy?› »

²¹ Ässaḡät-wen-däḡ t-sastanän, äzozäy ʒisa äddinät äjjootnen däḡ-tizzoren d-alšinän, ikfa daḡ iməddorḡal äjjootnen turhajät n-ahänay.

²² Äwwežäb i-meddən wi dd-äšmašäl Exya, inn'-asän: «Äqqələt Exya, suḡələm-as a-wa tənḡäyäm d-a-wa təsläm, ännät-as: iməddorḡal hannäyän, inəbdan rajjäšan; wi ijraw jəri, tišdajän, imzaj, sallän; inəmmuttan nakkärändd; tiläqqiwen, sallänät i-Älənžil.

²³ Təndəḡ i-ere wa däḡ-i wärän ij' äššäk.»

A-wa innä ʒisa fäll-Exya wa n-Enəsselmäḡ

²⁴ Eḡlän inämmašälän n-Exya ḡas, ädwännät ʒisa i-tamətte däḡ-isälan n-Exya, inn'-asän: «Ak, a-s təzjāräm s-tenere, ma tənḡäyäm? Ak tezewt äsiwälawäl aḡu a tənḡäyäm? Äbo!

²⁵ Adiš ma təkkäm i-ad-t-tənḡäyäm? Ak ähaləs äsisahḡän ašäl a tənḡäyäm? ĩnhəywät-tän-ak äddinät-wi sasahḡnen ašäl, əntəneḡ-den ännufläyən däḡ-ihänan-wi n-imänokalän.

²⁶ Adiš mi təkkäm i-ad-t-tənḡäyäm? Ak ännäbi? Tidət lab a-s ännäbi, ässiilmädäḡ-käwän a-s ere ojärän tumast n-ännäbi a tənḡäyäm.

²⁷ Exya, ənta-en-däḡ a fäl inna əlkəttab n-Mässinäḡ:

‹ĩnhəy! Äzizäräḡ-ak änämmašul-in wa ḡe-iknən tabarät data-k.›

²⁸ Ässiilmädäḡ-käwän a-s, wär t-illa ara n-taməḡt ojärän Exya mäšan, hək d-a-wen-däḡ,

wär t-illa ere t-wärän ojer dăḡ-Təmmənəya n-Mässinăḡ.»

²⁹ Äddinät-wi has-əslänen iket-năsän hakd-dăḡ inarmasän n-tiwse ärđän s-Təmmənəya n-Mässinăḡ ed, äqbälän ad-tän-isəlmăḡ Exya

³⁰ măšan, käl-faris d-älḡulam-i unjäynen s-asəlmăḡ-net, äsfatän iman-năsän dăḡ-a-wa iḡtäs Mässinăḡ.

³¹ Innă Ƴisa: «Ak, mi dăr-mad-sənnəfäqqăḡ käl-əzzurəyät-ta-dăḡ? Ak, mi dăr-olähän?

³² Olähän ḡas d-aratän janen aḡrəf dăḡ-təfärre, jannen iyyäđ i-wi iyyäđnen:

<Ənhəywät, kăwănəđ, wär lem asăfar;

nəwät-awän taḡänibt, tunjäyäm s-dällol!

Nənžär-awän tiswal n-tisnant măšan,

wär təlhem!>

³³ Exya wa n-Enəsselmăḡ, äzzăman wa dd-osa, wär-itətt imənsiwän olaxnen, wär-isəss aman n-lăḡnăb äxxiimmärnen; tənnäm: <Ih'-e alšin>,

³⁴ išräy-t-dd Ägg-ägg-adəm, ənta itihar dăr-wän a-wa tättäm d-a-wa sässäm, ḡas tənnäm dăḡ-s: <Wa ənta, insăy, irăf aman wi n-lăḡnăb äxxiimmärnen, amidi n-inarmasän n-tiwse d-älfusaḡ wi iyyäđnen.>

³⁵ Măšan a-wen wär hin-ikkəs a-s:

<Sărho wa dd-ifälän Mässinăḡ,

ijitän n-aratän-net a t-isatbatän.> »

Təjrăw tamăđt tiyyät tenăšše n-ibăkkăđän-net

³⁶ Ämjarät-dd Ƴisa ašäl iyyän i-u-faris iyyän, ikk'-e-hi-dd, ad-tamănsawän.

³⁷ Təsla tamädt n-tanäsbäkkädt hat aḡrəm-en-däḡ a-s ʕisa ämijarät i-u-faris-en ɣas, a əndärrän, ənta da-däḡ täwway butəl n-ađutän.

³⁸ Tosä-dd, tøjjäš fälla-sän ehän wa däḡ-tamänsawän, təkka dihad äsiḡämär ʕisa, mäł daw-ıdarän-net, ad-hall. Hall har tössəbdäj ıdarän-net s-imettawän-net, ad-tän-timəs s-tiškəkäđ-net, timəllut-asän, säñḡal fälla-sän ađutän.

³⁹ Inhäy u-faris wa dd-äsmäjaren ʕisa a-wen ɣas, ad-ijanna däḡ-ıman-net: «Ənnär ämoos ähaləs-i-däḡ ännäbi, ilməd a-s tamädt-ta-däḡ t-tədasät, tälkäxbat.»

⁴⁰ Inn'-as ʕisa: «Simyon, ärheḡ ad-hak-ännäḡ härät iyyän.» Inn'-as Simyon: «Äłḡalim, äsijädäḡ-ak, mäjräd.»

⁴¹ Inn'-as ʕisa: «Käla t-illa ähaləs irwasän əssin meddən: iyyän, irwas-t səmmosät timad n-ärriyal n-azrəf, wa iyyädän, irwas-t, səmmosät timərwen n-ärriyal n-azrəf.

⁴² Inhäy a-s wär tän-iha-i äddooben timḡal n-ehäre-net, ma n-əmmək ɣas, inš'-asän-in a-wa tän-irwäs. Ässistänäḡ-käy käyy Simyon: «Əndek däḡ-sän wa has-madän-ikən tämayit?» »

⁴³ Inn'-as Simyon: «Ordeḡ a-s wa s-hin-oyyä ämarwas wa ojarän.» Inn'-as ʕisa: «Toḡadäd.»

⁴⁴ Innäđ-dd ʕisa đarät-a-wen s-tamädt təzzar, innä i-Simyon: «Wädden hannäyäd tamädt-ta-däḡ, əjjäšäḡ-dd ehän-näk, wär hi-təkfed aman s-ässerrädäḡ ıdarän-in mäšan ənta, tössəbdäj-tän s-imettawän-net, tomäs-tän s-tiškəkäđ-net,

⁴⁵ älwäqq wa dd-oseḡ ehän-näk, wär hi-dd-təlkeđäd, tasəsäd-ahi däḡ-idmarän-näk mäšan

ənta, a dd-oseɣ, timəllut i-iɖarən-in fäll-semɣar-i-däɣ hi-təja.

⁴⁶ Käyy daɣ, wär təšweyäd eɣäf-in, a-s ija a-wen ənta, iɖarən-in a təšwäy s-aɖutän.

⁴⁷ Däɣ-təssəba n-tärha-i-däɣ mäqqärät hi-təssəkna, a-wa äjjen la däɣ-ibäkkadän, ätiwänšän-as-in. Tidət-däɣ a-s ere wa s-hin-ätwänša a əndärrän, tämayit-net daɣ ti-əndärrät.»

⁴⁸ Inna Ƴisa ɖarät-a-wen i-tamäɖt: «Ibäkkadän-am, ätiwänšänäm-in.»

⁴⁹ Ƴislän imäjarän i-a-wen-däɣ ɣas, ad-jannen däɣ-iman-näsän: «Ma ämoos äwadəm wa äddooben tenäšše n-ibäkkadän n-äddinät?»

⁵⁰ Innä Ƴisa i-tamäɖt ɖarät-a-wen: «Immun-näm a käm-iɣlāsän, əgləw däɣ-älxer.»

8

Tiɖeɖen-ti n-timadhale n-Ƴisa

¹ Älliil Ƴisa ɖarät-a-wen iɣärman d-tidbi äjjootnen, ixatṭäb i-äddinät isälan n-älxer n-Təmmənəya n-Mässinäɣ, äddeewän dār-s inəṭṭulab-net wi n-märaw d-əssin

² d-härät däɣ-tiɖeɖen s-tiyyäd, ikkas däɣ-snät, alšinän d-tiyyäd äzozäy däɣ-turhənnawen. Tiyyät däɣ-snät, isəm-net Märyäma ta n-Muläzḍaləyät, ikkas däɣ-s ənta əssa alšinän,

³ tiyyät isəm-net Täxya, ənta a-s hənne-s n-Šuza wa ixkämän fäll-inaxdimän n-ehän n-ämänokal n-äkall wa s-isəm-net Harudəs, tiyyät

Suzänna d-timidiwen-net tiyyäd äjjootnen, iket-däx-näsnät, ədhalnät Yisa d-inəttulab s-a-wa əttäfnät.

Tangalt ta n-änäsdamu
(Mätti 13:1-9; Marqəs 4:1-9)

⁴ Təddew-dd tamətte təjjeet s-wär t-illa ayrəm wär dd-fel s-Yisa. Issäxläy tamətte tangalt, inn'-asän: «Käla izjār änäsdamu iyyän i-ad-iddumət ašəkrəš-net.

⁵ Älwäqq wa d-itidumut, ođänät tiblalen tiyyäd däx-əbara, äfkälfäkälän-tänät äddinät, äkkukkären-tänät-dd igdađ, əksän-tänät.

⁶ Ođa ašär iyyän jer-tihun, diha-däx dd-əffoqqät, ad-hin-əqqur fäl iba n-abduj.

⁷ Ođa ašär iyyän däx-tabəññənt, tədwäl-dd fälla-s tabəññənt, təzmäd-as.

⁸ Ašär wa iyyädän, ođa däx-əkall olayän, idwäl-dd, ikräš aratan s-timađ.»

Ija məjräd-wen-däx xas, idkäl eməsli-net, innä: «Ere ilän timəzzujen s-islä-däx, isäjdet.»

Äddälil wa fäl isaxra Yisa s-tangalen
(Mätti 13:10-17; Marqəs 4:10-12)

⁹ Əssəstänän-t inəttulab-net dərät-a-wen d-älmäxna n-tangalt ta ija.

¹⁰ Inn'-asän: «Käwäneđ, təjrawäm turhajät n-ujreh n-əddəraj wa n-isälan n-Təmmənəya n-Mässinäx məšan, äddinät wi iyyädnen, wär jen a-wen.

<Ad-əswađän, wär hənnəyän;
sallän, wär jərrähän.> »

*Älmäḡna n-tangalt ta n-änäsdamu
(Mätti 13:18-23; Marqəs 4:13-20)*

11 «Ämära, tangalt, älmäḡna-net da:
Tiblalen a-s mäjräd n-Mässinäḡ.

12 Äbara wa däḡ-oḡänät tiblalen tiyyäd, ənta a-s äddinät-wi sallänen i-mäjräd n-Mässinäḡ, as'-en-dd Iblis, ilbøy-t-dd däḡ-ulhawän-näsän i-ad-wär-omenän s-Mässinäḡ, iḡləs-tän.

13 Tihun ti jer-oḡänät tiblalen tiyyäd, əntänäteḡ a-s äddinät-wi s-e-d əslän i-mäjräd n-Mässinäḡ, ad-əhləyləyän, äqbəlän-t šik, məšan wär t-təyyən ikraš ikewän däḡ-ulhawän-näsän, ad-əjən äzzäman əndärrän älmät ätubän, məšan afäl ätwäzzurräben, ad-hin-əbbuṭṭəlän a-wa s-omänän.

14 Tabänḡənt ta däḡ-oḡänät tiblalen tiyyäd, ənta a-s äddinät wi s-e-d əslän i-mäjräd n-Mässinäḡ, ad-tän-äḡləbän inəzjam n-tārha d-ajmur d-ižəjraz n-wälät-äddunya, əzmədän-as, indär-asän ad-əhələn s-data däḡ-tuksəda-näsän i-Mässinäḡ.

15 Äkall wa oläḡän däḡ-oḡänät tiblalen tiyyäd, oläh d-äddinät-wi s-e-d əslän i-mäjräd n-Mässinäḡ, ad-t-əknən uḡəf s-sərho däḡ-ulhawän-näsän, ad-hasän-t-ijjəš älfäyda äddewän d-akuyəd.»

*Tefätelt
(Marqəs 4:21-25)*

16 Inn'-asän ḡisa daḡ: «Wär t-illa ere isar-masän tefätelt təzzar, isəbbumbøy fälla-s äkoss meḡ tät-ija daw-tešejit, änn-ak, asili a tät-itajj

fäll-äsaḍef äsikakän i-ad-hannäyän äddinät wi dd-tajjšnen ehän ännur-net.

¹⁷ Wär t-illa a iffarän s-wädden ad-dd-infilöl, wär t-tölla day takše s-wädden ad-dd-tëffukkär s-tarähut.

¹⁸ Äjät änniyät i-ömmäk wa s-sajadäm; äwadem wa ifhämän härät, ad-has-iwwaḍ musnät har isëssiköy mäšan, wa s-wär t-illa a ijarah, wär t-in-ikka härät, änn-ak, ad-däx-s ämahäx wäla a-wa s-orda a-s ittaf-t.»

Anna d-ayötma n-ÿisa wi n-tidöt

(Mätti 12:46-50; Marqəs 3:31-35)

¹⁹ Tosä-dd anna n-ÿisa d-ayötma-s mäšan, igdäl-asän öjut n-tamötte ad-t-önhöyän.

²⁰ Ätwänn'-as: «Töbdad anna-näk d-ayötma-k dat-emm n-ehän, ärhan ahänay-näk.»

²¹ Äwwežäb-asän, inn'-asän: «Anna-nin d-ayötma-x, äddinät-wi sajadnen i-mäjräd n-Mässinäx, tamašalän a-wa inna.»

Issəbdäd ÿisa aḍu fäll-əjäns

(Mätti 8:23-27; Marqəs 4:35-41)

²² Ijjäš ÿisa ašäl iyyän turäft n-aman önta d-inötulab-net, inn'-asän: «Nöjlöyet ejänš s-ašrut wa iyyädän», əglän.

²³ Əglan fäll-aman-en-däx a-s hin-ittaş ÿisa. A əndärrän, inkär-dd aḍu-i-däx äššoohen, ad-ḍakkär turäft aman, öjjäšan miši.

²⁴ Ohäzän-dd inötulab ÿisa, ad-t-sänkarän däx-eḍəs, jannen-as: «Älyalim, Älyalim, nöhläk!» Inkär-dd ÿisa, äsmähäḍ fäll-aḍu d-tinäzzämären ti äššoohätnen, ibdäd a-wen-däx iket-net, sämmeḍ-in.

25 Inn'-asän Yisa: «Ma ija immun-năwăn.»
 Eqqälän-dd ƣas ärməƣăn, oran imawăn,
 tinmönin: «Ma ämoos äwadəm-wa-däƣ s-e-
 d omär i-ađu d-aman ad-has-səjdən?»

Äzozäy Yisa äwadəm iha alšin
(Mätti 8:28-34; Marqəs 5:1-20)

26 Äsjänän ɔarät-a-wen däƣ-äkall wa n-käl-
 Gadara änimäswäɔän d-teje ta n-Galila.

27 Diha-däƣ dd-izjär Yisa turäft n-aman,
 ad-has-dd-ilkäɔ ähaləs n-aƣrəm-en-däƣ han
 alšinän. A ilan äzzäman, wär-iləss tikəst, wär-
 il' edägg n-iman-net, izzaƣ tizəska.

28 Inhäy Yisa ƣas, äsƣärät təzzar, irkäƣ data-
 s, inn'-as: «Ya Yisa wa n-Rure-s n-Mässinäƣ wa
 iknäñ aɔkul, ma däƣ-i tärhed? Daläƣ-käy d-ad-
 wär hi-täqquzäbed.»

29 A-s ijänna a-wen-däƣ, isamähäɔ Yisa fäll-
 alšin wa t-ihän, i-ad-t-izjär. Ähaləs-en, itajjš-
 t alšin s-e-d t-ijjš, akärad ad-t-tajjän äddinät
 s-tišəm d-tifren mäšan, isəƣätas-dd a-wen-däƣ
 iket-net, äzzäwät-t alšin s-tinariwen.

30 Issəstän-t Yisa, inn'-as: «Mi isəm-näk?»
 Inn'-as amälšon: «Isəm-in ejhän», ed alšinän
 äjjootnen a t-hanen.

31 Ad-laqqädän alšinän-wi t-hänen Yisa i-ad-
 wär täñ-ässoka anu wa wärän il' ider ihän
 äläxärät.

32 İɔan dihen ehäre n-əlxənžärän fäll-tasäja
 n-taɔayt, əlyädän alšinän Yisa i-ad-tän-äyy ad-
 əjjəšän əlxənžärän-en-däƣ, irɔ'-asän s-a-wen.

33 Əzjärän alšinän ähaləs, əjjäšän əlxənžärän,
 ad-dd-titrəktərikän wa-däƣ n-afälla n-taɔayt,

tiḏəwän dāḡ-ejärew wa səmmän, tattän-tän aman.

³⁴ Īnhäyän imāḏanän-näsän a-wa ijän ḡas, äjewädän, jän isālan dāḡ-käl-aḡrəm d-attayän-net.

³⁵ Osän-dd äddinät äwinafätnen a-wa ijän, ogäzän-dd ähaləs wa dāḡ-ikkäs Ḣisa alšinän, äqqiima edes i-iḏarän n-Ḣisa, ijä isəlsa, h'-e daḡ tijja n-iman-net; ärmäḡän.

³⁶ Jän dāḡ-sän äddinät wi äjjəyhnen i-a-wa ijän isālan n-əmmək wa s-dd-iḡlās amälšon dāḡ-alšinän wi t-əzzäḡnen.

³⁷ Mäšan, əjjäšän-tän isālan n-a-wa ijän ḡas, ad-tattärän käl-Gadara dāḡ-Ḣisa ad-ifəl äkall-näsän fäll-tarəmməxt-i-dāḡ jän. Ijjäš Ḣisa turäft n-aman, iqqäl.

³⁸ Ittär dāḡ-s ähaləs wa dāḡ-ikkäs alšinän ad-t-äyy ad-där-s idaw mäšan, inn'-as Ḣisa:

³⁹ «Ḥqqəl ehän-näk, tälläḡed i-äddinät təmyäre n-a-wa hak-ija Mässinäḡ». Iglä ḏarät-a-wen, ad-isänäfas dāḡ-aḡrəm iket-net təmyäre n-a-wa has-ija Ḣisa.

Isālan n-elle-s n-Žayrus d-tamäḏt ta dd-izajjār ašni

(Mätti 9:18-26; Marqəs 5:21-43)

⁴⁰ Älwäqq wa dd-iqqäl Ḣisa ašrut n-ejänš wa iyyädän, təl-käd-as-dd tamətte has-täqqalät.

⁴¹ A əndärrän ähaləs iyyän da-dāḡ s-isəm-net Žayrus, ənta a-s älfäqqi n-ehän n-äddin wa n-käl-Älyähud n-taḡrəmt-en; irkäḡ dat-Ḣisa, ad-dāḡ-s itattär ad-idawän s-ehän-net,

⁴² fäl-a-s itiba elle-s lat marăw iwətyan d-əssin s-ənta ɣas a ila. Äddeew dăr-s s-ehän-net dăɣ-a-s t-tăɣiläyɣäläy tamətte siha hagd siha.

⁴³ Tamətte-en, h'-et tamădt izajjār ašni a ilan mărāw iwətyan d-əssin, wăr t-illa läxtur wăr tosa māšan, äbä-dd i tăt-əzozäyän.

⁴⁴ Təkkä-dd ɖarät Ƴisa, ɖäs afär n-eräswäy-net, iktäl ašni wa tăt-dd-izajjārän älwäqq-wen-dăɣ.

⁴⁵ Innä Ƴisa: «Ma ämoos äwadəm wa hi-ıɖäsän?» Wăr t-illa ere innan härät. Iggäd-dd Bətrus, inn'-as: «Äɣalim, täsinäkmäm-käy tamətte täjjeet dăɣ-ifäyyän iket-näsän.»

⁴⁶ Inn'-asän Ƴisa: «İɖäs-ahi äwadəm iyyän fäl-a-s, ofrayäɣ i-tärna ta hi-dd-təjmădt.»

⁴⁷ Təlmăd tamădt a-s täffukkär-dd ɣas, təkkä-dd Ƴisa täšikăɖkăɖ, tärkăɣ data-s, təlläɣät-as dat-äddinät iket-näsän äddälil wa fäl ɖäs afär n-eräswäy-net d-əmmək wa s-təzzäy älwäqq-wen-dăɣ.

⁴⁸ Inn'-as Ƴisa: «Talyaɖt-in, äzozäy-käm immun-näm, əgləw dăɣ-älxer.»

⁴⁹ Ämmiirăd Ƴisa dihen-dăɣ a-s dd-osa ähaləs dd-ifalän eɣewən n-älfäqqi n-ehän wa n-äddin, inn'-as: «Elle-k, äba-tăt, wăr täsläyyäɣäd äɣalim daɣ.»

⁵⁰ Islä Ƴisa i-isälan wi dd-ässawăɖ ähaləs-en ɣas, innä i-Žayrus: «Wăr käy-isärməɣet härät, amən ɣas, ad-təzzəy.»

⁵¹ Iwwăɖ-in Ƴisa ehän n-Žayrus ɣas, igdäl i-äddinät ad-t-əjjəšän, wăr-äddew ar d-Bətrus d-Exya d-Yaqub d-ti-s d-ma-s n-talyaɖt.

⁵² A-s itäj j a-wen-däx, täsikäläl tamette iket-däx-net, hall iba n-talyaḏt mäšan, inn'-asän Yisa: «Wär təlhem ed talyaḏt, wär tät-äba, eḏəs xas a ja.»

⁵³ Jän-t tekäškäšt ed əkkasän äššäk a-s äba-tät.

⁵⁴ Ijjäš Yisa edägg wa däx-tensa talyaḏt, irmäs-tät-dd s-äfuss, ixr'-et, inn'-as: «Talyaḏt, ənkär-dd!»

⁵⁵ Eqqälän-tät-dd iman-net, təbdäd-dd s-iiyät, omär-tän d-ad-tät-əkfən a təkša.

⁵⁶ Eqqälän-dd imärawän-net xas tof'-en täkunt. Äsmätär-tän Yisa d-ad-wär jen isälan n-a-wa ijän däx-äwadəm wäl' iyyän.

9

Äšmašäl Yisa inəmmušal-net (Mätti 10:5-15; Marqəs 6:7-13)

¹ Ixra-dd Yisa inəṭṭulab-net wi n-märaw d-əssin, ikf'-en tärna d-älxikmät fäll-e d t-illäm alšin d-tädabit n-ad-zizuyän äddinät däx-turhənnawen-näsän,

² äšmašäl-tän ḏarät-a-wen i-ad-xaṭṭäbän isälan n-Təmmənəya n-Mässinäx d-ad-zizuyän imarhinän,

³ inn'-asän: «Wär tiwəyät wäla a əndärrän däx-asikəl-näwän, wär tiwəyät täborit, wäla šakkoš, wäla äzzad, wäla azrəf; wär tiwəyät əssin iräswäyän.

⁴ Ehän təjjäšäm-däx har käwän-äsməjarät, xaymät däx-s har ašäl wa d-tässawäḏäm tekle.

⁵ Axrəm təjjäšäm wär käwän däx-s äsbärräk äwadəm, əzjərät-t, täbbäkbäkäm iḏarän-näwän

i-ad-wär kăwăn-iləttăx wăla äboqqal-net, ilkam ad-äjĵăyh a-wen fälla-săn.»

⁶ Eĵlăn inəttulab, tadăbayt əmmărăn-dăx, ad-dăx-s äxtəbăn isălan n-ălĵer, zuzəyən dăx-s imarhinăn.

*Iggăd ənniyăt n-ămănokal Harudəs
(Mătti 14:1-12; Marqəs 6:14-29)*

⁷ Islă Harudəs-i ixkămăn fäll-teje ta n-Galila a-wa ităĵĵ Ŷisa d-inəttulab-net ĵas, iqqăn eĵăf-net făl-a-s, jannen äddinăt iyyăd dăx-isălan n-Ŷisa a-s ənta-i-dăx a-s Exya wa n-Enəsselmăx dd-olasăn tanăkra jer-inəmmuttan,

⁸ jannen iyyăd: «A-wa ännăbi Ŷəli dd-olasăn uĵəl», jannen wi iyyădnen: «A-wa iyyăn dăx-ännăbităn wi n-ibda dd-olasăn tanăkra jer-inəmmuttan.»

⁹ Harudəs ənta iman-net, innă: «Exya-š, ajăn wădden năkk a dd-issəfrăsăn eĵăf-net, ma ämoos-š wa hi-dd-išreyăn fäll-sallăx ijităn-wi-dăx?» Ad-itattăr ya Harudəs əmmək s-inhăy Ŷisa.

*Asyăwăn Ŷisa səmmos afdăn n-ăhaləs
(Mătti 14:13-21; Marqəs 6:30-44; Exya 6:1-14)*

¹⁰ Eqqălăn-dd inəmmușal, jăn dăx-Ŷisa isălan n-a-wa jăn iket-net. Ikkăs-tăn-dd s-takše, ikka dăr-săn tayrəmt ta n-Bătsăyda.

¹¹ Elmădăn äddinăt s-a-wen ĵas, əlkămăn-as-dd. İlkăd-asăn-dd Ŷisa, ad-hasăn-itajĵ isălan n-Təmmənəya n-Măssinăx, izizuy dăx-săn wi n-imărhinăn ädđirărnen s-a-wen.

¹² Ohăz-dd eĵădăl n-tăfukt ĵas, ohăzăn-t-dd inəttulab-net wi n-măraw d-əssin, ənnăn-as:

«Səgləw tamətte ad-täkk tidbi-ti ohäznen d-imäzzaḡän i-ad-təmmäḡ i-edägg dāḡ-tənsa d-i dāḡ-təkša fäl-a-s, edägg n-tenere a nəha.»

¹³ Inn'-asän: «Un, šäksät-tän käwäneḡ iman-näwän.» Ğnnän-as: «Wär nəṭṭef ar səmmosät tijəlwen d-əssin imānan, afäl wädden aḡrəm a nəkka, i-ad-dd-nəžänš a təkša tamətte jat əjut-wa-dāḡ.»

¹⁴ Älzämayät-en-dāḡ, ih'-e a iwwädän səmmos afḡän n-ähaləs. Innä Ƴisa i-inəṭṭulab-net: «Säqqaymət äddinät, təbdəwäm-tän s-səmmosät-səmmosät timərwen n-äwadəm.»

¹⁵ Jän inəṭṭulab a-wa hasän-innä, äşḡäymän äddinät iket-näsän.

¹⁶ İdkäl Ƴisa ḡarät-a-wen tijəlwen ti n-səmmosät d-imānan wi n-əssin, äjoḡäy išənnawän, ämmoy i-Mässinäḡ, äfräsfäräs tijəlwen, änkäḡnäkäḡ imānan təzzar, ikfä a-wen-dāḡ iket-net i-inəṭṭulab-net i-ad-t-uḡanän jer-äddinät.

¹⁷ Əksän iket-dāḡ-näsän har əyyəwänän, äsdəwän-dd a-wa əjläšän, osän-t iḡnäy märaw deketän d-əssin n-tijəlwen d-imānan.

*Tajuhe ta ija Bəṭrus dāḡ-isälan n-Ƴisa
(Mätti 16:13-19; Marḡəs 8:27-29)*

¹⁸ Ašäl iyyän, itəddal Ƴisa Mässinäḡ, əllan-t ḡur-s inəṭṭulab-net, har šik-dāḡ, inn'-asän: «Ma janna tamətte dāḡ-isälan-in, ma janna, mi ämoosäḡ?»

¹⁹ Ğnnän-as: «Iyyäḡ jannen: käyy a-s Exya wa n-Enəsselmäḡ, iyyäḡ jannen: käyy a-s ännäbi

Yəli, iyyäd fāw a jannen: kăyy iyyän dăḡ-ännăbitān wi n-ibda dd-olasān tanākra jer-inəmmuttan.»

²⁰ Inn'-asān: «Kăwăneḡ-i-š, ma tənnām, mi āmoosăḡ?» Āwwežăb-as Bəṭrus, inn'-as: «Kăyy a-s Ālmasex wa n-Măssinăḡ.»

Ālolăy Yisa dăḡ-isălan n-tamăttant-net d-tanākra-net

(Mătti 16:20-21; Marqəs 8:30-31)

²¹ Āsmăhăd dăḡ-sān Yisa, omăr-tān d-ad-wăr jen isălan-win-dăḡ i-ăwadəm wăl' iyyän,

²² inn'-asān: «Āgg-ăgg-adəm, ilzam-t ad-inhəy tersəmmawen äjjootnen, ənkărān-t inušămān wi n-Işrayil d-imănokalān n-kăl-tikutawen d-ălḡulam n-Āṭṭăwrăt, əjən iman-net măšan, ašāl wa s-kăraḡ ḡarăt tamăttant-net, ad-dd-inkăr jer-inəmmuttan.»

Alkum i-Yisa Ālmasex

(Mătti 16:24-28; Marqəs 8:34-9:1)

²³ Inn'-asān iket-năsān ḡarăt-a-wen: «Ere irhān alkum-hahi-dăḡ, adiš, iksənet iman-net, äjet hak ašāl fäll-tamăttant šund ta n-tajəttewt təzzar, ilkəmet-ahi.

²⁴ Wa wărān itəttăr ar əmmək s-ogăz iman-net dăḡ-ăddunya-ta-dăḡ, ad-ifut dăḡ-ălžännăt, măšan, wa irḡān äfota dăḡ-iman-net dăḡ-ăddunya-ta-dăḡ, dăḡ-ăddimmăt-in, ad-iḡləs.

²⁵ Ma s-infa ägg-adəm ad-irbăx äddunya iket-dăḡ-net, a-s ija a-wen, äššiiska iman-net, äfota dăḡ-ălaxărăt?

26 Ere hi-äkrakädän-däx näkk d-mäjräd-in, ad-t-əkrukədəx näkk-däx i n-Ägg-ägg-adəm ašäl wa d-mad-dd-äqqələx däx-älxurmät-in d-älxurmät n-Abba d-änjälösän wi n-iməšseddöjän.

27 Äsidätteḡ-awän a-s han-käwän äddinät əbdadnen diha-däx wär-e iba wär-ənhəyän Təmmənəya n-Mässinäḡ.»

*Tihusay n-älxurmät n-Ḡisa Älmasex
(Mätti 17:1-8; Marqəs 9:2-8)*

28 Əddəkud n-əttam išilan darät a-s hasän-ija Ḡisa mäjräd-wənnin-däx, äddew d-Bətrus d-Exya d-Yaqub s-tadaḡt tiyyät i-ad-idəl Mässinäḡ.

29 Itəddal Mässinäḡ dihen-däx a-s data-sän dd-ijjäš ini äynayän, iqqäl-dd emäls-net i mällän-mällän šund essam.

30 A ənđärrän, əssin meddən-da-däx dd-falnen išənnawän hasän-dd-änfalälnen, ad-tamäjrädän d-Ḡisa. Meddən-en-hi, iyyän ännäbi Mosa, wa iyyädän ännäbi Ḡəli.

31 Änfalälän-as-dd däx-älxurmät, əjän-as isälan n-əmmək wa s-mad-hin-isəssiwäd ämašal n-Mässinäḡ s-tamättant-net, däx-Yärussälam.

32 A-s itäj a-wen-däx, ilḡad eḡəs Bətrus d-imidiwän-net, ənkarän-dd ḡas, ənhäyän təmḡäre n-älxurmät n-Ḡisa d-meddən wi n-əssin dār-ännibdäd.

33 Älwäqq wa d-igilləw Mosa d-Ḡəli, innä Bətrus i-Ḡisa: «Äḡyalim, ufa ad-nəzzäḡ ḡas diha-däx, nəkrəs kərəḡ ihəktan: wa-näk, wa n-Mosa d-wa n-Ḡəli.» Wär-issen Bətrus a ijanna.

³⁴ Ijanna a-wen-däx a-s tän-dd-tølsa tele n-tejărăkt tiyyät, ärmäxän.

³⁵ Izjār-dd emäsli tejărăkt-en innän:

«A-wa Rure-x wa n-iiyän äsnäfränäx, säjdät-as!»

³⁶ A-s imda mäjräd-ənnin-däx, wär t-illa ere dd-äqqimän dihen-däx a säl Yisa. Ässosämän inəttulab fäll-a-wa ənhäyän däx-išilan-win-däx, wär t-illa ere däx-jan isälan.

*Äzozäy Yisa alyaq təjraw tašäkärkärät
(Mätti 17:14-18; Marqəs 9:14-27)*

³⁷ Ašäl wa ilkämän i-wen, älwäqq wa dd-äzzubbät Yisa d-inəttulab-net taḍaxt, təlkaḍ-as-dd tamətte täjjeet.

³⁸ A əndärrän ähaləs iyyän da-däx, idkäl emäsli-net, innä: «Älxalim, adən tähanint i-aranin s-ənta xas a lex.

³⁹ E-d t-irmäs alšin wa t-ihän-däx, ad-isaxärat, itišbärḍil, isakäffaw, isiləbbuḍ-t, šärnaš dār-s ibiḍḍəw,

⁴⁰ əttäräx däx-inəttulab-näk ad-däx-s t-əkkəšan məšan, indär-asän.»

⁴¹ Äwwežəb-asän, inn'-asän: «Ya əzzurəyät-i-däx wärät tomen s-Mässinäx, tänimäšräy-as, hundäx har əmme əllex jere-wän, əşbaräx-kəwän?» Innä i-ähaləs ḍarät-a-wen: «Awəy-ahidd rure-k.»

⁴² Ikka-dd alyaq Yisa a-s t-äsoḍa alšin, ad-itišbärḍil məšan, äsmähäḍ Yisa fäll-alšin, izzäy alyaq, äsoxäl-t i-ti-s.

Āsihe wa s-əssin d-itajj ʃisa isālan n-tamāttant-net d-tānākra-net
(*Mātti 17:22-23; Marqəs 9:30-32*)

⁴³ Ākunān āddināt iket-dāḡ-nāsān fāl təssəba n-təmyāre n-ijitān n-Māssināḡ. Inhäy ʃisa a-s ākunān dāḡ-a-wa itājj ḡas, innā i-inəṭṭulab-net:

⁴⁴ «Ējjəšnet isālan-wi-dāḡ timəzḡujen-nāwān: Āgg-āgg-adəm, išwar āttirmās, ijjəš ifassān n-dāgg-adəm.»

⁴⁵ Wār-əjrehān məjrād-wen-dāḡ hasān-ija, āttunkāl-asān ālmāḡna-net i-ad-wār t-jārrāhān hakd a-wen-dāḡ, āksudān ad-t-səstənān d-ālmāḡna-net.

Mijraw wa n-tidət

(*Mātti 18:1-5; Marqəs 9:33-37*)

⁴⁶ Tənkār darāt-a-wen tamḡənnant təššoohet jer-inəṭṭulab i-ad-əlmədān əndek dāḡ-sān wa ojārān.

⁴⁷ Iyrā ʃisa edāwānne n-ulhawān-nāsān ḡas, idkāl-dd ara iyyān, ij'-e edes-has,

⁴⁸ inn'-asān: «Ēre āsbālālān ara-wa-dāḡ, dāḡ-āddimmāt-in, nākk a āsbālāl, ere wa hi-āsbālālān, wa hi-dd-āšmašālān a āsbālāl; wa dāḡ-wān āsrāsān iman-net, ənta a-s wa ojārān.»

(*Marqəs 9:38-40*)

⁴⁹ Issəstān-t ānəṭṭalib-net Exya, inn'-as: «Ālḡalim, nənhay āwadəm iyyān itakkāsān alšīnān dāḡ-āddināt s-tārna n-isəm-nākk, nənn'-as, wār-itolset, ed wār hanāḡ-iha s-alkum-hak.»

⁵⁰ Inn'-as ʃisa: «Wār has-t-təgdələm fāl-a-s ere wārān kāwān-iknes-dāḡ, a-di, amidi-nāwān.»

Tikawt n-ʃisa i-Yārussālam

⁵¹ Ohāzān-dd išilan-wi d-ila Ƴisa s-ad-t-iba, inkār-dd jer-inəmmuttan, äkk isənnawān ƣas, təjjāš-dd tārha n-tikawt n-Yārussālam ənniyät-net s-äššahät.

⁵² Issəglä inämmašalān data-s, ässok'-en tayrəmt tiyyät n-Sāmari i-ad-has-əjrəwān ehän dāḡ-äzzubbät

⁵³ māšan, unjāyān käl-tayrəmt-ten-dāḡ s-ad-hasān-imjurət, ed ija tamdujt ta n-Yārussālam.

⁵⁴ Inhāy Yaquub d-Exya a-wen ƣas, ənnān-as: «Älyalim, wi hi-äddinät, äyy-anāḡ ad-fälla-sän dd-nəzəzzubbət efew tən-ilhāsān.»

⁵⁵ Innād-dd sār-sän Ƴisa, äsnārḡām fälla-sän, inn'-asān: «Wār təssenām a jännem,

⁵⁶ Ägg-ägg-adəm wār dd-osa i-ad-ilhəs äddinät, osā-dd i-ad-tän-iḡləs.» Okāyān ɗarät-a-wen s-tayrəmt säl-ten.

*Kəssən n-iman dāḡ-alkum i-Ƴisa
(Mätti 8:19-22)*

⁵⁷ Eḡlan dāḡ-a-wen-dāḡ a-s inn' ähaləs iyyān i-Ƴisa: «E-s təkke-dāḡ, əlkamāḡ-ak.»

⁵⁸ Inn'-as Ƴisa: «Ibāggan lan tihaliwen, igɗaɗ lan iskak māšan, Ägg-ägg-adəm, wār ila wāla edägg dāḡ-issənsa eḡāf-net.»

⁵⁹ Innä Ƴisa i-ähaləs iyyān ɗarät-a-wen: «Əlkəm-ahi.» Inn'-as wa: «Älyalim, äkf'-ahi turhajät n-ad-äḡläḡ äzkāḡ abba-nin, äqqələḡ-kāy-dd, əlkəmāḡ-ak.»

⁶⁰ Inn'-as Ƴisa: «Äyy inəmmuttan ad-əzkən inəmmuttan-nāsān, kāyy, əgləw äj i-äddinät isālan n-Təmmənəya n-Mässināḡ.»

⁶¹ Inn'-as iyyän day: «Älçalim, ärheç ad-hak-ölkemäç mäšan, äkf'-ahi turhajät n-ad-äjäç isønnäçlaf d-äddinät-in təzzar.»

⁶² Inn'-as Үisa: «Ere issəntän azzal wa n-älxidmät i-Mässinäç təzzar, ad-išanäšlam đaras, a-di, wär-änhäjja d-Təmmənəya n-Mässinäç.»

10

Inəttulab wi n-əssayät timərwen d-əssin äsmašäl Үisa

¹ Äsnäfrän älxalim Үisa đarät-a-wen, əssayät timərwen n-änəttalib d-əssin, äšmašäl-tän s-əssin-əssin i-ad-has-izarän s-idäggan wi s-ikittəw ad-tän-immär.

² Inn'-asän: «Ašəkrəš äggolät, əttäçam ijjət mäšan, wär-əjjətän inaxdimän t-oläynten, ädəlät mäs-s n-ašəkrəš i-ad-dd-išəmmişəl inaxdimän oläynten ašəkrəš-net.

³ Säjdät! Äglät, äšimašäläç-käwän i-ad-talähäm d-ikərwatän əllanen jer-tiçəs.

⁴ Wär tiwəyät äzrəf, wäla šäkköš, wäla tifadəlen, wär käwän-šəllunet isofan dəç-tabarät.

⁵ Ehän təjjäšäm-däç, äjrät fälla-s ässälam s-tizarät.

⁶ Kunta ehän-en, izzaç-t ägg-älxer, ad-käwän-isəbbärrək, äns fälla-s älxer-näwän, kunta day wär t-iha ägg-älxer, adiš, akəyät d-älxer-näwän.

⁷ Afäl təjrawäm ehän wa n-ägg-älxer, əzzäçät dəç-s, təksəm, təswəm a-wa käwän-mad-äkf mäs-s fäl-a-s, hak änaxdim-däç, ärhuj-as älxaqq n-tide-net, udayät i-tikawt jer-ihənan.

8 Ayrəm tosäm-däx, äsbärräkän-käwän mæssaw-s, äksät a-wa s-käwän-mad-səmməjurun,

9 zuzəyät imarhinän-näsän, tənnəm i-mæssaw-s: <Təmmənəya n-Mässinäx, tohäz-käwän-dd>

10 məšan, ayrəm tosäm, wär käwän-äsbärräkän mæssaw-s, ilalät tišarriten-net, tənnəm i-mæssaw-s:

11 <Täjjəyhäm a-s wäla-däx äboqqal n-ayrəm-näwän wa iwärän idarän-nänäx, näbbikbäk-in məšan, əlmədät a-s Təmmənəya n-Mässinäx, tohäz-dd.>

12 Ənneḡawän a-s ašäl wa ilkämän, ad-tajär tisanant ta madät-tärməs ayrəm-en-däx, ta tärmäsät ayrəm wa n-Sodoma.»

Iḡarman wi fäll-äsmäqqa ḡisa
(Mätti 11:20-24)

13 «Iməskay käl-Qorazin, iməskay käl-Bätsäyda! Älməşşibät ḡas a fälla-wän madän-idəw ed ənnär iḡarman wi n-Tir d-Säyda əzzäḡän inəzzulam† a däx-jänät tikunen-ti-däx jänen ḡur-wän, äru d-əlsän šakutän, əblənbulun däx-ezəd fäl təmyäre n-tätubt-näsän.

14 A-wen-däx a fäl ašäl wa ilkämän, ad-käwän ijjəš äddäyyät ojärän wa ijjäšan iḡarman wi n-Tir d-Säyda.

† 10:13 10:13 — ḡur-käl-Älyähud, ere wärän ämoos ägg-Älyähud s-aləşäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-nəsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

15 Kăwăneḍ-i-š-i ɛzzăḡnen aḡrəm wa n-Qăfărnaxum, ma tăḡelăm? Tordam a-s ad-itimḡar aḡrəm-năwăn har awəḍ išənnawăn? Xăram-awăn! Ănn-ak, ad-təhələm ider, wăr kăwăn-dd-e-awăḡ ar temse.»

16 Innă daḡ Ȳisa i-inəṭṭulab-net: «Ere hawăn-ăsjăḍăn, năkk a-s ăsjăḍ, wa kăwăn-irfăḍăn, năkk a irfăḍ, ere daḡ wa hi-irfăḍăn, wa hi-dd-ăšmašălăn a irfăḍ.» Issəmdă Ȳisa măjrăḍ ḡas, issəḡlă inəṭṭulab-net i-ad-hin-səssiwəḍăn ămašal-net.

Uḡəl n-inəṭṭulab wi n-əssayăt timərwen d-əssin

17 Ȳḡlăn inəṭṭulab wi n-əssayăt timərwen d-əssin, a-s dd-əḡḡălăn əknan dăḡ-tedăwit. Osăn-dd ḡas, ənnăn-as: «Ălḡalim, wăl' alšinăn, rakkăḡăn-anăḡ e-d hasăn-năḡra isəm-năk.»

18 Inn'-asăn: «Hannăyăḡ Iblis har dd-ătrăkkăt dăḡ-išənnawăn šund essam.

19 Ȳlməḍăt a-s əkfəḡ-kăwăn tărna făll-taššălen d-tizerdəmen d-a-wa ila Iblis dăḡ-tărna iket-net, wăr t-illa făw a ăddooben ad-hawăn-iḡšəd hărăt

20 măšan, wăr kăwăn-isăḍăwatet a-wa s-data-wăn rakkăḡăn alšinăn, ănn-ak, isəddəwətet-kăwăn a-wa s-əktăbăn ismawăn-năwăn dăḡ-išənnawăn.»

*Tămayit n-Ȳisa i-Abba-net
(Mătti 11:25-27; 13:16-17)*

21 Tăsdăwăt tărna n-Unfas ŠăddijănȲisa ălwăḡḡ-wen-dăḡ, innă: «Abba, kăyy-i n-Emăli n-išənnawăn d-ăkall, timələḡ-kăy făl-a-s hărătăn-wi-dăḡ, təffărăt-tăn i-iməssorha d-imusănăn

n-äddunya-ta-däx mäšan, täsnäfaläläd-tän-dd wäla i-aratän. Tidöt Abba, käyy a timeläx ed ädduuttät a-s ənta-den-däx erhet-näk wa ähusken.

²² Wär t-illa a-s wädden ij'-e Abba-nin däx-ifassän-in, wär t-illa ere hi-ijan muzəyät imdan kunta wädden Abba, wär t-illa day ere ijan muzəyät imdan i-Abba kunta wädden näkk-i n-Rure-s-i t-dd-ifälän d-ere wa s-ärheç ad-has-t-zuzəyäç.»

²³ Innäç-dd Yisa çarät-a-wen s-inəttulab-net, ikkäs-tän-dd s-takše, inn'-asän: «Təndəç i-tiçtawen ti hannäynen a-wa hannäyäm!

²⁴ Ässiilmädäç-käwän a-s äsdärhänän ännäbitän äjjootnen d-imänokalän ahänay n-a-wa hannäyäm mäšan, wär t-ənhəyän, äsdärhänän məsällät n-a-wa s-salläm mäšan, wär has-əslen.»

*Ujəš n-tämudre ta täylälät
(Mätti 22:34-40; Marçəs 12:28-31)*

²⁵ A əndärrän älyalim n-Ättäwrät iyyän da-däç dd-inkärän, ija i-Yisa asəstan däç-otas irrum-net, inn'-as: «Älyalim, ma s-leç s-ad-t-äjäç i-ad-əkkusäç tämudre ta täylälät?»

²⁶ Inn'-as Yisa: «Ma iktabän däç-Ättäwrät, ma däç-s täçred?»

²⁷ Inn'-as älyalim, iktab däç-s a-s:
«Ad-tärhəd Emäli-näk Mässinäç s-ulh-näk imda, tärhəd-t s-iman-näk əmdan,
d-äşşahät-näk imda d-tayətte-näk təmda,
tärhəd day ənhäraj-näk s-əmmək wa s-tärhed iman-näk.»

28 Inn'-as Үisa: «Тоҗадăд, әҗ a-wen, ad-təddărăd.»

29 Măšan irha älҗalim-en ad-ikrəš tidət җas, innă daҗ i-Үisa: «Mi ämoosän änhăraj-in?»

Tangalt ta n-u-Sămari

30 Inn'-as Үisa: «Kăla dd-ătrara ähaləs iyyän aҗrəm wa n-Yărussălam s-wa n-Žărriko, igla har fălla-s ođan inaytafän, ohăҗän a-wa ila, tithəkin-t har äktăyyät təzzar, əšlăyän-as.

31 Israd dihen-dăҗ, a-s t-dd-immar u-tikutawen dd-ijan tabarät-ten-dăҗ, inhăy-t măšan, okăy-t šund wăr t-ihənnəy;

32 immăr-t-dd iyyän n-u-Lewi, okăy-t ənta-dăҗ.

33 Măšan, immăr-t-dd u-Sămari dd-ijan tabarät-ten-dăҗ, inhăy-t җas, täny'-e təhanint-net,

34 os'-e-hi-dd, ässerăd ibuyəsän-net s-əzzăyt d-asməd n-lăҗnăb, ittäl-tän təzzar, äsnăy-t tasnit-net, äwwăy-t s-tăhănzabbut, iṭṭăf-as tāməzzuṗt d-tămudre.

35 Äffăw-t җas, ikfă əssin ärriyalän n-ażrəf ahănzabbu, inn'-as: «Taҗălift-năk ähaləs-i-dăҗ har dd-äqqələҗ, a fălla-s təbxăsăd-dăҗ, afäl dd-äqqălăҗ, ad-hak-äzlăҗ.» »

36 Innă Үisa đarät-a-wen i-älҗalim: «Əndek dăҗ-ăddinät-wi-dăҗ n-kărađ wa s-torded a-s ənta a-s änhăraj n-ähaləs-wa ođän dăҗ-ifassän n-inaytafän?»

37 Inn'-as: «Wa has-ođănän təhanint.» Inn'-as Үisa: «Adiš, əgləw kăyy-dăҗ, təjəd šund a-wen-dăҗ.»

Măryăma d-Marta

38 Ifäl Ƴisa dihen äddeew d-inəttulab-net här dd-räsän taxrəmt tiyyät dāx-tän-täsbärräk tamädt s-isəm-net Marta,

39 təla wälätma-s s-isəm-net, Märyäma. Täqqiima Märyäma xur-älxalim Ƴisa, ad-sajad i-a-wa ijänna,

40 a-s ija a-wen Marta ənta, tədgaz dāx-imjora n-Ƴisa. Tähoja xas, təjjäš-dd fälla-sän, tənn'-as: «Älxalim, ajän wär käy-ikma a-wa s-täqqiima wälätma-x wär hi-tilal s-əššäxəl, änn'-as, ad-təbdəd tilal-ahi.»

41 Inn'-as Ƴisa: «Marta, Marta! Tozaräd dāx-a äjjeen wärän infa härät,

42 härät iyyän a ilan tənfa, wen ənta, täsnäfrän-t Märyäma, wär-ilkem day ad-dāx-s əmehäx.»

11

Abba-nänäx wa ihän isənnawän

(Mätti 6:9-13; 7:7-11)

1 Ašäl iyyän, itəddal Ƴisa Mässinäx dāx-edägg iyyän, issəmdä xas, inn'-as iyyän dāx-inəttulab-net: «Älxalim, səlməd-anäx tamädilt n-Mässinäx šund a-wa ija Exya i-inəttulab-net.»

2 Inn'-asän darät-a-wen: «E-d təddaläm Mässinäx, ännät:

«Abba,
səmxərnet äddinät isəm-näk wa šəddijän,
taset-dd Təmmənəya-näk,

3 äkf'-anäx hak ašäl isudar-nänäx,

4 äns-anäx ibäkkadän-nänäx ed näkkäneq-däx,
nənašš i-wi hanäx-dallännen,
wär toyyed Iblis äžžurräbät-anäx,

isiðew-anäx däx-abäkkad.> »

*Akuyəd däx-tamädilt n-Mässinäx
(Mätti 7:7-11)*

⁵ Inn'-asän daḡ: «Təssanäm kəwāneḡ iman-nəwän a-s afäl däx-wän ila iyyän amidi har t-osa s-ammās n-ehäḡ, inn'-as: <Amidi-nin, əffəd-ahidd kəraḡät tijəlwen

⁶ fäl-a-s leḡ amidi-nin s-iket dd-osa ifal-dd asikəl, äzzubbät ḡur-i, wär-əleḡ a t-əššəkšäḡ,

⁷ təssanäm a-s wär has-mad-änn amidi-net: <Wär hi-täşḡäfäd, äbas äddobəḡ tanäkra, ehän iḡfal ämära-däḡ, aratan daḡ ənsan.>

⁸ Älleḡeḡ-awän a-s kud-däḡ wär ibded i-ad-t-äkf a-wa däḡ-s ittär däḡ-idəm n-təmmidəwa ta n-jere-sän, ad-has-t-äkf fäl təssəba n-täkrakiḡt ta mad-has-umas a-wen afäl əslän äddinät i-täkunt ta ija.

⁹ Ənneḡ-awän: ädələt Mässinäḡ, ad-kəwän-äkf, əmmäḡät, ad-təjrəwäm; äḡrät-t, ad-hawän-äkawän.

¹⁰ Ere idälän, ad-ikrəš, ere immäḡän, ad-ijrəw; ere iḡrän Mässinäḡ däḡ-tämäḡatert t-tärmasät, ad-has-tät-ikkəs.

¹¹ Əndek abba däḡ-wän wa s-e-d t-idäl rure-s däḡ-emän, ad-t-äkf taššält?

¹² Meḡ əndek wa s-e-d t-idäl däḡ-tekäkit, ad-t-äkf tezerdəmt?

¹³ Ḣas kunta kəwāneḡ-i n-inälləbäsän, təssanäm isuf n-a-wa oläḡän i-aratan-nəwän, äb'-ätṡäma n-ad-wär kəwän-ikfa Abba-nəwän-i ihän išənnawän Unfas Šəddijän, afäl t-däläm däḡ-s.»

*Tärna ta n-ÿisa, wär toher härät d-ta n-Iblis
(Mätti 12:22-30; Marqəs 3:22-27)*

¹⁴ Ikkäs ÿisa ɗarät-a-wen dāḡ-āhaləs iyyän alšin has-igdalän mäjräd, izjār-t alšin, imməjräd ḡas, āmoos a-wen tākunt i-āddinät.

¹⁵ Ad-jannen iyyäɗ dāḡ-sän: «A-wa tärna n-Abälzäbil, Iblis wa n-āmānokāl n-alšinän a-s itakkäs alšinän dāḡ-āddinät.»

¹⁶ Ettärän wi iyyäɗnen ad-t-arəmən, ənnän-as: «Äj data-nāḡ iji n-Mässināḡ hanāḡ-issətbätän a-s tidət-dāḡ a-s, Mässināḡ a kāy-dd-āšmašälän.»

¹⁷ Ilmäɗ ÿisa ḡur-iman-net a-wa ihän ənniyät-näsän, inn'-asän: «E d t-illäm əddəwəl s-dd-əqqälän məssaw-s əknasän jer-iman-näsän, ad-t-iba; ehän daḡ wa s-dd-əqqälän məssaw-s əknasän jer-iman-näsän, ad-änd.

¹⁸ Afäl-dd iqqäl Iblis iknas iməššerəkän-net, əndek əmmək wa s-e-tāhaj təmmənəya-net? Wädden tənnäm näkk, tärna ta n-Abälzäbil a-s takkäsäḡ alšinän dāḡ-āddinät?

¹⁹ Kunta daḡ a-wa jännem tidət, adiš inəṭṭulab wi-nāwän əntəneɗ, mi tän-ikfän tärna ta s-takkäsän alšinän dāḡ-āddinät? Inəṭṭulab-nāwän en-dāḡ a-s ilkam ad-ājJayhən fälla-wän, sədləmən-kāwän.

²⁰ Māšan, kunta näkk, tärna n-assəkäɗ n-Mässināḡ a-s takkäsäḡ alšinän, adiš Təmmənəya n-Mässināḡ, təll'-e jere-wän.

²¹ A ikk' āhaləs n-anākfor ijbas fäll-tāzoli-net, iḡlaf ehän-net, ad-ogaḡ ehäre-net

²² māšan, afäl fälla-s dd-oɗa ere t-ojārən əššahät, ad-t-ärn, ahāḡ dāḡ-s tāzoli-net ta fäll-äsifälla, uzan ɗarät-a-wen ehäre-net.

23 Ælmödät a-s ere hi-wärän irha-däx, a-di, ašänjo-nin; ere daḡ wa hi-wärän itilal s-asdu, ašəmmähəš ḡas a t-išlan.

*A-wa ihän iba n-tätubt təmdat
(Mätti 12:43-45)*

24 E-d izjār alšin äwadəm, ad-äkk tinariwen i-ad-däx-snät immäx i-edägg däx-ässunfa, afäl has-t-äba, ad-änn i-iman-net: «Näkk-i-däx, ma hi-idgazän, äqqələḡet ḡas ehän-in wa dd-fäläx.»

25 Afäl dd-iqqäl edägg wa ifäl s-tizarät, ad-t-dd-ass ifrad, ämmujnät.

26 Igləw älwäqq-wen, awəy-dd əssa alšinän t-ojärnen tälläbäst, əjjəšan äwadəm-ənnin-däx, əzzäḡän däx-s; umas a-s talḡa n-äwadəm-en ta täzzarät, təššäm i-ta təšräyät.»

27 Ämmiijräd Yisa dihen-däx a-s tədkäl tamädt tiyyät emäsli-net däx-tamətte, tənn'-as: «Təndəḡ i-täsa ta dd-təzjāräd, təndəḡ i-ifäfan-wi tətḡädäd.»

28 Inn'-as Yisa: «Änn-ak, təndəḡ i-wi sajadnen i-mäjräd n-Mässinäx, tamašälän a-wa inna.»

*Isəḡbat n-a-s Mässinäx a dd-äšmašälän Yisa.
(Mätti 12:38-42; Marḡəs 8:12)*

29 Inhäy Yisa a-s tidawän-dd sār-s äddinät ḡas, inn'-asän: «Əzzurəyät-ta-däx, tenälläbäst, wär təmmäx ḡas ar ad-ətwəjjən ijitän n-Mässinäx data-s mäšan, təlmödet a-s wär däx-s ilkem iji n-Mässinäx säl wa n-ännäbi Yunəs.

30 Emmək wa s-käla sär-s ämoos Yunəs iji n-Mässinäx i-käl-Nəniba a-s ija kärađ išilan dăx-tăsa n-emăn, əmmək-wen-dăx dağ a-s mad-umas Ägg-ägg-adəm iji n-Mässinäx i-əzzurəyät-ta-dăx.

31 Aşäl wa n-tebädde, ad-dd-tənkär tāmānokalt ta s-käla täxkäm fäll-äkall wa n-ajus s-isəm-net Saba, täjjayh fäll-käl-äzzāman-i-dăx, səđləm-tän ed, ənta fäl-dd diha dd-imda äkall i-ad-səjəd i-iməridän n-särho wi itäj ämānokal Suläyman. Säjdät! Aşäl-i-dăx, ənhəywät-ak, ill'e jere-wän ere ojarän ämānokal Suläyman māšan hakd a-wen-dăx, tunjäyäm s-asjəd-has.

32 Aşäl wa n-tebädde, ad-dd-ənkärän käl-ağrəm wa n-Nəniba, səđləmən käl-əzzurəyät-ta-dăx ed aşäl wa d-hasän-ixtäb ännäbi Yunəs, ätubän. Säjdät! Aşäl-i-dăx, ənhəywät-ak, ill'e jere-wän ere ojarän Yunəs māšan hakd a-wen-dăx, tunjäyäm s-ad-tutabäm.»

*Tangalt ta n-tefätelt
(Mätti 5:15; 6:22-23)*

33 «Wär t-illa ere isarmasän tefätelt təzzar iffär-tät meğ tät-ija daw-äkoss, änn-ak, aswär a tät-itajj edägg iđkalän i-ad-hannäyän äddinät wi dd-tajjšnen ehän ännur-net.

34 Tiṭṭ-näk a-s tefätelt n-tağəssa-näk. Afäl toolağ tiṭṭ-näk, adiş tağəssa-näk, hannäy iket-net māšan, afäl wär toleğ tiṭṭ-näk, tağəssa-näk iket-net a ihan tihay.

35 Ƴas he käyy! Äj ənniyät i-iman-näk, wär-itumaset ännur-näk tihay i-tağəssa-näk.

³⁶ Afäl ha taḡessa-näk iket-net ännur, wär tät-
iha fäw a ihan tihay, ad-tajjäd ahānay wa tajjäd
afäl hed edägg täsimäläwläw tefätelt.»

Iməskay käl-faris d-älyulam n-Ätṭāwrät

(Mätti 23:1-36; Marqəs 12:38-40; Luqa 20:45-47)

³⁷ Issəmdä Ƴisa məjräd ḡas, issəkl'-e u-faris
iyyän ḡur-iman-net. Osä-dd Ƴisa ehän n-u-
faris ḡas, ikk' edägg wa dəḡ-əskarän imənsiwän,
äşḡämär dəḡ-s.

³⁸ Äkun u-faris dəḡ-a-wa s-issənta Ƴisa tetäte
wär-ässeräd ifassän-net s-älxal wa n-käl-
Älyähud.

³⁹ Inn'-as älyalim Ƴisa: «Käwäneḡ-i n-käl-
faris, šašdajäm afälla n-kara d-ikassän wi
iyyäḡnen, a-s ija a-wen, ammas n-ulhawän-
näwän, wär-iḡney ar tikra d-tälläbäst.

⁴⁰ Tidət-däḡ a-s irmas-käwän iba n-tayətte!
Ajän wädden wa dd-ijän afälla n-äkoss, ənta dəḡ
a dd-ijän ammas-net?

⁴¹ Äktät a-wa ihän karatän-näwän d-ikassän-
näwän i-tiläqqiwen, dihen, ad-data-wän işdaj
härät iket-net.

⁴² Iməskay käwäneḡ-i n-käl-faris! Hakkäm
s-iqqud a-wa ämoosän tämukäst-näwän dəḡ-
ənnäḡnaḡ d-tiyəššawen-ti iyyäḡnen, a-s ija a-
wen, təšlaläm-in fäll-a-wa ämoosän iqqud d-
tärha n-Mässinäḡ, härätän-win-däḡ a-s äniihäjja
a-s təssəntäm šär-sän, səlkəmäm-asän amišəl n-
wi iyyäḡnen oläḡnen.

⁴³ Iməskay käwäneḡ-i n-käl-faris! Tärham
tisäqqima ti ännufläynen dəḡ-ihānan n-äddin

wi n-käl-Älyähud, ijrəz-awän ad-hawän-tajjän äddinät isofan dəḡ-tišarriten.

⁴⁴ Iməskay-nəwän fäl-a-s, tolähäm ḡas d-tizəska fäll-irəjjäš əwadəm wär-issen s-a-wen, səmməḍəsnät-t.»

⁴⁵ Inna iyyän dəḡ-älḡulam n-Ätṭəwrät i-Ḣisa: «Älyalim, käyy ya näkkəneḍ-dəḡ, jed-anəḡ erk məjräd.»

⁴⁶ Inn'-as Ḣisa: «Iməskay käwəneḍ-dəḡ älyulam n-Ätṭəwrät! Sawarəm äddinät əzuk s-izzəwät aggay-net, a-s ija a-wen, wär käwän-ihə ad-hasən-tilaləm s-aggay-net wəla-dəḡ s-emm n-assəkäd.

⁴⁷ Iməskay käwəneḍ-i təqqašnen izəkwan əhuskätnen i-ännəbitän wi ənḡän abbatän-nəwän.

⁴⁸ Əmmək-wen-dəḡ a-s saknem a-s tərḍam s-a-wə jän ed əntəneḍ, ənḡän-tän, käwəneḍ ḡəšəm izəkwan-nəsən.

⁴⁹ A-wen-dəḡ a fäl inna Məssinəḡ dəḡ-təmyəre n-sərho-net:
<Ad-sär-sən-dd-šəmmişələḡ ännəbitän
d-inəmmušal əjjootnen,
ad-əjən iman iyyäd dəḡ-sən,
əqquzzəbun wi iyyädnen.>

⁵⁰ Han iman n-ännəbitän wi əba ḡur-sənto n-əddunya har əšäl-i-dəḡ dəḡ-käl-əzzurəyät-tə-dəḡ,

⁵¹ issəntä-dd a-wen ḡur-iman wi n-Xəbəllə-i əba s-tizarät fäll-əkall-i-dəḡ har iman wi n-Zəkəryə wə n-əmənokal n-käl-tikutawen wə işrəyän s-inḡäl əšni-net dəḡ-əhän n-əmudd wə məqqārən, jer-edəḡg wə n-tikutawen d-edəḡg

wa šaddijän. Tidət, ässiilmädäx-käwän a-s äddinät-win-däx, eðmanän iman-näsän iket-däx-näsän däx-käl-əzzurəyät-ta-däx.

⁵² Iməskay käwäneð-i n-älyulam n-Ättäwrät! Təttafäm asäyar wa n-musnät mäšan, wär ləmmədäm, äddinät daχ wi ärhänen al mud, tənkažäm-asän-t.»

⁵³ A-s ifäl Yisa ehän-ənnin-däx, samädadän älyulam d-käl-faris fälla-s, tadjän-as isəstanän äjjootnen

⁵⁴ däx-otasän ad-t-səwwənnən a wärän oχed, i-ad-əjrəwän əsarū s-t-əssədlämän.

12

He käwäneð təlmənu fäxa!

¹ Darät-a-wen, täddew-dd tamətte-i-däx täjjet s-Yisa har dd-əqqimän äddinät tinməkukulän. Innä Yisa i-inəttulab-net s-tizarät: «Äjät ənniyät i-täzza ta n-təlmənu fäxa n-käl-faris.

² Wär t-illa a ättunkälän s-wädden ad-dd-infiləl, wär t-illa a iffarän s-wädden ad-dd-iffukkär.

³ A-wen-däx a fäl, a tənnäm däx-takše-däx, ad-dd-iffukkär, a täsmätäktäkäm däx-ammās n-ihənan-nəwän-däx, ad-t-səqqəyən äddinät fäll-afälla n-ihənan-näsän.»

Uksadät Mässinäχ wädden dägg-adəm (Mätti 10:28-33, 19-20; 12:32)

⁴ «Käwäneð-i n-imidiwän-in, ənneχ-awän: wär täksudäm dägg-adəm-i wären äddobät ar tenäχe n-taχəssa-nəwän, wär t-illa a äddoben səl a-wen-däx.

⁵ Äyyät-ahi ad-hawän-älläxex ere wa s-təlam s-ad-t-tuksädäm: Uksädät Mässinäx-i inaqqän, ila daḡ darät-a-wen tärna s-käwän-in-ijär dāḡ-žohännäma, tidət, ənta-en-dāḡ a-s lam s-ad-t-tuksädäm!

⁶ Ƴur-wän, wädden tössanäm a-s iba n-təfärre n-tošəmba a fäl hin-nazzän səmmos dāḡ-sän sänatät tammaten? Hakd a-wen-dāḡ, wär tän-ihä i hin-itatäwa Mässinäx,

⁷ wär tärmeḡäm, wäla amzadän n-eḡäf-näwän, ädinän, tojăräm abrək n-igdaḡ älqim.

⁸ Älleḡex-awän a-s ere äsjäyhän dägg-adəm a-s näkk a t-ilän, ad-äjjayhäḡ näkk-dāḡ i n-Ägg-ägg-adəm dat-änjəlosän n-Mässinäx a-s äwadəm-en, i-nin.

⁹ Ere daḡ wa hi-äkkuddälän dat-dägg-adəm, ad-t-əkkuddäläḡ näkk-dāḡ dat-änjəlosän n-Mässinäx.

¹⁰ Ere innän a läbasän dāḡ-isälan n-Ägg-ägg-adəm-dāḡ, äddobät ad-ijrəw tenäšše n-a-wen mäšan, äwadəm wa äskafärän dāḡ-isälan n-Unfas Šäddijän, wär-ilkem ad-has-in-ätiwänša.

¹¹ Afäl tämewäyäm s-äššäreḡa dāḡ-ihänan n-äddin wi n-käl-Älyähud, meḡ daḡ dat-käl-äššäreḡa d-əlxəkum, wär käwän-itäšəwwašet əmmək wa s-mad-təhələm iman-näwän wäla a-wa mad-tənnəm,

¹² afäl älwəqq wa d-taməjradäm, Unfas Šäddijän a käwän-e-isəḡrən ässaḡät-wen-dāḡ a-wa s-änihäjja s-ad-tän-tənnəm.»

Tärha n-härät sajrəw härät

13 Ijanna Ƴisa a-wen-däx a-s dd-iggäd äwadəm iyyän däx-tamətte, inn'-as: «Älɣalim, änn i-änŋa-x a dār-i uzan tākasit-nänäx.»

14 Inn'-as Ƴisa: «Ähaləs, mi hi-ijän älcqalli-näwän tuzanäx-awän tākasit.»

15 Inna Ƴisa i-tamətte darät-a-wen: «He käwäneq! Agəzät iman-näwän däx-tārha n-härät fäl-a-s, ägg-adəm, kud-ila härät-däx, wädden ärrəzäx-net a idmanän tämudre-net.»

16 Issäxläy-tän tangalt, inn'-asän: «Käla t-illa ähaləs n-amärrəzäx ilan išəkraš has-dd-izajjār älfäyda mäqqoorän.

17 Inhäy a-s ibbäxär hullan ɣas, iqqäl-dd ad-ijanna i-iman-net: «Näkk-i-däx, ma mad-äjäx, äbas leɣ edägg äwwayän öttäxam-in?»

18 Ij' äddäbara i-iman-net, innä: «Ad-ärzäx ijändän-in, sädəyäx i tän-ojärnen, sädwäx däx-sän älkäma-nin d-a-wa leɣ iket-net,

19 dihen, ad-ännäx i-iman-in: «Ya iman-in, sunfät, təkšəm, təzhəm däx-tänoflayt, itwar-awän ärrəzäx madän-äj iwətyan äjjootnen.»

20 Diha-däx d-issəmnda tənna n-a-wen, ad-has-innä Mässinäx: «Isəm n-enəbbeddöl, ad-käy-iba ehäq-i-däx, ɣas mi madän-ikus a-wa äjjen täsdäwäd?»

21 Šund a-wen-däx a madän-irməs ere ijmarän iman-net wär-iköttəw Mässinäx.»

*Iba n-ašəwwəš
(Mätti 6:19-21, 25-34)*

22 Innä Ƴisa darät-a-wen i-inəttulab-net: «A-wen-däx a fäl hawän-janneɣ: wär käwän-

järräwnet inəzjam n-a-wa mad-təksəm d-a-wa mad-təswəm d-a-wa mad-təlsəm.

²³ Iman-nāwān, ojarān tetäte; əssexät n-taxəssa-nāwān daχ, ojar isəlsa.

²⁴ Əkyədät χas dəχ-izuyaj, wär tədumun, wär təjclubun, wär len timšiten wāla ijändän məšan, əssodār-tän Məssinəχ, tufām-tän s-a əjjeen.

²⁵ Əndek χas dəχ-wān wa əddoben s-inəzjam-net, ad-isiwəđ taχrəst-net wāla s-a ogdähän d-emm n-asənnan?

²⁶ Šamad a ogdähän d-a-wen-dəχ təmmətkit wär t-təddobem, adiš ma dəχ-tozarām dəχ-a-wa səl a-wen?

²⁷ Əkyədät χas dəχ-tadāwla n-təboyt: wär zətt, wär zəmməy məšan, wäl' əmānokəl Sulāyman hək terše-net iket-net, wär kāla ojar təboyt-i-dəχ asəssihəχ n-ašəl.

²⁸ χas kunta Məssinəχ isalsa teyəšše n-išəkraš s-ašəl-i-dəχ təbdaj, əšəkka ad-hin-tərx dəχ-efew s-əmmək-wen-dəχ, əb' əttāma n-ad-wär hawān-izzəzməy kəwāneđ. Təmmətkit ija immun-nāwān!

²⁹ Wär kəwān-daggəznet inəzjam n-a-wa mad-təksəm d-a-wa mad-təswəm.

³⁰ Hərātān-win-dəχ, kəl-əddunya a χallābān. Kəwāneđ, Abba-nāwān-i ihān isənnawān, wär t-illa a-s təmiχatārām s-wādden, issan-t.

³¹ Əmməχät s-tizarät i-Təmmənəya n-Məssinəχ, dihen, ad-hawān-in-iwwađ a-wa iyyəđän.

³² Tahrut-in ta əndərrät, wär tərməχām fəl-a-s, irha Abba-nāwān, ad-əj Təmmənəya-net dəχ-ifassān-nāwān,

³³ tužžärät-in a-wa läm, tæktəm-t i-tiläqqiwen, tøjəm i-iman-näwän azrəf iyälälän d-ijändän s-wär-ixəššəd a-wa dəx-sän itwārän ed išənnawän, wär tän-hen imäkrädän wäla temedhe.

³⁴ Tidət-dəx a-s inəzjam n-ulh n-äwadəm, wär təffilän dihad itwär təla-net.»

Änaxdim wa oläxän d-wa läbasän

³⁵ «Çaymät tasidäwäm, tøjbasäm, tässiryäm tiftəl-näwän.

³⁶ Alähät d-inaxdimän əqqalnen i-mässi-sän dd-ifalän azli s-tišrayät n-ehäd s-ad-dd-itis ças, oran-as emm n-ehän.

³⁷ Təndəđ i-eklan-en-dəx dd-mad-agəz mässi-sän okayän ässaçät s-tän-dd-osa-dəx. Äsidätteç-awän a-s afäl tän-dd-osa, ad-ijbəs ənta iman-net, isäqqaym'-en, isəmmənsəw-tän.

³⁸ Jer-iqqäl-dd s-tišrayät n-ehäd wäla s-emäçär, təndəđ i-inaxdimän-wi dd-mad-agəz okayän.

³⁹ Wädden käwäneđ iman-näwän təssanäm a-s ənnär issan mässi-s n-ehän ässaçät wa s-t-dd-itis emäkräd s-ehäd i-ad-ärz ehän-net, iket-di, wär-itəttəs i-ad-has-ärz emäkräd ehän-net.

⁴⁰ Käwäneđ-dəx, çaymät täsidäwäm, täçtafäm ed Ägg-ägg-adəm, ad-dd-ass s-ässaçät d-wär fälla-s jem.»

(Mätti 24:45-51)

⁴¹ Iggäd-dd Bətrus, innä i-Çisa: «Älyalim, näkkäneđ ças a tässiçläyäd tangalt-ta-dəx meç nohar-tät d-äddinät-wi iyyäđnen?»

⁴² Inn'-as älyalim Yisa: «Ëndek äanaxdim wa n-ägg-ärkäwäl ijarahän härät? Ënta-en-däx a mad-isäxlöf mässi-s ehän-net i-ad-ituzan imönsiwän i-inaxdimän-wi iyyädnen.

⁴³ Təndəd i-akli wa dd-mad-agəz mässi-s äddunkät däx-älxidmät wa däx-t ija, älwäqq s-t-dd-osa-däx.

⁴⁴ Äsidättey-awän a-s wen ənta, ad-t-isäxlöf mässi-s ehäre-net iket-net

⁴⁵ məšan, äanaxdim wa innän däx-iman-net: <Näkk, mässi-x ähoja-hin fäll-i>, oða qarät-a-wen däx-inaxdimän d-tinaxdimen ti iyyädnen, ad-tän-itəggat, itatt, isass əlxəmər har t-ijmäđ ənniyät,

⁴⁶ äanaxdim-en, ilkam ad-t-dd-iydär mässi-s däx-aşäl d-ässäxät d-wär fälla-s ija, ilməd s-erk əşşäxəl wa t-işlän a ija a-wa-däx; afäl t-dd-osa, ad-t-iqquzzəbət, isärtəy-t d-inämäşrayän däx-edägg wär-iha ar tahäla d-azəmmäkärkəz n-isenän fäl tämujrizt.

⁴⁷ A-wen-däx a fäl äanaxdim-wa issanän erhet n-mässi-s, äqqima wär t-ija, əlkamnät däx-s tiwit äjjootnen

⁴⁸ məšan, äanaxdim-wa wärän issen erhet n-mässi-s, ija a wärän oxed, ad-ijrəw tiwit wären əjjət. Ere ijrawän a äjjen, ad-däx-s itwəttar a äjjeen, ere ixlafän a mäqqoorän, ad-däx-s itwəttar dəx ad-dd-ikkəs a mäqqoorän.»

Işmal n-äzzäman

(Mätti 5:25-26; 10:34-36; 16:1-4; Marqəs 8:11-

13)

49 Inn'-asän Yisa darät-a-wen: «Oseḡ-dd i-ad-särḡäḡ efew fäll-äkall, äsidärhänäḡ a-s äru d-irḡa.

50 Ilkam dāḡ-i atwəsəlmaḡ s-wär mad-sunfäḡ fāw wär-ija.

51 Ak täḡeläm älḡafyät a-s dd-oseḡ i-ad-t-äkfäḡ i-äkall? Abo, ənneḡ-awän, täbədḡawt a sär-s dd-äwwäyāḡ.

52 Ḣur-ašäl-i-dāḡ, wäla-dāḡ ehän han səmmos äddinät, ad-ənmeḡšärän jer-iman-näsän, ad-əššunjun wi n-käraḡ wi n-əssin, əššunjun daḡ wi n-əssin wi n-käraḡ.

53 Ad-ibḡəw abba d-rure-s, ibḡəw alyad d-ti-s, təbḡəw anna d-elle-s, təbḡəw talyadḡ d-ma-s, təbḡəw taḡäggalt d-hänne-s n-rure-s, təbḡəw tamadḡ d-taḡäggalt-net.»

54 Innä Yisa daḡ i-tamətḡe: «Wädden e-d tənḡäyäm tejäräkt təzjar-dd s-emäynäj, ad-tənnəm: <Os'-anāḡ ajənna>, äj a-wen s-əmmək-wa-dāḡ s-tän-tənnäm;

55 e-d tənḡäyäm daḡ aḡu wa dd-ihan s-afälla, ad-tənnəm: <Ilkam dāḡ-nāḡ ašäl äkkuusän>, äj a-wen s-əmmək-wa-dāḡ s-tän-tənnäm.

56 Älmunafexän a tämoosäm! Käwäned-i əssännen teḡäre n-išmal wi n-išənnawän d-äkall, uhən-dāḡ, indar-awän ad-təfhəmäm äzzäman wa fälla-wän ijän ašäl-i-dāḡ.

57 Mafäl wär täddobem ad-təlmədäm ḡur-iman-nāwän iji n-a-wa olāḡän?

58 E-d käy-iyra ere käy-äsiwārän uḡlem s-äššäreḡa, əttär əmmək s-där-s tänmäknäd härwa wär hin-tāwweḡäm ehän wa n-äššäreḡa, dihen, wär mad-käy-irməs ägg-äššäreḡa, äj'-ik

däḡ-ifassän n-əlxəkum ed, əlxəkum afäl təjjäšäd ifassän-net, ad-käy-äj däḡ-takärmüt.

⁵⁹ Äsidätteḡ-ak a-s edägg-en, wär mad-t-dd-təzjāräd a təkäsäd wär zeläd har tämma ta käy-irwäs.»

13

Utabät iket-di!

¹ Ämmiijräd ʒisa härwa a-s t-dd-osän äddinät has-jännen isälan n-aḡaras wa ija Bilatəs wa n-ämänokal n-teje ta n-Älyähudəyät i-meddən n-Galila təzzar, issärtäy ašni-näsän d-wa n-tikutawen-näsän.

² Inn'-asän: «Ak tordam a-s käl-Galila win-däḡ ənhaynen tamättant-ten-däḡ səmmät, ojarän käl-Galila-wi iyyäḍnen tumast n-inäsbäkkadän?

³ Fäw, mäšan, äsidätteḡ-awän käwäneḍ-däḡ, a-s afäl wär tätubäm, ad-təjəm tamättant šund-ten-däḡ.

⁴ Meḡ daḡ tordam a-s meddən wi n-märaw d-əttam hānen Yārussālam fäll-dd-oḍa äḡalla wa n-täsahaḡt ta s-itawänna ta n-Silwi inḡ'-en, tordam a-s ojarän käl-Yārussālam wi iyyäḍnen tumast n-inäsbäkkadän?

⁵ Fäw, mäšan, äsidätteḡ-awän daḡ a-s afäl wär tätubäm, ad-təjəm tamättant šund-ten-däḡ jän.»

Tangalt n-ahəšk-wa wärän infa härät

⁶ Issäyläy-tän-dd daḡ tangalt tiyyät däḡ-hasän-innä: «Kāla äddomät ähaləs ašar däḡ-ašəkrəš-net n-läḡnāb, iwwäḍ-dd äzzāman n-tirwe-net

ɣas, osă-dd i-ad-dăɣ-s ijrəw a lăn aratăn măšan, wăr t-illa a fälla-s ijrəw.

⁷ Innă i-ănaxdim n-ašəkrəš: <Awătay wa s-kărăđ da-dăɣ tisăɣ-dd, jarăɣ ätṭăma n-ad-əjrəwăɣ aratăn dăɣ-ašar-wa-dăɣ măšan, wăr t-illa a t-dd-ijammăđăn, ämăra, äxtəs-t-in ed, äsinăkmăm edăgg bännan.>

⁸ Inn'-as änaxdim: <Măssi-ɣ, ärheɣ dăɣ-k ad-t-təyyəd tene-ta-dăɣ ɣas, ad-äɣəšăɣ dawa-s, äjăɣ dawa-s ädanda,

⁹ iha miši s-awătay wa dd-imalăn, ad-ikrəš aratăn, afăl wăr-ija a-wen, äxtəs-t-in.> »

Äzozăy Țisa tamăđt äsikărănbăy Iblis dăɣ-ašăl n-əssəbət-i n-tăsonfat

¹⁰ Ašăl iyyăn n-əssəbət, isayra Țisa dăɣ-ehăn n-ăddin wa n-kăl-Ălyăhud.

¹¹ Təll'-e dihen tamăđt lat mărəw iwətyan d-əttam itṭaf-tăt alšin tăt-äsikărănbăyăn har äbas täddobăt iqqud n-tebădde-net.

¹² Inhăy-tăt Țisa, iɣr'-et, inn'-as: «Tamăđt, äłɣib-năm, təbđed dăr-s.»

¹³ Äswăr-tăt ifassăn-net, toɣăd tebădde-net älwăqq-wen-dăɣ, ad-tiiməl Măssinăɣ.

¹⁴ Inhăy älfăqqi n-ehăn n-ăddin a-s äzozăy-tăt Țisa dăɣ-ašăl n-əssəbət ɣas, ijjäš-t älhăm fälla-s, inna i-tamətte: «Ajăn wădden sădis išilan a t-əllanen i-äłxidmăt, tisăt-dd dăɣ-išilan-win-dăɣ, təyyəm-dd ass ašăl wa n-əssəbət-i n-tăsonfat.»

¹⁵ Äwwežăb-as Țisa, inn'-as: «Ămunafeyăn, ajăn ih'-iwăn-i s-wădden itir awdes-net meɣ ešed-net dăɣ-ašăl n-əssəbət i-ad-t-išrəj?

16 Ma hawän-ijrawän, ad-təfhämäm ašäroj n-awdes-näwän meḡ ešed-näwän dəḡ-ašäl n-əssəbət-i n-täsonfat, a-s ija a-wen, indar-awän, ad-təfhämäm azuzi wa jex i-tahäyawt-ta-dəḡ n-Ibrahim lat märaw iwətyan d-əttam iṭṭaf-tät Iblis dəḡ-tišəm-net.»

17 Innä ʔisa a-wen ḡas, təlsa təkrakiḡt imiksänän-net iket-näsän, təqqäl-dd tamətte ənta, täddiiwät dəḡ-təssəba n-timašalen-ti əhuskätnen itäj.

*Tangalt ta n-temätäwt d-täzza
(Mätti 13:31-33; Marqəs 4:30-32)*

18 Inna ʔisa daḡ: «Ma där-toläh Təmmənəya n-Mässinäḡ? Ma där-tät-mad-səssiləhäḡ?

19 Toläh d-temätäwt-ta tojərät təmmətkit äddomät əwadəm dəḡ-ašəkrəš, tədwäl-dd, təqqäl ahəšk, ad-ḡattän igdəḡ iskak-näsän dəḡ-iləktan-net.»

20 Inn'-asän daḡ: «Ma där-e-səssiləhäḡ Təmmənəya n-Mässinäḡ?

21 Toläh d-takməttet n-täzza təssärtäy taməḡt d-käraḡ ännäfəḡatän n-ejel n-älkäma i-ad-ikəf iket-net.»

*Emm wa kärruzän itiyədän s-älžännät
(Mätti 7:13-14, 21-23)*

22 Ifäl ʔisa dihen ḡas, ällil iḡərman d-tidbi iket-näsnät, isayra äddinät, ija tabarät ta n-Yärussalam.

23 Iḡla a-s has-innä əhaləs iyyän: «Äḡalim, wädden äddinät wi maden-əjjəš älžännät, wär-əjjətän?»

24 Innä Ƴisa i-tamøtte: «Bällänät i-ad-tøjjäšäm s-aššahät tämudre ta n-tidøt s-emm wa kårruzän fäl-a-s, äsidätteḡ-awän a-s äddinät äjjootnen, ad-øttärän uješ-net mäšan, ad-hasän-indär.

25 Afäl iyfäl mässi-s n-ehän tashärt n-ehän fäll-iman-net, ad-dd-tøbdødäm data-s ad-tät-takawkawäm, ḡarräm-t, jannem-as: «Mändam, mändam! Arr-anäḡ-in emm n-ehän» mäšan, ad-hawän-änn: «Äḡafyät-näwän, wär käwän-øzzeyäḡ, wär øssenäḡ øndek siha s-dd-häm;»

26 tønnem-as daḡ: «Ajän wädden, nohär dār-k išəkša d-isøswa, tøssäḡräd däḡ-tišarriten n-iḡärman-nänäḡ?»

27 Mäšan, ad-hawän-änn: «Ya inäsbäkkadän-i-däḡ, näkk ya wär käwän-øzzeyäḡ, äjəjat-ahi.»

28 Ašäl-wen-däḡ, ad-täj tahäla d-azømmäkärkøḡ n-isenän fäl tämujriḡt, ed ad-tønhøyäm Ibrahim d-Isxaqq d-Yaqub d-ännäbitän iket-däḡ-näsän äqqiimän däḡ-Tømmønøya n-Mässiinäḡ, a-s ija a-wen käwäned, ejer a-hin-mad-tøtwøjjøem däḡ-žohännäma.»

Täḡart-ta jän ulhawän n-käl-Yårussälam

29 «Ašäl-en, ad-dd-øfəløn äddinät emäynäj d-atäram d-afälla d-ajus, äḡøymøn däḡ-amäjaru wa madän-äj däḡ-Tømmønøya n-Mässiinäḡ.

30 Ašäl-en, ønhøywät! Wi hänen ajilal, ad-izarän, wi äzzarnen, ad-øjjøšan ajilal.»

Tälläbäst ta ija Harudø (Mätti 23:37-39)

31 Ohäzän-t-dd härät däḡ-käl-faris, ønnän-as: «He käyy, jawäd fäl-a-s, irha Harudø ad-äj iman-näk.»

³² Inn'-asän: «Äglät, ännät i-isəm n-ebägg-di a-s näkk, takkäsäx alšinän däx-äddinät, zizuyäx ašäl-i-däx d-ašəkka, ašäl wa s-käraḍ, ad-imdəw a-wa hi-išlän.

³³ Äduuttät a-s əkkeḡ Yärussäläm ašäl-i-däx d-ašəkka d-ašäl-wen fäl-a-s, wär-ämmukkän ad-ib' ännäbi däx-edägg säl Yärussäläm.»

Ilha Үisa fäll-Yärussäläm

(Mätti 23:13-39)

³⁴ Innä Үisa: «Yärussäläm, ya Yärussäläm! Tamäskoyt kämm-i täjjät iman n-ännäbitän, hakkäd sämmäjori n-tihun inəmmušal wi särm dd-ašmašäl Mässinäx, əndek ɣas a-wa-däx wär jeḡ däx-utär n-asdu n-imuzäḡän-näm šund a-wa täjj tekäzzit i-ikärtän-net daw-tafriwen-net mäšan, төссəndäräd-ahi.

³⁵ Ämära, isälan əmdän, ad-käwän-äyy Mässinäx d-iman-näwän, umas aɣrəm-näwän timšar, wär-ilkem ad-hi-tənhayäm hundäx har ašäl wa d-mad-taləsäm tənna n-a-s: <Näkfet wa dd-osän däx-isəm n-Emäli semɣar.> »

14

Äzozäy Үisa ähaləs s-äsiläfafäḡnät tikussawen eläm-net

¹ Ašäl iyyän daḡ n-əssəbət-i n-täsonfat, ikla Үisa ɣur-iiyän däx-imänokalän n-käl-faris, jan-as dihen äddinät iket-näsän ənniyät.

² A əndärrän ähaləs iyyän da-däx s-äsiläfafäḡnät tikussawen taɣəssa-net iket-net,

³ issəstän Үisa käl-faris d-älɣulam-wi t-əllänen dihen: «Ak xälal meɣ xəram, ad-izuzəy äwadəm ämarhin däx-ašäl n-əssəbət-i n-täsonfat?»

4 Wār t-illa a has-ənnan ɣas, idās āmarhin, āzozäy-t, issəgl'-e.

5 Inn'-asän ɖarät-a-wen: «Ēndek dāɣ-wän wa s-afäl oɖa rure-s meɣ awdes-net dāɣ-anu ašäl wa n-əssəbət-i n-tāsonfat ad-t-äyy dāɣ-s har akəy ašäl-en təzzar?»

6 Äbä-hasän-dd a has-ənnän.

Asrəs n-iman d-imäjarän

7 Ijräh-in ʏisa asənnəfrən wa täjjän imäjarän i-idäggan wi ännufläyenen dāɣ-ehän ɣas, issäɣläy äddinät-wi dd-əklänen dihen tangalt, inn'-asän:

8 «E-d kəwän-äsmäjarät äwadəm s-edägg n-aɣli, wār täsnäfränäm idäggan-wi t-əllänen s-data ed, äddobät ad-dd-ass äwadəm kəwän-ojarän atwəsəmyär,

9 änn'-awän mässi-s n-ehän, ad-tənkäräm, təkfəm-t edägg. Ad-hawän-umas a-wen täkrakid̄t ed, ad-kəwän-təhhuššəl tebädde dat-äddinät iket-näsän, täqqəlām ɖara-sän.

10 Ufa a-s kəwän-dd-äsmäjarät äwadəm, ad-təkkəm ɖarät äddinät iket-näsän, täqqayməm, dihen, afäl dd-ijjāš mässi-s n-ehän, inhäy dihad täqqimäm, ad-kəwän-dd-iɣär, änn'-awän: <Ĥyyäwät, ɣaymät s-data.> Ad-hawän-umas a-wen semɣar mäqqoorän dat-äddinät wi dār-täniɣäymäm.

11 Ere idkälän iman-net ad-irəs, ere äsräsän iman-net, ad-itwəsəmyär.»

12 Innä ʏisa ɖarät-a-wen i-u-faris wa t-dd-äsmäjaren: «E-d dd-simjurud äddinät s-ehän-näk, s-ašäl wäla s-ehäɖ, wār dd-täsmäjared

imidiwän-näk d-ayətma-k d-išäqqayän-näk d-änhäräjän-näk wi länen härät fäl-a-s, ɵntäned, äddoben ad-hak-dd-suxələn azäbäna,

¹³ änn-ak, e-d, tärhed asəmməjəru n-äddinät, äğär-dd tiläqqiwen d-imäsjetäğän d-inəbdan d-iməddoryal.

¹⁴ Təndəd-ak ed, ɵntäned wär-äddoben ad hak-əzələn älxer wa hasän-jed, Mässinäğ a çurhak-t-əllan imraš n-a-wa jed ašäl wa n-tebädde.»

Isälan n-aməjaru wa mäqqārän
(Mätti 22:1-10)

¹⁵ Isl' iyyän däğ-iməjarän i-a-wa inna Ƴisa ças, inn'-as: «Təndəd i-ere wa madän-äkš däğ-imjora-wi madän-äj däğ-Təmmənəya n-Mässinäğ.»

¹⁶ Inn'-as Ƴisa: «Käla t-illa ähaləs ijän aməjaru-i-däğ mäqqārän, äsməjarät-dd sār-s äddinät äjjootnen.

¹⁷ Ämmujnen imənsiwän ças, äšmašäl änoxdim-net s-äddinät wi dd-içra i-ad-hasän-änn: «Härätän ämmujnen, täwwäğäm-anäğ»

¹⁸ mäšan, ässälhän-as isoran iket-däğ-näsän. Inn'-as wa äzzarän: «Iket əžžənšäğ ašəkrəš, ärheğ ad-t-asäğ, ənhəyäğ-t təzzar, äns'-ahi-dd.»

¹⁹ Inna wa iyyädän: «Iket əžžənšäğ mərəw iwdesän-wi s-mad-äxdəmäğ išəkraš-in, ärheğ ad-tän-arəmäğ təzzar, äns'-ahi-dd.»

²⁰ Inn'-as wa s-kəraq: «Iket dd-əzzəzläyäğ, wär-äddobəğ ad-hin-asäğ.»

²¹ Iqqäl-dd akli, ij' isälan i-mässi-s ças, ijjäš-t älhäm fäll-äddinät-win-däğ; innä i-änaxdim-net ämära: «Ašəl šik, ilal tišarriten, təlwəyäd-

dd tiläqqiwen d-inax̄yabän d-imëddoryal d-imäsjätäx̄än.>

22 Igl' äanaxdim, iqqäl-dd, inna i-mässi-s: <Mässi-x̄, a-wa tønneð ija mäšan, ehän, ih' e edägg härwa.>

23 Inn'-as mässi-s: <Ëqqel šik, ilal tišarriten, äkk attayän n-ifərjan, šəhhəššəl äddinät ad-dd-asən i-ad-idnəy ehän-in.>

24 Ëdmanäx̄-awän a-s meddөн-winnin-däx̄ dd-äsmäjärey s-tizarät, wär tän-e-ijjəš-i madän-ikrəbbət imənsiwän-in.> »

Älqim wa ihän alkum i-Yisa

25 Innäð-dd Yisa s-tamətte ta täjjet has-təlkämät, innä:

26 «Ere irhän alkum-hahi, a-s ija a-wen, wär tojer tärha ta hi-ija ta ija i-abba-net, d-anna-net, d-hänne-s, d-aratän-net, d-ayətma-s, d-šätma-s d-iman-net, wär-äddobät ad-umas änätṭalib-in.

27 Ere wärän äsdäw i-alənji n-tajəttewt-net ta n-tamättant i-ad-hi-ilkəm, wär-äddobät ad-umas änätṭalib-in.

28 Ëndek däx̄-wän wa s-wädden afäl irha edey n-ehän, ad-äqqayəm təzzar ixseð älqim n-a-wa däx̄-s mad-äkš təzzar isänt edey-net,

29 afäl wär ija a-wen, ad-isänt ässas n-ehän, indär-as ad-t-in-isəmdəw, əjən-t äddinät tadäzza

30 ed, ad-ənnən: <Wa äwadəm, issəntä edey n-ehän, indär-as ad-t-in-isəmdəw.>

31 Ajän wädden e-d irha ämänokal ad-ijäd amidi-net, ad-issən äddobät ad-ikrəš fälla-s ašäl ənta-i ilän märaw afdän n-ähaləs fäll-ämänokal wa dār-mad-iknəs-i ilän ənta sänatät timərwen n-efäð n-ähaləs.

³² Afäl inhäy a-s a-wen wädden a där-äddobät amjār, ad-išəmmišəl sār-s älžāmaḡāt n-älxer, ittār dāḡ-s əmmək n-älḡafyāt härwa-dāḡ ogaz.

³³ A-wen-dāḡ a fäl hawän-janneḡ, ere wa dāḡ-wän wārän iksen a-wa ila iket-net, wār-äddobät ad-umas änätṭalib-in.

(Mätti 5:13; Marqəs 9:50)

³⁴ Tesəmt, härät olaḡän māšan, afäl tät-təjmäd temde-net, ma s-tät-e-isəsməm əwadəm?

³⁵ Ad-ābas tənfa ākall wāla ādanda, ad-hin-tädf ḡas.

Ere ilän timəzzujen s-islä-dāḡ, isājdet!»

15

Tehäle ta āba, tətṭəjrāw-dd

(Mätti 18:10-14)

¹ Tisən-dd inarmasän n-tiwse d-erk äddinät äjjootnen ḡisa i-ad-has-əslən.

² Ənhäyän käl-faris d-älḡulam n-Ätṭäwrät a-wen ḡas, ad-simtəktikän, jannen: «Ak, təjrahäm-in anḡim d-tihra ta itäj d-erk äddinät?»

³ Issäḡläy-tän-dd ḡisa tangalt dāḡ-hasän-inna:

⁴ «Əndek dāḡ-wän wa s-afäl ila temede n-tehäle har dāḡ-snät tässujjäl tiyyät, wädden ad-äyy ti n-təzzayät timərwen d-təzzayät əfradnät, igləw, isəssəjjəl ta dāḡ-s āba har tät-dd-ijrəw?

⁵ Afäl tät-dd-ijrəw, ad-tät-isəwār iḡerhan-net ikna tedāwit,

⁶ afäl hin-iwwäḡ ihānan, ad-dd-iḡär imidiwän-net d-änhārajän-net, änn'-asän: <ḡyyäwät, ährät där-i tedāwit, tehäle-nin ta tässujjälät, əjrəwäḡ-tät-dd.>

⁷ S-ömmök-wen-däx day a fäl, ässiilmädäx-käwän a-s, ad-tajär tedäwit ta madät-täj däx-išənnawän däx-təssəba n-iyyan anəsbäkkad ätubän, uhən i-təzzayät timərwen n-äwadəm d-təzza gur-ija a-s, wär-ämyatärän s-tätubt.

Ärriyal wa äba, ittəjräw-dd

⁸ Wädden day afäl la tamädt märaw ärriyalän n-azrəf hundäx har däx-sän äb' iyyän, ad-särməs tefätelt, ad-tišriwit äkall n-ehän, tiskənsəkit-t hundäx har dd-təjrəw ärriyal-net wa äba?

⁹ Afäl t-dd təjräw, ad-dd-sədəw timidiwen-net d-tänhäräjen-net, tänn'-asnät: <Ahärmät där-i tedäwit, ed ärriyal-in wa äba, əjräwäx-t-dd.>

¹⁰ A-wen-däx a fäl hawän-älleyex a-s, tämoos tätubt n-anəsbäkkad iyyän əssəbab n-tedäwit mäqqoorät i-änjəlosän n-Mässinäx.»

Ämawađ wa äba, ittəjräw-dd

¹¹ Inn'-asän Ƴisa day: «Käla t-illa ähaləs ilan əssin aratän.

¹² Ašäl iyyän, osä-dd wa əndərrän ti-s, inn'-as: <Abba, akf'-ahi ejädär-in däx-täkasit.> Äzun ti-sän a-wa ila jere-sän.

¹³ Härät n-išilan qarät-a-wen, ättužžär-in wa əndərrän ejädär-net, irmäs azrəf-net, ikk' äkall iyyän ujęän, ällil izəjraz n-iman-net, ad-ibaxxäs a-wa ila.

¹⁴ Älwäqq wa d-ikkəykäy a-wa ittäf, ođä-dd laz fäll-äkall wa iha iket-net, toxäy-as tämäxatert.

¹⁵ Iгла, ixdam gur-iyyan däx-käl-äkall, ässok'-e ägg-äkall išəkraš-net i-ad-däx-sän idən əlxənžärän.

16 Ij'-as laḡ asəmmänənnäd wa-däḡ fäl dd-
iqqäl isadärhan tetäte n-išəkša-wi-däḡ tattän
əlḡənžärän mäšan, wär t-ikfa mässi-sän
turhajät n-a-wen.

17 Eqqälän-t-dd iman-net ašäl iyyän,
äznäzjamät, innä: <Näkk-i-däḡ, ma hi-ijän
däḡ a-wa? Ajän wädden a-wa ila abba-nin
däḡ-inaxdimän ijarräw a ikša har t-isəssikəy,
uhən-däḡ näkk, näkk-da-däḡ, isimmənniḡ-ahi
laz;

18 äddäbara, ad-ənkäräḡ, äqqələḡ abba-
nin, ännäḡ-as: Abba, änmäšräyäḡ i-Mässinäḡ,
äbodäräḡ-käy,

19 äbas äniihäjjäḡ d-ad-itwənn rure-k a
ämoosäḡ, äj'-ahi iyyän däḡ-inaxdimän-näk.>

20 Ibdäd, iqqäl äkall wa iha ti-s. Ikkä-dd ehän
däḡ-ijəj a-s t-ojja ti-s, täḡ'-e tähanint-net, ošäl
sär-s, or'-as ifassän-net, oḡä däḡ-sän, ad-t-itisəs
däḡ-ijərjar-net, itiməllut-as.

21 Innä alyaq älwäqq-wen i-ti-s: <Abba,
änmäšräyäḡ i-Mässinäḡ, äbodäräḡ-käy, äbas
äniihäjjäḡ d-ad-itwənn näkk rure-k.>

22 Ixrä-dd ti-s inaxdimän-net, inn'-asän:
<Ašəlät tärmaq, awəyät-dd anäkäbba wa ufän,
təjəm-as-t, äjät tadhot däḡ-assəkäḡ-net, təkfəm-
t tifädelen äynaynen,

23 ärməsät-dd ašjär wa ojarän tadhont,
täḡrəsäm-as, äjet amäjaru d-äzzäho

24 fäl-a-s rure-ḡ wa s-käla ämmut iddär-dd,
käla ässujjal mäšan, ittəjräw-dd.> Essəntän
eqqas d-tiḡləla älwäqq-wen-däḡ.

25 A-s itäj a-wen, rure-s wa n-teḡäfädde ih'

išəkraš. Ikka-dd dihen a-s isla i-tandiwen d-tihärdänen d-isuhaḡ əkkan išənnawän,

²⁶ iḡrā-dd iyyän dəḡ-inaxdimän, issəstän-t d-a-wa ijän,

²⁷ inn'-as änaaxdim: <Äñña-k, ad-dd-iqqälän, inḡ'-as ti-k ašjār wa iddären ed, iqqäl-t-dd rure-s, iddar-iḡlas.>

²⁸ Ojäl, unjäy s-ad-dd-ijjəš ehän. Ikk'-e-hi-dd ti-s, ad-t-isalḡad.

²⁹ Inna i-ti-s: <Wädden näkk, a ilan iwətyan əšḡaläḡ-äk, wär kälä änmäšräyäḡ i-a hi-tənned mäšan, wär kälä hi-təkfed wälä dəḡ-eḡäyd s-əkley näkk d-imidiwän-in

³⁰ mäšan, iqqäl-dd rure-k wa hin-ibxäsän azrəf-näk dəḡ-tälkäxbaten ḡas, täḡräsäd-as i-ašjār-wa iddären.>

³¹ Inn'-as ti-s: <Alyad-in, käyy, wär kälä hi-fäläd, a-wa əley iket-net i-näk

³² mäšan ašäl-i, äniihäjja s-ad-näj amäjaru d-äzzäho, fäl-a-s äñña-k wa s-kälä ämmut, iddär-dd, kälä ässujjäl mäšan, ittəjräw-dd.> »

16

Änazraf-wa wär təha tafləst

¹ Innä ḡisa dəḡ i-inəṭṭulab-net: «Kälä t-illa ähaləs n-amärrəzäḡ dd-osän äddinät, əjän dəḡ-s isälan n-əmmək wa s-ibaxxäs änazraf-net ehäre-net.

² Issäḡr'-e-hi-dd, inn'-as: <Käyy, ma ämoos a-wa salläḡ fälla-k? Siḡən-ahi ehäre-nin ed, äbas ärheḡ əššäḡəl-näk.>

³ Innä änazraf älwäqq-wen-däx däx-iman-net: <Endek a-wa mad-äjäx afäl hi-ikkäs mässi-χ däx-älxidmät? Ajäyak n-išəkraš, wär t-äddobex, tamädilt day täsikarakäḍ-ahi.

⁴ Ḥssanäx a-wa he-äjäx s-kud-däx ikkäs-ahi mässi-χ däx-əššäxəl, ad-hi-siməjurun äddinät däx-ihānan-näsän>.

⁵ Issäxrä-dd äddinät wi irwäs mässi-s iket-näsän, innä i-wa äzzarän: <Käyy, maniket käy-irwäs mässi-χ?>

⁶ Inn'-as: <Temeḍe n-bärgo n-əzzäyt>. Inn'-as änazraf: <Täkarḍe-näk da ta n-ämarwas, xayəm, əktəb šik fälla-s, səmmosät timərwen n-bärgo.>

⁷ Innä i-wa iyyädän: <Käyy-i-š, ma käy-irwas mässi-χ?> Inn'-as: <Temeḍe n-šaku n-älkäma.> Ikf'-e-hi-dd ənta-däx älkaḍ-net wa n-ämarwas d-aḡänib, inn'-as: <Əktəb: əttamät timərwen n-šaku.>

⁸ Islä mässi-s n-ehäre i-amsud n-änazraf-net xas ad-t-itiməl.» Inna Ḷisa daḡ: «Äduuttät a-s inəzzulam† n-äzzāman-i-däx, ojarän imakṣaḍän n-Mässinäx amsud.»

Iba n-abāxas n-ehäre

⁹ Oläs daḡ, inn'-asän: «Äjät imidiwän s-ehäre wa xāramän n-wälät-äddunya-ta-däx n-ämāra, dihen, afäl fälla-wän tät-äba, ad-təjrəwäm irošan n-a-wen däx-tämudre ta täxlälät.

† **16:8 16:8** – Ḷur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

10 Wa ixdälän däḡ-a-wa wärän färör, ad-iḡdöl daḡ däḡ-a-wa äjjen, wa wärän iḡdel däḡ-a-wa wärän färör, wär mad-iḡdöl daḡ däḡ-a-wa äjjen.

11 Afäl wär täḡdeläm däḡ-ärrözäḡ wa xäramän n-äzzäman-wa-däḡ wärän infa härät, mi käwän-madän-isäḡləf ärrözäḡ wa n-tidət ihän äddunya ta təl kämät.

12 Afäl wär täḡdeläm däḡ-ehäre n-äddinät wa käwän-össäḡläfän, mi käwän-madän-isäḡləf wa mad-təkrəšäm däḡ-äddunya-ta dd-malät.

13 Wär t-illa änaxdim äddooben ad-iḡdam i-össin imälan; iyyät-i-däḡ, ad-akəḡ d-iyyän, ärh wa iyyäḡän, meḡ daḡ, ikf'-iman-net i-iyyän, iksən wa iyyäḡän. Wär-äddobät äwadəm ad-iḡdam i-Mässinäḡ, ošal daḡ ḡarät terše n-azrəf.»

Äsmäqqa ḡis fäll-käl-faris

14 Ija ḡisa mäjräd-wen-däḡ ḡas, jän-t käl-faris tekäškäšt ed, əntänəḡ əknan tärha n-azrəf.

15 Inn'-asän ḡisa: «Käwänəḡ, jam iman-näwän äddinät oḡadnen dat-dägg-adəm, mäšan, Mässinäḡ issan a-wa ihän ulhawän-näwän fäl-a-s, a-wa äsihäskən dägg-adəm, tajləlheyḡ xur-Mässinäḡ.

16 Äzzäman wa n-alämär wa n-Mosa d-əlkəttabän wi n-ännäbitän, ibdäd xur-ännäbi Exya wa Enəsselmäḡ, a ija a-wen-däḡ, titwəjjin isälan n-Älənžil wa n-Təmmənəya n-Mässinäḡ, tattärän äddinät uješ-net s-äššahät-näsän.

17 Ojär täräḡse ija ad-iba išənnawän d-äkall uhən, ad-iba wälä-däḡ tätbäqqet tiyyät ḡas däḡ-alämär n-Mässinäḡ.

18 Ere hin-äzmäzzäyän hänne-s, oläs adubən n-iiyät, ilmødet a-s izna, ere daḡ wa ädobänän tamädt dd-tämmizzäyät, ilmødet a-s izna ənta-däḡ.»

*Tangalt ta n-amärrəzäḡ d-Lazar wa n-taläqqe
(Mätti 19:1-12; Marqəs 10:1-12)*

19 Inn'-asän daḡ: «Käla t-illa ähaləs n-amärrəzäḡ s-hak asäl äsisahäḡ asäl däḡ-isəlsa wi äsmäḡmäḡnen, länen älqim, izha, ännufläy, äyyiwän.

20 A-s itäj a-wen-däḡ, ins' ähaləs n-taläqqe s-isəm-net Lazar dat-emm n-ehän-net, əlsanät tikussawen däḡ-iffay arəssuḡ eläm-net.

21 A-wa has-ija əlläqqu, isadärhan ad-äkš a-wa dd-ititrəkkın däḡ-imənsiwän wi itätt amärrəzäḡ mäšan, wär t-ijärrəw; äddeew-as a-wen d-afdärfädär wa jänät tikussawen fäll-tayəssa-net hundäḡ har dd-əqqälän iyyäḡan talläḡän-tänät.

22 Har asäl wa d-tämmut taläqqe, äwwäyän-tät änjəlosän s-Ibrahim däḡ-älžännät, ämmut amärrəzäḡ ənta-däḡ, izka.

23 Iha tisənsa ti n-žohännäma-en-däḡ ihannäy aḡäna a-s idkäl asəwaḡ-net, ojj' Ibrahim ill'-e Lazar edes-has.

24 Ad-iḡar Ibrahim, ijann'-as: <Y' Abba Ibrahim, aḡən-ahi tähanint, šəmmišəl-dd sār-i Lazar i-ad-isəlmäḡ emm n-assəkäd-net däḡ-aman, isəsmäḡ iləs-in fäl-a-s, äsräkättät-ahi efew wa heḡ.>

25 Inn'-as Ibrahim: <Alyaq-in, əktəw-dd a-s käyy, tärzäḡad hullan däḡ-tämudre-näk, a-s ija a-wen, Lazar, wär-inhey a säl aḡäna, ämära,

ənta a ässismäđän, ännufläy, a-s ija a-wen käyy, tiknənnəwid;

²⁶ đarät-a-wen daɣ, ill'-e eɣäy wärän ila ider jere-näɣ đär-wän, wär-äddoben wi n-ɣur-näɣ, ad-käwän-in-əkkən, wär-äddoben daɣ wi n-ɣur-wän, ad-hanäɣ-dd-əkkən kud-tärham-däɣ.>

²⁷ Inn' ähaləs ämära: <Adiš abba, daläɣ-käy d-ad-šəmmişəläd Lazar s-ehän n-abba-nin

²⁸ fäl-a-s, leɣ səmmos äŋɟatän i-ad-tän-isəmmətär, udaɣ ad-dd-əjjəšan edägg-wa-däɣ n-tissust.>

²⁹ Inn'-as Ibrahim: <Wädden lan Mosa d-ännäbitän-wi iyyäđnen, səjədnet-asän.>

³⁰ Inna i-Ibrahim: <Äbo! Abba Ibrahim, afäl tän-dd-iqqäl ere dd-inkarän jer-inəmmuttan, imməjräd-asän, ad-utabän.>

³¹ Inn'-as Ibrahim: <Afäl wär-äsjadän i-ännäbi Mosa d-ännäbitän wi iyyäđnen, wär mad-utabän kud-hasän-ija äwadəm dd-inkarän jer-inəmmuttan isälan-däɣ.> »

17

Anməšri d-əssəbab-net

(Mätti 18:6-7, 21-22; Marqəs 9:42)

¹ Innä ɣisa đarät-a-wen i-inəttulab-net: «Tanməšrayt, ad-tajj ɣas, mäšan, iməskay käl-əssəbab-net.

² Wa has-issəbäbän, iššäm-as-in, ad-tətwäqqən təhünt ta s-itəzzad älkäma dəɣ-err-net, itwəjär-in dəɣ-əjärew wa səmmän, uhən ad-umas əssəbab n-tanməšrayt i-iyän dəɣ-inəttulab-in.

³ Äjät önnyät i-iman-näwän: afäl käy-idläm äñña-k, äxtäl-t, kunta ämmujräz, äns'-as.

⁴ Afäl hak-ija əssa udlemän däx-aşäl, ij'-ak-dd əssa uylawän däx-däx-k itattär tenäşşe, äns'-as.»

Älfäyda n-immun s-Mässinäx

⁵ Ənnän inəmmušal i-Ŷisa: «ÄlŶalim, siwəd immun-nänäx.»

⁶ Inn'-asän ÄlŶalim Ŷisa: «Afäl lam immun ogdähän d-temätäwt ta tojārät təmmətkit däx-idommän, ad-tudabem ad-tənnəm i-ahəkş-wa-däx: <Əlbəy-dd iman-näk, säxtəd-tän däx-ejäns>, ad-äj a-wa has-tənnäm.

⁷ Əndek däx-wän wa s-afäl t-dd-odwa akli-net wa əssixdäm däx-aşəkrəş-net, mex wa əsdän arəzzej-net, ad-has-änn: <Əyyäw mänsäw>,

⁸ wädden a has-mad-änn: <Sänñ'-ahi-dd a əkşex, təjəd isəlsa-näk wi n-älxidmät, təkfəd-ahi amənsi har äksäx, əswäx təzzar, təksəd, təswəd käyy.>

⁹ Tordam a-s əhaləs-en-däx, ill'-e a mad-umay i-akli-en-däx, ijän a-wa tiwarän?

¹⁰ Käwäned-däx, e-d jäm a-wa s-hawän-ätwännä, ännät: <Näkkäned, jer-t-nəlla wäla wär t-nəlla, eklan xas a nämoos, wär nəja xas ar a-wa hanäx-iwarän.> »

Äzozäy Ŷisa märaw meddän ijraw jəri

¹¹ Älwäqq wa d-ikka Ŷisa Yärussälam, ällil zäbo wa ikkän jer-teje ta n-Sämari d-ta n-Galila.

¹² Ijjäş-dd tadäbayt tiyyät xas, əlkädän-as-dd märaw meddän ijraw jəri, əbdädän-as dihen,

13 eḍkälän imäslan-näsän, ənnän-as:
«Älyalim Ƴisa! Aḍən-anäx tähanint.»

14 Inhäy-tän, inn'-asän: «Äglät, säknät iman-näwän i-käl-tikutawen.» Əglan härwa a-s əzzäyän iket-näsän, šäddijän.

15 Inhäy iyyän däx-sän a-s izzäy xas, iqqäl däx-adäriš-net, iḍkäl emäsli-net, ad-itiiməl Mässinäx.

16 Osä-dd, irkäx dat-Ƴisa, ad-has-itumay, ähaləs-en, i n-teje ta n-Sämari.

17 Innä Ƴisa: «Ajän wädden märaw meddən a əzzäyən, ma jän təzza wi iyyäḍnen?»

18 Ƴas wär tän-dd-izjer fäw ere dd-iqqalän i-ad-aməl Mässinäx ar amäjar-wa-däx?»

19 Innä Ƴisa i-ähaləs ḍarät-a-wen: «Əbdəd, əgləw, ixläs-käy immun-näk.»

*Išmal wi n-Təmmənəya n-Mässinäx
(Mätti 24:23-28, 36-41)*

20 Əssəstänän käl-faris Ƴisa, ənnän-as:
«Əmme dd-mad-təzzubbət Təmmənəya n-Mässinäx?» Inn'-asän: «Təmmənəya n-Mässinäx, wär mad-dd-täj ass ilan mänhoy,

21 wär mad-itwənn: <Ənta da>, wäla: <Ənta den>, fäl-a-s ädduuttät a-s, Təmmənəya n-Mässinäx, təll'-e jere-wän.»

22 Innä i-inəṭṭulab-net ḍarät-a-wen:
«Əlkamän išilan däx-mad-səddärhənäm ahänay n-Ägg-ägg-adəm kud-däx i-ašäl iyyän xas, mäsan, wär t-mad-tənhəyäm.

23 Afäl hawän-ätwänna: <Ənta den>, meyx:
<Ənta da>, wär təglem, wär təlkemäm i-a-wen

24 fäl-a-s, Ägg-ägg-adəm, ass-net, ad-aläh d-essam-i s-e-d issäm dāḡ-ašrut iyyän n-išənnawän, ad-isəmmələwləw ašrut wa iyyäḏän.

25 Mäšan, wär mad-äj a-wen ar s-ad-inhöy tersəmmawen, təkkuddəl-t əzzurəyät-ta-dāḡ təzzar,

26 fäl-a-s, a-wa ijän dāḡ-išilan wi n-ännäbi Nox, a madän-äj daḡ dāḡ-išilan-wi dd-mad-iqqəl Ägg-ägg-adəm.

27 Äzzäman wa n-ännäbi Nox, tayəwanän äddinät, sassän, tidubunän, sidubunän har ašäl wa d-ijjäs Nox turäft n-aman ta mäqqärät s-has-innä Mässinäḡ a tät-ikən, oḏän-dd fälla-sän aman wi n-ḏuf, əlhäsän-tän iket-dāḡ-näsän.

28 Šund a-wen-dāḡ daḡ a ijän dāḡ-išilan wi n-Lut, tattän äddinät, sassän, žanšen, satajän, tidumun, təddayän ihānan

29 har ašäl wa d-izjār Lut aḡrəm wa n-Sodoma, iffäy-dd fälla-sän Mässinäḡ ajənnə n-efew d-əlkäbrit, ilhäs-tän iket-dāḡ-näsän.

30 Šund a-wen-dāḡ a madän-äj ašäl wa dd-mad-iqqəl Ägg-ägg-adəm.

31 Ašäl-en, wa iwarän afälla n-ehän, wär dd-itəzəbbutet i-ad-idkəl ilalän has-hanen ider n-ehän; wa ihan ašəkrəš-net daḡ, wär-itäqqälet ehän,

32 wär hin-təttəwäm a-wa ijrəwän hänne-s n-Lut.

33 Ere wa wärän idgez ar dāḡ-ajəraw n-iman-net dāḡ-äddunya-ta-dāḡ, ad-ifut dāḡ-älžännät, mäšan, əwadəm wa irdän äfota dāḡ-iman-net, dāḡ-äddunya-ta-dāḡ, dāḡ-äddimmät-in, ad-

ixlæs.

³⁴ Assiilmädäx-kāwān s-ehād-wen-däx, ad-ənsan əssin meddən fäll-asəftäx iyyän, ämmädäkäl iyyän, itwəyy-dd wa iyyädän,

³⁵ ad-təzzadnät sänatät tiðeden əttäxam dāx-edəgg iyyän, tämmädäkäl tiyyät, tətəwəyy-dd ta iyyädät; [

³⁶ ad-əhan əssin meddən ašəkrəš iyyän, ämmädäkäl iyyän, itwəyy-dd iyyän.]»

³⁷ Əssəstānän inəttulab Ƴisa, ənnän-as: «Älɣalim, əndek dihad-e-äj a-wen?» Inn'-asän: «Dihad t-təlla tamäxsoyt, ad-itajj ellay.»

18

Tangalt ta n-tänuḍäft d-älqallı wa n-enälläbäs

¹ Ij'-asän Ƴisa dāx tangalt tiyyät dāx-irha ad-tän-isəlməd a-s lan s-ad-təddalän Mässinäx härkuk, wär dāx-s təkəkəsän ättäma.

² Inn'-asän: «Kāla t-illa aɣrəm ih' älqallı wärän äksuḍ Mässinäx, wär-issəfrär dāx dāgg-adəm.

³ Təll'-e dāx dihen tänuḍäft t-dd-tiisət hak ašäl, təjann'-as: <Əkkəs-ahi tekəriḍt dāx-äwadəm wa hi-ohäxän.>

⁴ Ähojä älqallı wär tät-in-ijreh, har šik, innä dāx-iman-net ašäl iyyän: <Kud-dāx wär-äksuḍäx Mässinäx, wär-əssəfräräx dāgg-adəm,

⁵ ad-əkkəsäx tekəriḍt i-tamäḍt-i-dāx hi-täşəfät i-ad-hi-täkf älxafyät.> »

⁶ Inn'-asän Älɣalim Ƴisa: «Säjdät ɣas i-a-wa-dāx inna älqallı-wa-dāx n-enälläbäs.

7 Үас тordam a-s Мăссинăх вăр-е-иккѳс текăридт i-wi аснафран сăр-s dd-hallănen ehăд d-aşal? Tordam a-s ad-hin-ăhaj fălla-săn?

8 Ăbo! Ălleyeу-awăn a-s, ad-hasăn-ikkѳс текăридт şik măşan, tordam făw s-aşal wa dd-mad-iqqəl Ăgg-ăgg-adəm, ad-dd-agəз immun făll-ărori n-ăkall?»

Tangalt ta ija Үisa făll-u-faris d-u-tiwse

9 Issăхlăy Үisa дарăт-a-wen tangalt äddinăt wi ordănen iman-năsăn iqqud, a-s ija a-wen, əlkăhăn imidiwăn-năsăn, inn'-asăn:

10 «Kăla əkkăn əssin meddən ehăn n-ămudd wa măqqărăn i-ad-umadăn, ахьбədăn Мăссинăх. Iyyăn u-faris, wa iyyăдăn ănarmas n-tiwse.

11 Osăn-in хас, ibdăd wa n-u-faris, ad-itumad, ijanna dăх-iman-net: <Ăjođăyăх-ak Мăссинăх făl-a-s, wăr-olehăх d-ăddinăt-wi iyyăдnen n-imăkrăдăn d-iməzzəna, wăr-olehăх dăх d-u-tiwse-wa-dăх,

12 tuzamăх əssin išilan dăх-əssəboх, takkăsăх tămukăst n-a-wa jarrăwăх iket-net.>

13 A-s ităjj a-wen u-tiwse ənta, ibdad dihen, təgdal-as tăkrakidт wăla ad-idkəl asăwaд-net, аsninăn iman-net, ijanna ənta: <Ya Мăссинăх! Səsməд făll-i, əkrəşăхet data-k idəm năkk-i n-anăsbăkkăд.> »

14 Inn'-asăn Үisa: «Ălleyeу-awăn a-s u-tiwse-wa-dăх, a-s iqqəl ehăn-net, ijraw idəm wăr-ijrew u-faris dat-Măссинăх. Ere idkălăn iman-net, ad-irəs, ere dăх wa аsrăsăn iman-net, ad-t-idkəl Мăссинăх.»

*Ija ʃisa älbäraka däj-aratän
(Mätti 19:13-15; Marqəs 10:13-16)*

¹⁵ Ämmewäyän-dd darät-a-wen imärkäsän s-ʃisa i-ad-däj-sän äj älbäraka, mäšan, ənhäyän inəttulab-net a-wen ɣas, äkläwläwän fäll-imärawän-näsän.

¹⁶ Ixr'-en-dd ʃisa s-iman-net, inn'-asän: «Äyyät aratan ad-hi-dd-əkkən, wär tän-in-täwweɣäm fäll-i fäl-a-s Təmmənəya n-Mässinäɣ, äddinät-wi dər-sän änifäqqänen a-s tät-ihakk.

¹⁷ Äsidätteɣ-awän a-s ere wärän iqbel Təmmənəya n-Mässinäɣ s-əmmək wa s-tät-mad-iqbəl ara, wär tät-mad-ijjəš.»

*Äddunya meɣ äloxärät?
(Mätti 19:16-30; Marqəs 10:17-31)*

¹⁸ Osä-dd älfäqqi iyyän n-käl-Älyähud ʃisa, inn'-as: «Äɣalim wa oläɣän, ma s-leɣ s-ad-t-äjäɣ i-ad-əkkusäɣ tämudre ta täylälät?»

¹⁹ Inn'-as ʃisa: «Mafäl hi-ɣarräd s-isəm: Wa oläɣän? Wär t-illa ere oläɣän säl Mässinäɣ.

²⁰ Wädden tössanäd alämärän-net: «Wär jed əzzəna, wär jed iman, wär tokeräd, wär täjjəyhäd s-bahu, səmɣär ti-k d-ma-k.» »

²¹ Inn'-as älfäqqi: «Äɣdaläɣ i-a-wen-däj iket-net härwa ämoosäɣ ara.»

²² Isla ʃisa i-mäjräd wa ija ɣas, inn'-as: «Härät iyyän a hak-in-äba: tužžär-in a-wa led iket-net, tuzanäd-t i-tiläqqiwen i-ad-təjrəwäd ärrəzäɣ däj-älžännät, dihen, əqqəl-dd, əlkəm-ahi.»

²³ Isl' älfäqqi i-a-wen ɣas, ənxäsän iman-net ed ila ehäre n-tikunen.

24 Inhăy-t Țisa ănxasăn iman-net ȡas, innă: «Unhh! Aȡwi ija i-ere irzaȡăn ujəš n-Təmmənəya n-Măssinăȡ!»

25 Oȡăr tărăyxe ta ija i-amnəs ujəš s-tiȡt n-ănazmay uhən i-ere irzaȡăn ujəš n-Təmmənəya n-Măssinăȡ.»

26 Ęnnăn-as ăddinăt-wi has-ăsiȡădnen a-s inna a-wen-dăȡ: «Adiș mi madăn-iȡləs.»

27 Inn'-asăn: «A-wa wăr-ăsmăkkănăn dăgg-adəm, ăddoobăt-t Măssinăȡ.»

28 Iggăd-dd Bəȡrus, inn'-as: «Năkkăneȡ-i-ș oyyănen ihănan-nănăȡ nəlăm-ak, ăndek isălan-nănăȡ, ma s-ilkam ad-t-nəȡrəw?»

29 Inn'-asăn Țisa: «Ăsidătteȡ-awăn a-s wăr t-illa dăȡ-wăn-i madăn-ăyy ehăn-net meȡ hănne-s meȡ ayətma-s meȡ imărawăn-net meȡ məddana-s dăȡ-təssəba n-Təmmənəya n-Măssinăȡ

30 s-wădden, ad-ijrəw a ănnuȡfăsăn făll-a-wen dăȡ-ăddunya-ta-dăȡ, ijrəw dăȡ tămudre ta tăȡlălăt dăȡ-ăddunya ta dd-malăt.»

*Ăsihe wa s-kăraȡ d-itajj Țisa isălan n-tamăttant-net d-tanăkra-net
(Mătti 20:17-19; Marȡəs 10:32-34)*

31 Ikkăs-dd Țisa ȡarăt-a-wen inəȡȡulab-net wi n-măraw d-əssin s-takše, inn'-asăn: «Ęnhəywăt, năkkăneȡ-da hi-əkkănen Yărussălam i-ad-itbət a-wa əkătăbăn ănnăbităn dăȡ-isălan n-Ăgg-ăgg-adəm

³² fäl-a-s, ad-t-əjən ayətma-s dāχ-ifassän n-inəzzulam,[†] əjən-t tekäškäšt, səmmäḍrəyän-t, sutəfən fälla-s,

³³ əjən dāχ-s tiwit, əjən iman-net məšan, ašäl wa s-käraḍ ḍarät tamättant-net, ad-dd-inkär jer-inəmmuttan.»

³⁴ Ij'-asän Ƴisa məjräd-wen-dāχ məšan, wär t-illa a dāχ-s əjrahän ed, ättunkäl-asän älmäχna-net, wär-əjrehän a-wa dāχ-hasän-ässewäl.

*Emədderχəl-wa äzozäy Ƴisa
(Mätti 20:29-34; Marqəs 10:46-52)*

³⁵ Älwäqq wa d-hin-ohäzän tayrəmt ta n-Žärriko, əkkän-dd edes i-emədderχəl äqqiimän dāχ-asälim n-zäbo, itattär takute dāχ-äddinät.

³⁶ Islä i-täkat ta ja tamətte χas, issəstän d-a-wa ijän.

³⁷ Ənnän-as äddinät: «Ƴisa wa n-Nəširät a okayän.»

³⁸ Äšyärät, innä: «Ya Ƴisa wa n-Ägg-Dawəd, aḍən-ahi təhanint!»

³⁹ Äχtälän-t äddinät-wi äzzarnen i-tamətte i-ad-hin-isusəm məšan, äšyärät s-afälla: «Ya Ägg Dawəd, aḍən-ahi təhanint!»

⁴⁰ Ibdäd Ƴisa, omär s-ad-sär-s dd-ättälwäy. Os'-e-hi-dd emədderχəl χas, issəstän-t, inn'-as:

⁴¹ «Ma s-tärhed ad-hak-t-äjäχ?» Inn'-as emədderχəl: «Älyalim, aləsäyət ahänay.»

[†] **18:32 18:32** — Ƴur-käl-Älyähud, ere wärän ämoos ägg-Älyähud s-aläšäl meχ ere wärän ilkem i-äddin-näsän, iket-net, änəzzalim a ämoos. A-wen-dāχ a fäl tiwsaten ti iyyädnen iket-näsnät, ti n-inəzzulam. — Ašäl-i-dāχ, änəzzalim, äkafär (ere wärän issen s-Mässinäχ).

⁴² Inn'-as Үisa: «Энһөй! Iҗлӓs-kӓy immun-nӓk.»

⁴³ Inhӓy ӓlwӓqq-wen-dӓҗ, ilkӓm i-Үisa, ad-itiimӓl Mӓssinӓҗ, tiimӓl daҗ tamӓtte ta tӓnhӓyӓt a-wa ijӓn Mӓssinӓҗ fӓl tihusay n-ijitӓn-net.

19

Isӓlan n-Zakӓyyu wa n-ajzзулу

¹ Ijҗӓш Үisa аҗрӓm wa n-Җӓrriko, ӓllil-t.

² A ӓndӓrrӓn ӓhalӓs n-amӓrrӓzӓҗ n-ӓmӓnokal n-inarmasӓn n-tiwse s-isӓm-net Zakӓyyu da-dӓҗ,

³ itattӓr ӓmmӓk s-inhӓy Үisa afӓl okӓy mӓшan, tӓnjӓr-as-t tamӓtte ed, i jӓzzӓlӓn.

⁴ Oшӓl, ӓzzar i-tamӓtte, iwwӓn ahӓшk s-isӓm-net sikamur i-ad-isӓnnӓflӓy dӓҗ-Үisa, afӓl ikka dawa-s.

⁵ Iwwӓd-dd Үisa dihen җas, idkӓl asӓwad-net, inn'-as: «Zakӓyyu! Zubbӓt-dd шik, aшӓl-i, ӓmijareҗ-ak.»

⁶ Ӓzzubbӓt-dd Zakӓyyu шik, ӓsmӓjarӓt Үisa dӓҗ-tedӓwit.

⁷ Эnhӓyӓn ӓddinӓt a-wen җas, ad-simtӓktikӓn, jannen: «A-wa, ӓbӓ-has ere җur-ӓzzubbӓt ar anӓшbӓkkaд-wa-dӓҗ.»

⁸ Ibdӓd Zakӓyyu dat-Ӓlҗalim Үisa, inn'-as: «Ӓlҗalim, hakkӓҗ tilӓqqiwen tӓzune n-ehӓrenin, kunta daҗ ill'-e ere s-kӓla dӓҗ-s ohӓҗӓҗ ehӓre-net, siҗulӓҗ-as-t ija ӓkkoз inӓdфusӓn.»

⁹ Innӓ Үisa ӓlwӓqq-wen-dӓҗ dӓҗ-isӓlan n-Zakӓyyu: «Aшӓl-i-dӓҗ, ehӓn-wa-dӓҗ, ijҗӓш-t-dd ӓlҗӓllas, ed ӓhalӓs-i-dӓҗ, ӓnta-dӓҗ ahӓya n-ӓnnӓbi Ibrahim a ӓmoos

10 fäl-a-s, Ägg-ägg-adəm, osä-dd, immaḡ i-äddinät-wi ässujjälne*n* i-ad-tän-iḡləs.»

Tangalt ta n-isuf wi itäjj Mässinäḡ

11 Enhäyän äddinät ḡisa d-inəṭṭulab-net han attayän n-Yäru*s*sälam ḡas, äḡelän älwäqq wa d-fälla-sän dd-mad-təzzubbət Təmmənəya n-Mässinäḡ, iwwä*d*-dd. Təssəba n-a-wen-däḡ a fäl issäḡläy ḡisa tangalt-ta-däḡ i-wi has-äsijädne*n*,

12 inn'-asän: «Käla ikk' ähaləs n-ägg-ehän äkall ujəjan i-ad-däḡ-s dd-ijrəw təmmənukəla, iqqəl-dd.

13 Ässawäd tekle ḡas, iḡrə-dd märaw däḡ-inaxdimän-net, hak iyyän däḡ-sän, ikf'-e abläḡ n-oräḡ təzzar, inn'-asän: <Äxdəmät s-oräḡ-i-däḡ iket-di dd-taqqäläḡ.>

14 Mäšan, fäl mik*d*aw-i-däḡ där-s əjan käl-äkall-net, oyyän-t har iglä təzzar, əssəlkämän-as älzämaḡät äšimašälän s-ämänokal wa mäqqārän ikka i-ad-has-ənnən: <Ähaləs-di, wär närha ad-fälla-näḡ immukəl.>

15 Hakd a-wen-däḡ, ijrəw-dd təmmənukəla, iqqäl-dd äkall-net; osä-dd ḡas, iḡrə-dd inaxdimän-net winn*n* ikfa oräḡ i-ad-ilməd a-wa ärbäxän däḡ-mamäla-näsän.

16 Os'-e-hi-dd wa äzzarän, inn'-as: <Mässi-ḡ, abläḡ-nä*k*, ärbäxäḡ fälla-s märaw iyyä*d*.>

17 Inn'-as mässi-s: <Ehoyd! Änaxdim ifranän ha taflest a tämoosä*d*; šämäd h'-iik taflest däḡ-a-wärän ijət, ad-käy-səmmənukäläḡ fäll-märaw iḡärman n-äkall-in.>

18 Osä-dd wa s-əssin ɗarät-a-wen, innä: <Mässi-ɣ, abläɣ-nāk, ärbäxäɣ fälla-s səmmos iyyäd.>

19 Innä ɗay i-wa: <Käyy, ad-təmnukələd fäll-səmmos iɣärman n-ākall-in.>

20 Osä-dd iyyän ɗay, inn'-as: <Mässi-ɣ, abläɣ-nāk, ənta da; a tɛgled-däɣ, əkmasäɣ-t, itwar,

21 jey-ak tüksəɗa-i-däɣ mäqqärät ed əssanäɣ a-s emäşşehi a tämoosäd, sikusäd-dd a wär təssətwäräd, tiləyəd-dd ašəkrəş wär täddomed.>

22 Inn'-as mässi-s: <Käyy wa-hi, erk äanaxdim a tämoosäd! A-wa-däɣ dd-izjārän emm-nāk a-s käy-e-səɗləməɣ; a-s təssanäd a-s näkk emäşşehi a ämoosäɣ dd-isikusän a wär əssətwäräɣ, tiləyäɣ-dd ašəkrəş wär-äddomeɣ,

23 mafäl wär jed azrəf-in dəɣ-bänk, dihen a-s t-dd-mad-äqqələɣ, ättilläyäɣ härät fälla-s.>

24 Innä ämänokal ɗarät-a-wen i-äddinät-wi t-əllänen dihen: <Ahäɣät dəɣ-s abläɣ wa ittäf, təkfəm-t i-wa n-märaw.>

25 Ənnän-as äddinät: <Ənta-ş wädden ila märaw?> »

26 Inn'-asän Ƴisa: «Älleɣey-awän a-s äwadəm wa ilän härät, ad-has-iwwaɗ mäšan, wa wärän ila härät, ad-däɣ-s ämahäɣ wäla a-wa ittäf.

27 <Ƴarät-a-wen, išənja-nin winnin wären irha ad-fälla-sän əmnukələɣ, əlwəyät-ahi-tändd, täɣrəsäm-asän dat-i.> »

Ujəş n-Ƴisa i-Yärussälam

(Mätti 21:1-11; Marqəs 11:1-11; Exya 12:12-19)

28 Innä Ƴisa a-wen ɣas, äzzar-i-inəttulab-net s-Yärussälam.

29 Ohäz-in tidbi ti n-Bätfaži d-Bitanya, edes i-tadaxt ta täsijätät ihəşkan wi n-əzzäytun; dihendäx ad-äşmaşäl əssin däx-inəttulab-net,

30 inn'-asän: «Äkkät tadäbayt ta-n data-wän, afäl tät-təjjäšäm, ad-təjrəwäm äza ojayän s-käla wär t-iney äwadəm; arät-t-dd, təlwəyäm-t-dd.

31 Ere käwän-issəstänän d-a-wa fäl t-tirəm, ännät-as: «Ila däx-s älyalim əššäxəl.» »

32 Eglän inəttulab-wi äşmaşäl, ogäzän-in härätän s-əmmək-wa-däx s-hasän-tän-innä;

33 tiirən äza a-s tän-äxtälän mössaw-s d-a-wa fäl t-tirən.

34 Ənnän-asän inəttulab wi n-əssin: «Älyalim a däx-s ilan əššäxəl.»

35 Elwäyän-dd äza i-Ÿisa, əstäjän-as inkubbanäsän, äsnäyän-as-t xas,

36 ad-fattäxän äddinät isəlsa-näsän fäll-zäbo wa mad-ilal iket-net.

37 Issəntä-dd Ÿisa atrur n-tadaxt ta n-əzzäytun xas, təddəwät tamətte ta n-inəttulab-net iket-net, siixləlit, tiiməl Mässinäx s-afälla däx-təssəba n-ijitän wi ässuksädnen tənähäy.

38 Tiiməl Mässinäx, janna:

«Ozana!

Ija Mässinäx älbäraka däx-ämänokal wa dd-osän däx-isəm n-Emäli, älxer ija, imäl-t älxurmät däx-išənnawän iket-näsän.»

39 Eggädän-dd käl-faris hanen tamətte, ənnän i-Ÿisa: «Älyalim, səssusəm inəttulab-näk.»

40 Inn'-asän Ÿisa: «Ällexeş-awän a-s afäl ässosämän, ad-säqqärətnät tihun.»

Tisnant ta təlkamät däx-Yərussälam

⁴¹ Ohăz-in Țisa Țărussălam, inhăy-tăt ȡas, ad-ihall fălla-s,

⁴² ijanna: «Țărussălam! Țnnăr tăddobed ad-təlmədăd așăl-i-dăȡ, əmmək wa s-tăddobed ad-təjrəwăd əlyafyăt n-iman-năm mășan, ättunkăl-am a-wen, wăr t-hənnəynăt tițtawen-năm.

⁴³ Ädduuttăt a-s, əlkamăn dăȡ-m ișilan sămuumnen dăȡ-mad-kăm-ăȡləyȡələyăn ișənjanăm, əzbəbăn-kăm s-ișrutăn iket-dăȡ-năsăn,

⁴⁴ ättăȡtăȡăn-kăm, kămm d-aratăn-năm, wăr mad-dăȡ-m-dd-əyyən wăla ablăȡ iwarăn amidi-net făl-a-s, tunjăyăd s-așăl wa săr-m dd-ășbașăjăȡ.»

Ikkăs Țisa kăl-mamăla dăȡ-ehăn n-ămudd wa măqqărăn

(Mătti 21:12-17; Marȡəs 11:15-19; Exya 2:13-22)

⁴⁵ Ijjăș Țisa ȡarăt-a-wen ehăn n-ămudd wa măqqărăn, ad-dăȡ-s isattăȡ ättuțȡar,

⁴⁶ ijann'-asăn: «Ajăn wădden iktab a-s inna Măssinăȡ:

⟨Ehăn-in, ad-umas ehăn n-tittar⟩,

mășan, kăwăneȡ jăm-t tajnut n-imăkrăȡăn.»

⁴⁷ Isayra ȡarăt a-wen-dăȡ hak așăl dăȡ-ehăn n-ămudd wa măqqărăn. Țnkărăn-dd imănokalăn n-kăl-tikutawen d-ălyulam n-Ățtăwrăt d-imizărăn n-kăl-Ălyăhud, ad-tattărăn əmmək s-jăn iman-net

⁴⁸ mășan, əbă-hasăn taməntelt făl jăn a-wen ed, təsijăd-as tamətte iket-net, ijraz-as daȡ a-wa ijănna.

20

*A-wa innä Yisa i-käl-tikutawen
(Mätti 21:23-27; Marqəs 11:27-33)*

¹ Aşäl iyyän, isağra Yisa dăğ-ehän n-ämudd wa măqqārăn, ixaţţab i-ăddinăt isălan n-Ălənžil a-s t-dd-osăn käl-tikutawen d-ălyulam n-Ăţţawrăt d-inuşămăn n-Işrayil,

² ənnän-as: «Lăğăt-anăğ, mi kay-ikfän turhajăt n-amışəl n-tikunen-ti-dăğ, meğ dağ mi kăy-ikfän tărna-ta-dăğ s-tăjjäd a-wa tăjjäd?»

³ Inn'-asăn: «Ad-hawăn-ăjăğ năkk-dăğ asəstan iyyän, âmăra, lăğătăt-ahi:

⁴ Mi dd-ăşmaşălän Exya wa n-Enəsselmäğ i-ad-isəlmăğ äddinăt dăğ-aman? Ak Măssinăğ a t-dd-ăşmaşălän meğ dăgg-adəm ɣas?»

⁵ Ănmăkkăsăn s-takşe, ad-jannen: «Afăl has-nəna: <Măssinăğ a t-dd-ăşmaşălän>, ad-hanăğ-änn: <Adiş, mafăl wăr tomenăm s-a-wa hawăn-inna.>

⁶ Afăl has-nəna dăgg-adəm ɣas a t-dd-ăşmaşälnen, ad-hanăğ-tăkf tamətte iket-net sâmmăjori n-tihun ed təkkaş iket-net äşşäk a-s Exya ännăbi n-Măssinăğ a ämoos.»

⁷ Ɛqqälän-dd, ənnän-as wăr əssenän ere t-dd-ăşmaşălän.

⁸ Inn'-asăn Yisa: «Adiş năkk-dăğ, wăr hawăn-e-ăllăğey ere wa hi-ikfän tărna ta s-tăjjăğ a-wa tăjjăğ.»

*Tangalt ta n-meddən wi fărnen aşəkrəş
(Mätti 21:33-44; Marqəs 12:1-11)*

⁹ Issăğlăy-tăn-dd Yisa đarăt-a-wen tangalt dăğ-hasăn-innä: «Kăla äddomăt ähaləs iyyän

ašəkrəš n-ləxnəb, ifər-t i-inəsduma iyyäð təzzar, ikk' äkall iyyän däx-hin-ähoja.

10 Täwwäð-dd täqqän n-amili n-ašəkrəš xas, äšmašäl-dd sār-sän äanaxdim i-ad-has-dd-awəy xur-sän folät-net däx-a-wa dd-oräw ašəkrəš. Osä-dd inəsduma wi fännen ašəkrəš, əðnäyän-t tiwit təzzar, əssəglän-t koräyräy.

11 Oläs-dd sār-sän ašəmmişəl n-änaxdim iyyän daḡ, jän däx-s ənta-däx tiwit, äsmäðräyän-t, əssəglän-t koräyräy.

12 Äšmašäl-dd sār-sän daḡ wa s-kärað, ənta, äsbayäsän-t təzzar, əntäjän-t-in koräyräy.

13 Innä mässi-s n-ašəkrəš qarät-a-wen: <Əndek äddäbara ämära? Wär hin-äqqima xas ar ad-sār-sän šəmmişäləx rure-x wa əkney tärha, ənta ya, änihäjja s-ad-t-səmxärän.>

14 Ənhäyän inaxdimän rure-s n-mässi-s n-ašəkrəš imal-dd xas, änmännän jer-iman-näsän: <Ənhəywät-ak, amäkkasu-net, närməset-t, nəjet iman-net, dihen ad-tumas täkasit ti-nänäx.>

15 Ärmäsän-t, əzjärän dār-s ašəkrəš, änxän-t kərəf.» Inn'-asän Yisa: «Ma tordam, wi-däx inaxdimän, ma hasän-mad-äj mässi-s n-ašəkrəš?

16 Ədmanäx-awän a-s ämära, ad-tän-dd-ass ənta iman-net, ilhəs-tän iket-däx-näsän, aləs tefert n-ašəkrəš-net i-iyäð.» Əslän, äddinät i-a-wen xas, ənnän: «Assəkäð äkall!»

17 Issäyläy-tän-dd akäyad-net, inn'-asän: «Adiš mafäl ätiwänna däx-əlkəttab n-Mässinäx a-s:

<Tähunt ta hin-järän älbännatän s-ənnän wär tənfa härät,

ənta a-s a-s təşrəy tanfust,
tāmoos təhünt ta n-aɣmār tufāt, hakkāt ašşahāt
ehän;

¹⁸ təhünt-ta-hi, ere fälla-s ođän,
ad-ärräzräz; ere fäll-tođa daɣ, ad-ilkəz.> »

¹⁹ Inn'-asän Ƴisa a-wen ɣas, əttärän älɣulam n-
Ättäwrät d-imänokalän n-käl-tikutawen əmmək
s-t-ästärmäsän älwäqq-wen-däɣ ed, əssanän a-
s əntäneđ-en-däɣ, a əssiıɣläy tangalt-ta-däɣ
mäšan, wär jen a-wen ed, äksuđän tamətte.

Isälan n-tiwse i-ämänokal Qäyşär
(Mätti 21:45-46; 22:15-22; Marqəs 12:12-17)

²⁰ Jän-as darät-a-wen ənniyät däɣ-ijəj,
äşmaşälän-dd sär-s inaramän janen iman-näsän
älmät äddinät oɣadnen i-ad-t-səwwənnən a-
wārän itətwənn, əjən-t däɣ-ifassän n-gəfär
d-əlxəkum-net.

²¹ Osän-t-dd, ənnän-as: «Äɣalim, nəssan a-s
a-wa jänned d-a-wa säɣred iket-net, oɣad; wär
täzmäzläyäd äddinät ed tabarät ta n-Mässinäɣ
ɣas a saɣred.

²² Ämära, nässistän-käy: ak iwar-anäɣ ad-
nəzəl tiwse i-Qäyşär wa n-ämänokal mäqqārän
mey?»

²³ İlmäd Ƴisa ɣur-iman-net amsud wa t-illän
darät asəstan wa has-jän, inn'-asän

²⁴ «Säkənät-ahi-dd ärriyal, tälläɣem-ahi ere
wa ilän ättäşwer d-isəm wa t-iwārän?» İnnän-
as: «I n-ämänokal Qäyşär.»

²⁵ Inn'-asän: «Adiš, suɣəlät i-Qäyşär a-wa
fälla-wän ila, təkfəm daɣ Mässinäɣ a-wa fälla-
wän ila.»

²⁶ Indär-asän fäw a t-səwwənnən erk mäjrad dat-tamətte, əqqälän-dd xas tof'-en təkunt n-älwižab wa hasän-ija, əssosämän.

*Isälan n-tanäkra jer-inəmmuttan
(Mätti 22:23-33; Marqəs 12:18-27)*

²⁷ Os'-e-hi-dd ɖarät-a-wen härät dəx-käl-taggayt ta n-käl-sadus-i jännänen a-s wär təlکم tanäkra jer-inəmmuttan, afäl äba äwadəm, əmdän isälan-net.

²⁸ Əssəstänän-t, ənnän-as: «Älyalim, inn'-anəx ännäbi Mosa: <Afäl ädobän ähaləs, äba-t wär oher ara d-hänne-s, idubənet-tät äŋŋa-s i-ad-ikreš əzzurəyät i-äŋŋa-s wa äba i-ad-wär hin-tiləm isəm n-wa äba fäll-ärori n-äkall.>

²⁹ Ämära, əkkəs-anəx dəx-täqqän n-eyäf: Kälä t-əllän əssa äŋŋatän, ädobän dəx-sän wa n-amäqqar mäšan, äba-t wär-ikreš ara,

³⁰ işräy-t wa s-əssin s-adubən n-hänne-s,

³¹ ilkä-m-as dəx wa s-kärad mäšan, wär tän-ihä i där-s oharän ara; ädobänän-tät əssa-essän, äba-tän dəx iket-näsän, wär t-illa i där-s oharän ara.

³² Äba dəx ɖara-sän tamädt.

³³ Nässiistän-käy: ašäl wa n-tanäkra jer-inəmmuttan, əndek dəx-sän wa s-e-tumas hänne-s ed, ənhayän-tät adubən əssa-essän?»

³⁴ Inn'-asän Yisa: «Dəx-äddunya-ta-dəx, tidubunän meddən, tidubunnät tiɖeɖən

³⁵ mäšan, äddinät wi ikfa Məssinəx turhajät n-ad-dd-ənkärän jer-inəmmuttan i-ad-əjjəšan älzännät, jer-wi n-meddən wälä tiɖeɖən, ad-äbas ämiḡatärän s-adubən,

³⁶ ed äbas dāḡ-sān təlcam tamättant, ad-
alähän d-änjälösän, umasän aratan n-Mässināḡ
ed, ənkarän-dd jer-inəmmuttan.

³⁷ Dāḡ-a-wa dd-iqqälän isālan n-tanākra jer-
inəmmuttan, issətbät-tän ännäbi Mosa ed, ašäl
wa t-iḡrā Emāli dāḡ-tabsäḡt ta tähjäljälät wār
rāqq, iḡr'-e Mosa s-isəm: Mässināḡ n-Ibrahim
d-Isxaqq d-Yaqub.

³⁸ A-wen, älmāḡna-net a-s, äddinät-win-dāḡ,
han älzännät, tiimələn Mässināḡ; ənnār wār
ədderän wār təjjən a-wen. Mässināḡ, wädden
inəmmuttan a-s ämoos Mässināḡ, ämoos-t i-wi
əddärnen ed data-s, əddarän iket-dāḡ-näsän.»

³⁹ Imməjräd härät dāḡ-älḡulam n-Ättäwrät
ḡarät-a-wen i-Ḳisa, ənnän-as: «Äḡalim,
edāwänne-nāk, ikna.»

⁴⁰ Äbas t-illa ḡarät-a-wen ere ihälän asəstan-
net.

Mi s-ämoos Ḳisa, rure-s?

(Mätti 22:41-46; Marḡəs 12:35-37)

⁴¹ Issəstän-tän Ḳisa ḡarät-a-wen, inn'-asän:
«Ma isawännən äddinät a-s Älmasex, rure-s n-
Dawəd?»

⁴² Ajän wädden Dawəd iman-net inna fälla-s
dāḡ-əlḡəttab wa n-Äzzäbur:

⟨Inna Emāli i-Emāli-nin,
ḡayəm daw-aḡil-in,

⁴³ hundāḡ här äjāḡ išənja-nāk daw-iḡarän-nāk.⟩

⁴⁴ Ḳas kunta Dawəd iman-net iḡarr Älmasex
s-isəm ⟨Emāli⟩, əndek əmmək wa s-äddobät ad-
umas rure-s?»

Agəzät iman-näwän dəx-təlmənuḫə
(*Mätti 23:1-36; Marqəs 12:38-40; Luqa 11:37-54*)

⁴⁵ Innä Ƴisa ɗarät-a-wen i-inəttulab-net dat-tamətte ta has-təsijädät:

⁴⁶ «Agəzät iman-näwän dəx-älɣulam n-Ättäwrät, ijraz-asän ad-tikələn timukal dəx-isəlsa əhobätnen, ijraz-asän ad-hasän-tajjän äddinät isofan dəx-tišarriten, ərhan tisəqqima ti ənnufläyner dəx-ihənan n-əddin wi n-käl-Älyəhud d-atwəsəmɣar dəx-imjora,

⁴⁷ saknen a-s hərkuk tumadän, a-s ija a-wen, tihəyän a-wa ihän ifassän n-tinudəfen, ilkam dəx-sän əššərəɣa səmmän.»

21

Isəlan n-tənuḫəft ta tojərät imərrəzəyän ihuk
(*Marqəs 12:41-44*)

¹ İdkäl Ƴisa ɗarät-a-wen asəwad-net, inhəy käl-ehäre tajjän azrəf wa təkkatän dəx-əssəndoqq wa n-tikutawen ihän ehän n-əmudd wa məqqārən,

² inhəy dəx tənuḫəft tiyyät ləqqəwät har dd-tosa, təstärəkkät dəx-əssəndoqq sənətät tammaten əbdanen.

³ Inhəy Ƴisa a-wen ɣas, inna: «Tidət-dəx a-s tənuḫəft-ta-dəx n-taləqqe, tojər äddinät iket-nəsän ihuk,

⁴ fäl-a-s iket-nəsän, a-wa s-əssakəyän s-wär-əmyatərən a əkfän, a-s ija a-wen ənta, dəx-əlləqqu-net, a-wa təttaş i-təmdre-net iket-net, a təkfa.»

Teräzze ta tɔlkämät dāḡ-ehän n-ämudd wa mäqqārän

(Mätti 24:1-2; Marqəs 13:1-2)

⁵ Islä Ƴisa ɗarät-a-wen i-äddinät iyyäd dāḡ-tamøtte, tiimøløn tihusay-ti ija ehän n-ämudd wa mäqqārän, tiimøløn daḡ a-wa t-ihän d-tihun ti s-idäy d-a-wa s-idlāj māšan, inn'-asän:

⁶ «A-wa-dāḡ hannäyäm ähusken, ølkamän išilan dāḡ-wär mad-dd-täqqayøm tähunt tiyyät ḡas warät tamidit-net, ad-ättäḡtäḡ iket-dāḡ-net.»

Išmal n-tämøddawt n-äddunya

(Mätti 24:3-28; Marqəs 13:3-23)

⁷ Èssøstänän-t, ønnän-as: «Älyalim, ømme d-mad-äj a-wen? Èkkəs-anäḡ dāḡ-tayḡdärt n-išmal wi-s-e-nølmød a-s sämdo, øsä-dd.»

⁸ Inn'-asän Ƴisa: «He käwänøḡ, wär käwän-išäšket äwadøm ed, ad-dd-asøn äddinät äjjootnen s-isøm-in, änn hak iyyän dāḡ-sän: <Näkk a-s Älmasex!> meḡ änn: <Täqqän, täwwäḡ!> wär tošeläm ɗara-sän.

⁹ Afäl tøsläm i-isälan n-imjārän d-tanäkra n-timøttawen, wär-itäggädet ønniyät-näwän; a-wen a ilan s-ad-äj tøzzar išrøy-t-dd sämdo n-härät iket-net.»

¹⁰ Inn'-asän daḡ ɗarät-a-wen: «Ad-təknəs tawset tamidit-net, iknəs øddøwøl amidi-net,

¹¹ ad-iškøḡkøḡ äkall dāḡ-idäggan äjjootnen, äj laḡ d-turhønnawen äjjootnen, øzjārän-dd härätän d-ijitän ässuksäḡnen išønnawän

¹² māšan, dat-ad-äj a-wen-dāḡ, ad-tättärmäsäm, tøtwäḡøzzøbem, tättälwäyäm s-äššareḡa dāḡ-ihänan n-äddin wi n-käl-Älyähud,

təjjəšäm tikärmuten, sərəröwrəwän-awän äddinät s-imänokalän d-gəfärän dəḡ-təssəba n-isəm-in wa kəwän-iwarän,

¹³ ad-hawän-umas a-wen əssəbab fäl təmoosäm tjuhawen-in.

¹⁴ Wär täšəwwašnet ulhawän-nəwän dəḡ-isılan n-a-wa mad-tənnəm

¹⁵ fäl-a-s, ad-kəwän-əkfəḡ əllifaḡ d-sərho dəḡ-məjräd s-wär t-illa ašanjo-nəwän äddoben tebädde data-wän, wəla asəbbəggu-nəwän.

¹⁶ Ad-kəwän-səttärməšan imərəwän-nəwän, d-ayətma-wän, d-išəqqaḡän-nəwän, d-imidiwän-nəwän, səssənḡən kərəf iyyəd dəḡ-wän,

¹⁷ ad-där-wän akəḡän äddinät iket-nəsän dəḡ-təssəba n-isəm-in wa kəwän-iwarän

¹⁸ məšan, wär hin-e-iba wəla emḡəd n-eḡäf-nəwän iyyän ḡas.

¹⁹ Ere wa äkoyädän dəḡ-alkum-hahi dəḡ-immun-net har ašäl wa d-imda a-wen-dəḡ iket-net, ad-iḡləs.»

Erk äzzəmanän wi dd-malənen

²⁰ «Afäl tənḡäyäm Yərussälam a-s tät-dd-əḡläyḡäläyän əḡḡəskärän, əlmədät a-s əlhəllak-net, ohəḡ-dd.

²¹ Dihen, wi əzzəḡnen teje ta n-Älyähudəyät, jawədnet dəḡ-azzal s-ašrut wa n-iḡayän; wi əzzəḡnen aḡrəm wa n-Yərussälam, əzjərnet-t; wi əzzəḡnen äroj-net, wär dd-təjjəšnet aḡrəm

²² fäl-a-s, išilan-en, išilan n-ukəs n-eḡa dəḡ-mad-äj a-wa ənnän əlkəttabän n-Mässinäḡ iket-net.

²³ Timəskay tiðeden-ti irmäs a-wen-däx lanät ənniyät mex siduðnät, fäl-a-s, ad-täj tizzurt mäqqoorät fäll-äkall, idəw ađkär n-Mässinäx fäll-tamətte-ta-däx.

²⁴ Ayil-net iyyän, ad-t-täkš təkoba, ayil wa iyyäðän, ad-äkkälät däx-ikallän wi iyyäðnen, ađ-əddəšnät tiwsaten wären ämoos ti n-Älyähud, Yärussalam hundäx har akəy äzzäman-näsnät.»

Täməddawt n-äddunya

(Mätti 24:29-31; Marqəs 13:24-27)

²⁵ «Ad-äj härät däx-täfukt d-ewär d-etran, əjənät tirəmmax däx-tiwsaten ti wärnen ärori n-äkall däx-təssəba n-eməsli-i-däx ässuksäðän heikkəs ejärew wa səmmän d-tinäzzämären-net.

²⁶ Äddinät iyyäð, ad-tän-tänx tarəmmeyt n-a-wa hannäyän itajj fäll-äkall ed, wäla iməşsuha wi hänen işənnawän, ad-ənhəynəhəyän.

²⁷ Älwäqq-wen-däx, ad-e-ənhəyän äddinät Ägg-ägg-adəm imal-dd, inay tijäräken, təlka-mas tärna-net d-älxurmät-net.

²⁸ Afäl əssəntän härätän-win-däx iji, əbdədät, tədkəläm ixfawän-nawän fäl-a-s, əlxəllas-nawän, ohəz-dd.»

Yaymät tokayäm

(Mätti 24:32-35; Marqəs 13:28-31)

²⁹ Issäxläy-tän Yisa çarät-a-wen tangalt tiyyät, inn'-asän: «Səjrähät däx-aşar d-ihəşkan wi iyyäðnen;

³⁰ wädden e-d, tän-tənhäyäm a-s dd-ənşärän, ad-təlmədäm d-iman-nawän a-s os'-iwän akäsa.

³¹ Emmək-wen-däx day a-s afäl tənähäyäm härätän-win-däx s-hawän-ənney har əqqälän iji, adiş əlmədät a-s Təmmənəya n-Mässinäx, tohäz-dd.

³² Äsidätteç-awän a-s wär-e takəy əzzurəyät-ta-däx wär jen härätän-win-däx s-hawän-ənney iket-däx-näsän.

³³ Ojār täräxse ija ad-ib'-išənnawän d-äkall uhən ad-iba tənna-nin.

³⁴ Äjät ənniyät i-iman-näwän, wär zəzayet tesäse n-asməd d-əlxəmār d-inəzjam n-äddunya ulhawän-näwän, wär toyyem ašäl-en-däx oḍa-dd fälla-wän

³⁵ šund tätart fäl-a-s ašäl-en, ad-dd-iḍəw fäll-äddinät wi wärnen ärori n-äkall iket-däx-näsän.

³⁶ Yas, çaymät jam ənniyät, täxbadäm Mässinäx s-älwäqq iket-net i-ad-täxləsäm däx-a-wa dd-imalän, tudabem day tebädde dat-Ägg-ägg-adəm.»

³⁷ Itajj Yisa ašäl iket-net isaxra däx-ehän n-ämudd wa mäqqärän mäšan, e-d t-ija ehäḍ, ad-adəw taḍaxt ta n-əzzäytun;

³⁸ e-d äffäw, ad-dd-tənšəy tamətte iket-net ehän n-ämudd wa mäqqärän i-ad-has-səjəd.

22

Anu n-taydärt wa iḡāš Yāhudəs

(Mätti 26:1-5, 14-16; Marqəs 14:1-2, 10-11; Exya 11:45-53)

¹ Ohäz-dd ämudd wa n-Faşka-i däx-tattän äddinät tijəlwen ti wär täskäf täzça ças,

² ɔggädän-dd imänokalän n-käl-tikutawen d-älɣulam n-Ätṭäwrät, ad-tattärän əmmək s-əjän iman n-Ÿisa mäšan, təgdäl-asän-t tüksəða ta jän i-tamətte.

³ Däɣ-a-wen-däɣ, ad-ijjäš Iblis Yähudəs Isxaryut, iyyän däɣ-inəṭṭulab n-Ÿisa wi n-märaw d-əssin,

⁴ iglä, imməjräd d-imänokalän n-käl-tikutawen d-imänokalän n-älgomitän, änmäknän där-s i-ad-hasän-isäɣdär Ÿisa.

⁵ Äsdäwät-tän a-wa hasän-inna, əjjäšan-as ärkäwäl n-ad-t-əkfən azrəf,

⁶ ird'-asän, ad-itammäɣ i-ässäɣät ännufläyän d-wär t-təlla tamətte edes i-Ÿisa i-ad-hasän-t-isəttärməs.

Isəmməjna i-ämudd wa n-Faška

⁷ Osä-dd asäl wa däɣ-tattän äddinät tijəlwen-ti wär ha täzza d-ɣarräsnät taɣsiwen ti n-Faška,

⁸ äšmašäl Ÿisa Bəṭrus d-Exya, inn'-asän: «Äglät, səmməjnum-anäɣ imənsiwän wi n-ämudd wa n-Faška.»

⁹ Ənnän-as: «Əndek diha d-tärhed ad-tän-nəsəmmujnət?»

¹⁰ Inn'-asän: «Diha-däɣ d-e-təjjəšäm aɣrəm ad-där-wän-e-immuqqəs ähaləs dd-iktärän, əlkəmät-as s-ehän wa mad-ijjəš,

¹¹ tənnəm i-mässi-s n-ehän-en: <Inn'-ak äɣalim, səkən-anäɣ edägg däɣ-ehän-näk wa-däɣ mad-səssikəyäɣ ämudd wa n-Faška näkk d-inəṭṭulab-in.>

¹² Ad-käwän-isəkən ehän n-soro däɣ-ämmujnen isəftaɣ, dihen-däɣ ad-mad-nəsəssikəy ämudd.

¹³ Eġlän, ənhäyän härätän s-əmmək-wa-däx s-hasän-tän-inna Ƴisa, ad-siməjnun imənsiwän wi n-Faşka.»

Ämudd wa n-Faşka

(*Mätti 26:20-30; Marqəs 14:22-26; 1 Kur: 11:23-25*)

¹⁴ Ämmujnät-dd härät iket-net, əskärän-dd imənsiwän Ƴas, ənğäyma Ƴisa d-inəmmuşal dəx-edəgg wa n-imənsiwän,

¹⁵ inn'-asän: «Äsdärhänäx hullan ad-där-wän ahäräx Faşka-ta-däx härwa wär-äqquzzäbey

¹⁶ fäl-a-s, ädduuttät a-s äbas ilkam, ad-där-wän tät-oharäx hundäx har aşäl wa d-mad-ättälmäd älmäğna-net dəx-Təmmənəya n-Mässinäx.»

¹⁷ İdkäl-dd Ƴisa kara han aman n-läğnəb äxxiimmärnen, äjođäy i-Mässinäx təzzar, ikf'-en i-inəttulab-net, inn'-asän: «Näğəbbətät a-wa jer-iman-nəwän

¹⁸ fäl-a-s, ässiilmädäx-kəwän a-s wär-ilkem Ƴur-aşäl-i-däx ad-əswex a dd-ijmađän läğnəb, hundäx har aşäl-wa dd-mad-tass Təmmənəya n-Mässinäx.»

Asəbdad n-amənsi wa n-tasäktot šəddijän

¹⁹ İdkäl Ƴisa darät-a-wen tajəlla, ämmoy i-Mässinäx, irz'-et təzzar, äzun-asän-tät, inn'-asän: «A-wa tağəssa-nin ta mad-äkfäx dəx-idəggan-nəwän, tuzanät tajəlla jer-iman-nəwän kəwəneđ-däx i-ad-hi-dd-kittəwäm.»

²⁰ Əssəmdän tetäte Ƴas, idkäl kara han aman n-läğnəb äxxiimmärnen, inn'-asän: «A-wa ihän kara-i-däx a-s ärkəwäl n-tassaxt wa äynayän

ijän s-ašni-nin wa madän-inxəl dāḡ-äddimmät-nāwän

²¹ māšan, ənhəywät-ak ämaydar-in, ənta-da-dāḡ dār-i oharän.

²² Äsidätteḡ-awän a-s Ägg-ägg-adəm, ätiwatäs ad-t-iba māšan, amäskoy äwadəm wa t-madän-isəssäḡdär!»

²³ Ad-tinməsəstinän ya inəṭṭulab jer-iman-näsän i-ad-əlmədän ere wa ihälän ad-äj tākunt-ten-dāḡ.

Mijraw wa n-tidət

²⁴ Tənkär dāḡ-sän tamädašt täšsoohet älwäqq-wen-dāḡ i-ad-əlmədän ere wa dāḡ-sän ojārən.

²⁵ Inn'-asän Yisa: «Imänokalän äsiikälən əddəwəlän-wi fäll-äxkamän māšan, hək d a-wen-dāḡ, ärhan ad-hasän-itawänna dāgg-älxer

²⁶ māšan, kəwəweḡ, wär jem a-wen: Wa ojārən dāḡ-wän, umaset šund wa əndärrän, wa n-ämizär, umaset änoxdim n-wi iyyäḡnen.

²⁷ Ässistänäḡ-kəwän: əndek ere wa äniihäjjän d-semḡar jer-ere wa äqqimän itatt d-ere wa has-ixdamän? Wädden wa äqqimän itatt a äniihäjjän d-semḡar. Äywa! Näkk a-s kəwän-dd-oseḡ, əjeḡ iman-in jere-wän dāḡ-edägg n-änaxdim.

²⁸ Kəwänəḡ-i-dāḡ ḡas, ad-dd-äqqimänen təlcamäm-ahi ḡarät aḡāna wa ənhäyāḡ,

²⁹ a-wen-dāḡ a fäl, tajjāḡ Təmmənəya ta n-Abba-nin jer-ifassän-nāwän s-əmmək wa s-tät-ija jer-wi-nin,

³⁰ i-ad-där-wän ahäräx išökša d-isəswa dāx-Təmmənəya-nin, täqqayməm fäll-tisəqqima n-təmmənukəla i-ad-təšräxām tiwsaten ti n-märawät d-sänatät n-Işrayil.»

Äloläy Yisa dāx-isälan n-akuddəl wa t-mad-äj Bəṭrus
(*Mätti 26:31-35; Marqəs 14:27-31; Exya 13:36-38*)

³¹ Innä Älyalim Yisa ḍarät-a-wen: «Simyon, Simyon, ittär iblis turhajät n-ad-käwän-iskənsəkət šund älkäma

³² mäšan, däläx-ak Mässinäx i-ad-wär-äba immun-näk sär-i; afäl hi-dd-täqqäläd, səbdəd ayətma-k dāx-äddin.»

³³ Iggäd-dd Bəṭrus, innä i-Yisa: «Älyalim, näkk, äsidäwäx i-ad-där-k idawäx s-takärmüt hakt-dāx s-tamättant.»

³⁴ Inn'-as Yisa: «Bəṭrus, ässiilmädäx-käy a-s, a-s mad-iwət ekäz äxora ašäl-i-däx, täkkuddäläd-ahi har käraḍ ihändäggan.»

Isəmməterän-wi ija Yisa i-inəṭṭulab-net

³⁵ Inn'-asän Yisa iket-näsän ḍarät-a-wen: «Älwäqq wa d-käwän-äšmašäläx s-tizarät wär täwweyäm azrəf wäla šäkköš, wäla tifädelen, ajän äba-hin härät fälla-wän.» Ənnän-as: «Wäla a əndärrän.»

³⁶ Yas, inn'-asän: «Ämära, ere ilän azrəf, iḍkəlet-t, ere ilän šäkköš, išləjet-t, ere dāx-wän wärän ila täkoba, iżänšet-in anäkäbba-net i-ad-tät-ikrəš

³⁷ ed, ällexəx-awän a-s a-wa ätwännän fäll-i dāx-əlkəttab n-Mässinäx a-s inna:

«Äđin dăġ-inađlimăn»,
ad-ăj.»

³⁸ Ęnnăn-as ăntăned: «Ălyalim, sănatăt tikobawen da»; inn'-asăn: «Tăkat, igdăh-awăn măjrăd!»

*Ăssayăt wa ikkăs Ÿisa dăġ-aşėkrėş wa n-
Žătsămmani*
(Mătti 26:36-46; Marqəs 14:32-42)

³⁹ Ifăl dihen ġas, äddew dăr-săn s-tađaxt ta n-
əzzăytun ed, ăru-dăġ a-wen-dăġ a-s izzay ad-t-ăj.

⁴⁰ Ęwwăđăn-in tađaxt-en ġas, inn'-asăn:
«Ădălăt Măssinăġ i-ad-kăwăn-agəz dăġ-
tăndărbaten n-Iblis.»

⁴¹ Işşenkăş-in Ÿisa fälla-săn s-əđđəkuđ n-
tejere n-tăhunt, irkăġ, ad-itəddal Măssinăġ,

⁴² ijanna: «Abba, kunta tărhed a-wen-dăġ,
səssijəj-ahi kara n-tisnant-ta-dăġ măşan hăkd a-
wen-dăġ, ăjet erhet wa-năk wădden wa-nin.»

⁴³ Ijanna a-wen-dăġ a-s has dd-ănfălăl ănjălos
n-Măssinăġ i-ad-t-isəşşuhət.

⁴⁴ Idgăz Ÿisa, ijlăy hullan dăġ-tamădilt n-
Măssinăġ har tămoos tide-net a olăhăn d-
tikruten n-aşni dd-titrėkkitnen făll-ăkall.

⁴⁵ Imdă d-tamădilt n-Măssinăġ ġas ibdăd,
iqqăl-dd inəţţulab-net, ogăz-tăn-dd tăssoodăs-
tăn tisnant.

⁴⁶ Inn'-asăn: «Ma s-təţtasăm? Ęnkărăt-
dd, ădălăt Măssinăġ i-ad-kăwăn-agəz dăġ-
tăndărbaten n-Iblis.»

Atărməs n-Ÿisa Ălmăsex
(Mătti 26:47-56; Marqəs 14:43-50; Exya 18:2-
11)

47 Hārwa-dāḡ ämmiijräd i-inəṭṭulab-net a-s dd-osa ejhän wa t-ittārän, äzzar-as iyyän dāḡ-inəṭṭulab-net wi n-māraw d-əssin wa s-isəm-net Yāhudəs. Ohäz-dd Yāhudəs Ƴisa i-ad-t-asəs dāḡ-idmarän-net

48 māšan, inn'-as Ƴisa: «Ƴas käyy Yāhudəs, əmmək wa-dāḡ a-s saḡdaräd Ägg-ägg-adəm?»

49 Ənhäyän inəṭṭulab wi iyyädnen a-wa ikkän iji ḡas, ənnän: «Ak näwtet-t s-tikobawen-nänäḡ meḡ?»

50 Iwät iyyän dāḡ-sän akli n-ämänokal n-käl-tikutawen s-tākoba-net, ištäf-dd taməzzujt-net ta n-aḡil.

51 Iḡtäl-tän Ƴisa, inn'-asän: «Wär jem a-di.» Iḡäs taməzzujt n-ähaləs, äzozäy-t.

52 Innä Ƴisa i-imänokalän n-käl-tikutawen d-imänokalän n-älgomitän wi äḡläfnen ehän n-ämudd wa mäqqārän d-inušämän n-Işrayil d-wi t-äşşunjätnen: «Ma s-sär-i dd-täwwayäm tikobawen d-iboriyän şund änaḡtaf?»

53 Wädden hak aşäl ärtayäḡ dār-wän dāḡ-ehän n-ämudd wa mäqqārän, mafäl wär hi-dāḡ-s tärmesäm; əlmədät a-s aşäl-wa-dāḡ, aşäl-näwän käwänəḡ d-Iblis d-tihay-net.»

Tisəṭbat n-akuddəl wa ija Bəṭrus i-Ƴisa

(Mätti 26:57-58, 69-75; Marqəs 14:53-54, 66-72; Exya 18:12-18, 25-27)

54 Ärmäsän Ƴisa, əlwäyän-t s-ehän n-ämänokal wa n-käl-tikutawen, ij'-asän Bəṭrus alkum şəjren.

⁵⁵ A-s hin-əwwäḍän dihen, irḡä efew dāḡ-ammās n-āḡalla, əzzahän sār-s äddinät; ijjāš Bəṭrus ənta-dāḡ, iglä äqqima edes i-äddinät-en.

⁵⁶ Tənhäy-t tānaxdimt tiyyät äqqiima s-efew, təkn'-e azəjjəzz, tənnä: «Hannäyäm-t wa-daḡ, amidi n-Ḳisa.»

⁵⁷ Äkkuddäl Bəṭrus a-wen, inn'-as: «Tamäḍt, wär t-əzzeyäḡ.»

⁵⁸ A əndärrän ḍarät-a-wen-dāḡ, inhäy-t äwadəm iyyän daḡ, inn'-as: «Iyyän dāḡ-sän a tāmoosäd.» Inn'-as Bəṭrus: «Ähaləs, älḡafyät-näk.»

⁵⁹ Okäy a iwwäḍän ässaḡät ḍarät-a-wen, ikyäd dāḡ-s ähaləs iyyän, inna: «Ijmaḍ-t äššäk a-s ähaləs-i-dāḡ, amidi-näsän fäl-a-s ənta-dāḡ, i n-Galila.»

⁶⁰ Inn'-as Bəṭrus: «Ähaləs, wär-əssenäḡ a dāḡ-hi-tässewäläd.» Diha-dāḡ d-innä Bəṭrus a-wen-dāḡ, härwa-dāḡ ämmijräd a-s iwät ekäz äḡora.

⁶¹ Innäd-dd sār-s Ḳisa, ämmoqqäs asawaḍ-näsän, iknä dāḡ-s Ḳisa akäyad ḡas, iktä-dd Bəṭrus mäjräd wa s-käla has-t-ija a-s has-innä: «A-s mad-iwət ekäz äḡora ašäl-i-dāḡ, täkkuuddäläd taməzzuyt-in har kərəḍ ihändäggan.»

⁶² Izjār Bəṭrus, ad-ihall a-wa-dāḡ has-ja tis-nant.

Äsmäḍräyän əssärdusa Ḳisa
(*Mätti 26:67-68; Marḡəs 14:65*)

⁶³ Əzzänän meddən-wi jänen ənniyät i-Ḳisa sār-s, ad-dāḡ-s ḍazzän, təggatän-t;

⁶⁴ äqqänän idəm-net s-ekäršäy, ad-has-jannen:
«Luləy ya, tälləxed-anəḡ ere wa käy-iwätän.»

⁶⁵ Ad-sikuforän, gaggärän-t.

*Tebädde n-Ḡisa dat-käl-Sinhidrin wi
yattäsnen äššäreḡa*

(Mätti 26:59-66; Marqəs 14:55-64; Exya 18:19-24)

⁶⁶ Äffäw ḡas, äddew-dd älzämaḡät wa
n-inušämän n-Işrayil d-imänokalän n-käl-
tikutawen d-älḡulam n-Ätṭäwrät, əlwäyän Ḡisa
s-käl-äššäreḡa.

⁶⁷ Ʒwwäḡän-in ḡas, əssəstänän-t, ənnän-as:
«Kunta käyy a-s Älmaseḡ, əkkəs-anəḡ dəḡ-
taḡdärt.» Inn'-asän: «Kud-hawän-tän-ənnəḡ-
dəḡ, wär hi-e-təfləsäm;

⁶⁸ kud-käwän-əssəstänəḡ daḡ, wär hi-e-
täwwäzzäbäm

⁶⁹ mäšan, əlmədät a-s ḡur-aşäl-i-dəḡ, ad-
tənhəyäm Ägg-ägg-adəm, äqqiima daw-aḡil n-
Mässinəḡ-i ilän tärna.»

⁷⁰ Ʒnnän-as iket-dəḡ-nəsän: «Adiš käyy a-
s Rure-s n-Mässinəḡ?» Inn'-asän: «Käwänəḡ
iman-näwän, tənnäm a-s näkk a t-ämoosän.»

⁷¹ Ʒnnän älwäqq-wen: «Ma nətajj i-tajuhe säl
ta-dəḡ? Wädden nəslä näkkänəḡ iman-nänəḡ i-
a-wa dd-izjārän emm-net.»

23

Tebädde n-Ḡisa dat-Bilatəs

*(Mätti 27:1-2, 11-14; Marqəs 15:1-5; Exya
18:28-38)*

1 Inkär älžamaḡät iket-net, ittəlwäy ʕisa s-Bilatəs wa n-gəfär.

2 Osän-in dihen ʕas, ad-t-saḡlamän, jannen i-gəfär: «A-s närmäs ähaləs-i-däḡ, išaška taməttenänäḡ, ijanna ənta a-s Älmasex wa n-ämänokal, ijanna daḡ i-äddinät wär ʒeläm tiwse i-Qäyşär-i n-ämänokal wa mäqqärän.»

3 Issəstän Bilatəs ʕisa, inn'-as: «Ak, käyy a-s ämänokal n-käl-Älyähud meḡ?» Inn'-as ʕisa: «Käyy iman-näk, tənned-tän.»

4 Innä Bilatəs i-imänokalän n-käl-tikutawen d-tamətte: «Ähaləs-i-däḡ, wär hənnəyäḡ fälla-s uḡlem t-äsinähäjän d-tamättant.»

5 Əzzäjän äddinät iməslan-näsän s-afälla, ənnän-as: «Issəntä-dd ašəšk n-tamətte s-a-wa tāt-isäḡra ʕur-Galila ta dd-ifäl har dd-imdä Älyähudəyät, iwwäḡ-dd Yärussälam ämära.»

6 Islä Bilatəs i-a-wen ʕas, issəstän d-a-s ʕisa i n-Galila meḡ?

7 Ilmäd a-s Galila a t-təlät ʕas, ässawäy-t i-Harudəs wa n-gəfär n-Galila-i fälla-s ixkamän ed, a-s itäj a-wen-däḡ, iha Yärussälam.

Tebädde n-ʕisa dat-Harudəs Antibas

8 Inhäy Harudəs ʕisa ʕas, iddəwät hullan fäl-a-s äru irh' ahänay-net däḡ-təssəba n-a-wa fälla-s isäll, ijar daḡ ättäma n-ad-äj ʕisa, iji n-Mässinäḡ iyyän data-s.

9 Ija Harudəs isəstanän äjjootnen i-ʕisa mäšan, wär t-illa a has-inna ʕisa.

10 A-s itäj a-wen, imänokalän n-käl-tikutawen d-älḡulam n-Ättäwrät, saḡlamän ʕisa s-äşşahät.

11 Iggäd-dd daḡ Harudəs d-əssärdusa-net, ad-t-samäḍrayän, tadjän-t tekäškäšt; əssəlsän-t anäkäbba iknan tihusay, əssoḡälän-t ɗarät-a-wen i-Bilatəs wa n-gəfär.

12 Ašäl-ənnin-däḡ, ad-änmäzäl Harudəs d-Bilatəs, əmedäwän ed, dat-a-wa, änimäksärän.

Bilatəs, Bärḡäbbas, Ẓisa

(Mätti 27:15-26; Marqəs 15:6-15; Exya 18:39-19:16)

13 Äsdäw-dd Bilatəs imänokalän n-käl-tikutawen d-inušämän d-tamətte, inn'-asän:

14 «Ähaləs-i-däḡ ya, täwwäyäm-ahi-t-dd, tənnäm-ahi: <Išaška äddinät>, əssəstänäḡ-t data-wän mäšan, wär fälla-s əjrewäḡ fäw a t-äsinähäjjän d-tamättant däḡ-härätän-wi-däḡ t-sawaräm.

15 Ässawäyäḡ-t i-Harudəs ənta-däḡ mäšan, wär t-ill' uḍlem fälla-s ijraw ed, əssoḡäl-anäḡ-t-dd. Wär fälla-s hənnəyäḡ fäw a t-äsinähäjjän d-tamättant.

16 Äddäbara ämära, ad-däḡ-s səwwəjjäḡ tiwit, äyyäḡ-t-in.» [

17 Äzzäman-en, hak ämudd n-Faška, äsiwäyy'-asän-in Bilatəs u-takärmüt iyyän.

18 Ohärän iket-näsän iyyän n-əmm, äşḡären däḡ-işənnawän, jannen: «Ämmätet ähaləs-wa-däḡ, səwwəyəd-anäḡ-dd Bärḡäbbas.»]

19 Bärḡäbbas-i-hi, iha takärmüt fäl-a-s käla dd-issənkär tamətte däḡ-aḡrəm har ij' iman n-äwadəm däḡ-a-wen-däḡ.

20 Ittär Bilatəs ad-hasän-ämmäjräd daḡ ed irha ənta ad-hin-isəwwəyy Ẓisa

21 māšan, āsḡāren iket-dāḡ-nāsān dāḡ-išənnawān, ənnān-as: «Itwəşləbet fäll-tajəttewt, itwəşləbet fäll-tajəttewt!»

22 Olās-tān asəstan wa s-kāraḡ, inn'-asān: «Mafāl, ma iḡşād t-āsiināhājjan d-tamättant? Wār fälla-s əjrewāḡ a t-āsināhājjan d-tamättant; äddābara āmāra, ad-dāḡ-s səwwəjjāḡ tiwit, səwwəyyāḡ-t-in.»

23 Äxwālān-t s-iḡāran-nāsān, tattārān dāḡ-s ad-itwəşləb fäll-tajəttewt. Oyy'-asān iman-net, āsjād-asān Bilatəs,

24 ällil erhet-nāsān, iḡtās-as tamättant,

25 āswāyy'-asān-in āhaləs wa dāḡ-s əttārān ihān takārmut dāḡ-təssəba n-asənkār wa dd-ija i-tamətte d-iman-wi ija, ija Ḳisa dāḡ-ifassān-nāsān i-ad-has-əjən a-wa s-ārhan.

Atwəşləb n-Ḳisa Älmasəx fäll-tajəttewt

(Mätti 27:32-44; Marqəs 15:21-32; Exya 19:17-27)

26 Älwäqq wa d-āwwāyān Ḳisa i-ad-itwəşləb, āšhāşşälān āhaləs s-isəm-net Simyon n-tadābayt ta n-Qərwan dd-ifalān išəkraş alənji n-tajəttewt ta fäll-mad-itwəşləb Ḳisa; idkāl-tāt, ilkām-asān.

27 Təlkam-asān daḡ tamətte täjjeet əhanāt tiḡeden āsiikälälnen, təggatnāt iman-nāsnāt s-äkall.

28 Innād-dd sār-snāt Ḳisa, inn'-asnāt: «Şāt-Yārussälām, wār təlhemāt fäll-i, əlhəmāt fäll-iman-näkmāt d-aratān-näkmāt

29 ed, malān-dd išilan dāḡ-mad-itwənn: <Təndəd i-timəjjejruten d-ti s-kāla wār-əkreşnāt ara, wār kāla äsoḡädnāt>,

³⁰ ašäl-en, ad-ənnən äddinät i-iḍayān: <Aḍəwät fälla-näḡ>, ənnən i-tiḍayən: <Älsəmət-anäḡ>

³¹ fäl-a-s, efew kunta ošal dəḡ-ahəšk ibdajän s-əmmək-wa-dəḡ, ma inna wa äqqurän?»

³² Ättilwäyän daḡ dəḡ-a-wen-dəḡ əssin inaytafän əkkanen tamättant əntäneḍ-dəḡ.

³³ Älwäqq wa d-hin-əwwäḍän edägg wa s-itawänna: «Edägg wa n-akärkor», əşläbän Ƴisa, əşläbän daḡ inaytafän edes-has, iyyän daw-aḡil-net, wa iyyäḍän daw-täşalje-net.

³⁴ Älwäqq wa d-əşläbän Ƴisa, innä: «Abba, äñš-asän fäl-a-s, wär-əssenän a hän»; jän ḍarät-a-wen tisäḡeren i-ad-užanän isəlsa-net jer-iman-näsän.

³⁵ A-s itäj j a-wen, təbdad tamətte, täjjəyha i-a-wa ijän iket-net; ḍazžän imännähäḍän n-käl-Älyähud dəḡ-Ƴisa, jannen: «Wädden iḡläs äddinät wi iyyäḍnen, iḡləset ya iman-net ämära kunta ənta a-s Älmasex wa äsnäfrän Mässinäḡ i-iman-net.»

(Mätti 28:16-20; Marqəs 16:14-18; Exya 20:19-23)

³⁶ Əjän-t əssärdusa taḍäzža, zahazän-t-dd bənegär, hakkän-as-t,

³⁷ jannen-as: «Kunta käyy a-s ämänokal n-käl-Älyähud, äḡləs iman-näk ya!»

³⁸ Ettəytäyän älləx jənnəj-s, iktab fälla-s:

«A-WA ÄMÄNOKAL N-KÄL-ÄLYÄHUD».

³⁹ Iggäd-dd iyyän dəḡ-inaytafän wi ätwäşläbnen dihen, ad-isamäḍray Ƴisa, ijann’-

as: «Wädden käyy a-s Älmasex, äxlös iman-näk ya, täxlösäd-anäx!»

⁴⁰ Äkläwlāw änaɣtaf-wa iyyäḍän fäll-amidinet, inn'-as: «Käyy-i dār-s oharän tissant-ta-däx, uksaḍ Mässinäx,

⁴¹ näkkäneḍ, a-wa hanäx-irmäsän, imojjan-nänäx a sār-näx-t-dd-orāwän, nānihājja dār-s, iwar-anäx uḍlem māšan ənta, wār t-illa a läbasän iyšad.»

⁴² Inn' änaɣtaf wa s-iket imməjräd i-Ḷisa: «Əktəw-ahi-dd afäl dd-täqqäläd täminakäläd.»

⁴³ Inn'-as Ḷisa: «Äsidätteɣ-ak a-s ašäl-i-däx, ad-dār-i tahəreḍ älžännät.»

Tamättant n-Ḷisa Älmasex

(Mätti 27:45-56; Marqəs 15:33-41; Exya 19:28-30)

⁴⁴ A-s itäj a-wen-däx, išwar təja tarähut, əlsänät tihay ärori n-äkall iket-däx-net hundäx har təja tezzar.

⁴⁵ Tättunkäl täfukt, iqqärrawät ärido wa ibḍän däx-ehän n-ämudd wa mäqqārän, edägg wa šaddijän d-wa iknän təšədje.

⁴⁶ Äsxärät Ḷisa s-äššahät ḍarät-a-wen, innä: «Abba, ärməs unfas-in.» Innä a-wen-däx ɣas, əjmädän-t iman.

⁴⁷ Inhäy käbtän wa ixkämän fäll-əssärdusa wi əşläbnen Ḷisa a-wa ijän ɣas, omäl Mässinäx, innä: «Wār t-ih' äššäk a-s ähaləs-i-däx, ämaɣdal.»

⁴⁸ Ənhäyän äddinät wi dd-äddewnen s-edägg-wen-däx a-wa ijän, əqqälän, änxasän iman-näsän hullan.

49 A-s itäj a-wen-däx, əbdadän imidiwän n-
 ʔisa däx-ijəj əkyadän əntəneḍ d-tiḍeḍen-ti has-
 dd-əlkämnen wa-däx n-Galila har əntänäteḍ-da-
 däx.

Azəkka n-ʔisa

(*Mätti 27:57-61; Marqəs 15:42-47; Exya 19:38-42*)

50 Osä-dd əhaləs oḡadän, olayän n-taḡrəmt
 ta n-Arimata s-isəm-net Yusəf, iha inušämän n-
 Işrayil-wi ḡattäsnen äššäreḡa,

51 wär-oher d-imizärän-wi iyyäḍnen
 äddäbaratän-wi jän däx-isälan n-ʔisa ed ijar
 ätṭäma n-a-s ilkam ad-dd-təzzubbət Təmmənəya
 n-Mässinäx,

52 ənta-en-däx a ihälän ad-äkk Bilatəs, ittär
 däx-s tafəkka n-ʔisa,

53 oyyas-tät Bilatəs ḡas, ikkäs-dd Yusəf tafəkka
 n-ʔisa fäll-tajəttewt, ij'-et däx-tefit təzzar,
 issəns'-et däx-azəkka iḡaşän däx-esəwäl s-käla
 wär däx-s insa ere äba.

54 Itajj a-wen-däx ašäl wa d-siməjnun äddinät
 i-ämudd wa n-əssəbət-i n-täsonfat.

55 Əlkämñät tiḍeḍen-ti dd-äddewnen d-ʔisa
 wa-däx n-Galila har diha-däx i-Yusəf, ənhäynät
 edägg n-azəkka-en hakd-däx əmmək wa s-tənsa
 tafəkka n-ʔisa däx-azəkka-en.

56 Əqqälnät ihənan ḡas, ad-sadawnät
 əlḡənfärän d-aḍutän. Ijä ašäl wa n-əssəbət-i
 n-täsonfat ḡas, ässunfänät ed, a-wen-däx, a
 innä alämär wa n-ännäbi Mosa.

24

*Tanäkra n-ÿisa jer-inømmuttan**(Mätti 28:1-10; Marqəs 16:1-8; Exya 20:1-10)*

¹ Abənnəbən n-älxad-i n-aşäl wa äzzarän däğ-əssəboğ, əkkänät tiðeden azəkka äwwaynät əlğənfärän d-ađutän-wi dd-äsdäwnät,

² äwwädnät-in azəkka, oğäznät-in tähunt-ta härät emm n-azəkka, täğiraräd-in,

³ əjjäšnät ammas n-azəkka mäšan, wär däğ-s ənheynät tafəkka n-ÿisa.

⁴ Äqqanän iğäfawän-näsnät däğ-a-wen-däğ a-s dd-əbdädän əssin međdən əlsanen isəlsa äsimäymäğnen edes-hasnät,

⁵ jänät tarəmmeyt-ta-däğ fäl dd-hänät-ärkağnät, äsidäsnät timmawen-näsnät äkall. Ənnän-asnät međdən: «Ma s-tammäğmät i-ere iddarän jer-inømmuttan?

⁶ ÿisa, wär t-illa diha, inkär-dd däğ-tamättant. Əktəwmät-dd a-wa innä härwa iha teje ta n-Galila,

⁷ a-s innä: «Ägg-ägg-adəm, ilzam ad-ättärmäs, ijjəş ifassän n-inäsbäkkadän, əşləbän-t mäšan, aşäl wa s-kärađ, a dd-inkär jer-inømmuttan.»

⁸ Əktänät-dd iməjridän-win-däğ ija ÿisa.

⁹ Fälnät azəkka ças, əkkänät inəttulab wi n-märaw d-iyğän d-inalkimän-wi iyyädnen, jänät däğ-sän isälan.

¹⁰ Tiðeden-en, h'-enät Märyäma ta n-tadäbayt ta n-Muläzđaləyät, Täxya d-Märyäma ta n-ma-s n-Yaqub d-tiyyäđ dağ sidəttutnen a-wa ənnänät i-inəttulab

¹¹ māšan, jän-tänät tinəbbuddal wären əssen a jannenät, unjäyän s-ad-tänät-əfləsän.

¹² Iggäd-dd Bətrus, oşäl s-azəkka, iwwäḍ-in ɣas, əssijja dəɣ-əmmas-net māšan, wär dəɣ-s inhey ar tefit tənsat d-iman-net, iqqäl ənta-dəɣ iqqan a-wa ijän eɣäf-net.

*Zäbo wa n-Imayus
(Marqəs 16:12-13)*

¹³ Əkkän inalkimän n-Ÿisa əssin aşäl-wen-dəɣ taɣrəmt ta n-Imayus täniməjjajät d-Yărussälam s-əddəkud n-märəw kelumetärän d-əssin,

¹⁴ əssokalän, simɣuxulän isälan n-a-wa ijän iket-net

¹⁵ a-s tän-dd-iwwäḍ Ÿisa iman-net, əddew dər-sän

¹⁶ māšan, indär i-tiṭṭawen-näsän ad-t-əzzəynät.

¹⁷ Imməjräd-asän, inn'-asän: «Ma s-tärjaşam ham ti-net?» Äqqänän iɣäfawän-näsän, əbdädän,

¹⁸ inn'-as dəɣ-sän wa s-isəm-net Kälyobbas: «Ÿas, käyy ɣas, dəɣ-Yărussälam təmdat a wär hen isälan n-a-wa dəɣ-s ijän išilan-wi-dəɣ?»

¹⁹ Inn'-asän: «Ma dəɣ-s ijän?» Ənnän-as: «Un a-wa ijrəwän Ÿisa wa n-Nəşirät-i əmoosän ənnäbi əşsoohen s-imojjan-net hakd məjräd-net dat-Mässinäɣ d-tamətte iket-net,

²⁰ ärmäsän-t imänokalän n-käl-tikutawen d-imizärän-nänəɣ, əssoḍän-t dəɣ-əşşäreɣa-näsän təzzar, əşləbän-t.

²¹ Näkkäneḍ, nəmoos hərät dəɣ-wi əjərnen äṭṭama n-a-s ənta a madän-iɣləs İşrayil māšan, a-wa aşäl wa s-kərəḍ d-əjän hərätän-win-dəɣ,

22 äqqännät day tiðeden-nännäx tiyyäd ixfawän-nännäx ed, ɔnšäynät azəkka

23 mäšan, wär däx-s in-ogeznät tafəkka-net, äqqälnät-dd, ɔnnänät änfalälän-asnät-dd änjälosän hasnät-ɔnnänen, iddar.

24 Osän iyyäd däx-näx day azəkka, äsbayänän a-wa ɔnnänät tiðeden mäšan, Yisa iman-net, wär t-illa ere t-inhayän.»

25 Inn'-asän Yisa älwäqq-wen: «Käwäned-iš, tidət-däx a-s ijraw-käwän iba n-tayøtte, uhøn, ma äsiyarän ulhawän-näwän, igdal-awän ad-təjrähäm a-wa ɔnnän ännäbitän däx-əlkəttabän n-Mässinäx?

26 Wädden ɔnnän ilzam ad-inhöy Älmasex tähänšariðt təzzar, ijješ älxurmät-net.»

27 Irmäs-asän-dd ðarät-a-wen xur-ännäbi Mosa, ikkä-dd xur-ännäbitän wi iyyäðnen iket-näsän, itafässar-asän a-wa ɔnnän əlkəttabän däx-isälan-net.

28 Ohäzän-in taɣrəmt ta əkkän xas, issəkn'-en a-s okay-tän

29 mäšan, ɔnnän-as: «Xayəm xur-näx ed, ašäl iglä, ehäð-däx, išwar ija», äzzubbät xur-sän.

30 Eqqälän tetäte xas, iðkäl tajəlla, ämmoy i-Mässinäx, irz'-et, ikf'-asän-tät.

31 Ämeränät tiṭṭawen-näsän älwäqq-wen-däx, ɔzzäyän-t mäšan, ättunkäl-asän ässaɣät-wen-däx.

32 Änmännän jer-iman-näsän: «Wädden a-s hanäx-ämmijräd däx-tabarät, isafham-anäx əlkəttabän n-ännäbitän, sanäjmaðän ulhawän-nännäx fäll-ad-t-əzzəyän.»

33 Ǝbdädän ässaḡät-wen-däḡ, eḡḡälän Yärussälam. Ogāzän-in ineṭṭulab wi n-māraw d-iiyän d-inalkimän-wi iyyäḏnen, äžziimmäḡän däḡ-edägg iyyän.

34 Ǝnnän-asän ineṭṭulab d-inalkimän-wi iyyäḏnen: «Ijmaḏ-t äššäk a-s Ƴisa, inkär-dd jer-inemmuttan, inhay-t Simyon.»

35 Ǝlläḡen-asän enteḏ-däḡ amuqqəs wa eḡän dār-s däḡ-tabarät d-əmmək wa s-t-əzzäyän älwäqq wa d-irza tajella.

Änfäläl-dd Ƴisa i-inəmmušal

(Mätti 28:16-20; Marqəs 16:14-18; Exya 20:19-23)

36 Ämmiirädän härwa a-s dd-ibäd Ƴisa iman-net jere-sän, inn'-asän: «Ins' älxer n-Mässinäḡ fälla-wän.»

37 Äxwälän, eḡḡädän eḡniyätän-näsän, eknän tarəmmex̄t ed, äḡelän ämättänkul a hannäyän

38 mäšan, inn'-asän Ƴisa: «Ma käwän-ixwalän, iggad d-ənniyätän-näwän, ikkas tafləst däḡ-ulhawän-näwän?»

39 Ǝkyədät däḡ-ifassän-in d-iḏarän-in, näkk iman-in a-wa, äḏəsät-ahi, tək̄yədäm däḡ-i i-ad-təkkəsäm äššäk, ämättänkul, wär dār-i mad-aläh ed, wär-ila taḡəssa wäla iḡäsan.»

40 Ijann'-asän a-wen, isakn'-en ifassän-net d-iḏarän-net

41 mäšan, tögäl-asän temyäre n-tedäwit-i-däḡ jän ad-t-əfləsän. Inhäy a-s äqqanän iḡäfawän-näsän ḡas, inn'-asän: «Ak təlam a itamäksen diha?»

42 Ǝkfän-t-dd ašär n-emän ähhoyen,

⁴³ irmäs-t-dd, ikš'-e data-sän.

⁴⁴ Inn'-asän ðarät-a-wen: «A-wa-däx a hawän-jannex härwa öllex jere-wän a-s ähhuuššäl ad-itbət a-wa fäll-i iktabän däx-alämär wa n-ännäbi Mosa d-өлкөттäbän wi n-ännäbitän d-Äzzäbur.»

⁴⁵ Ora älwäqq-wen tiyötwen-näsän i-ad-öfhämän ölkөттäbän,

⁴⁶ inn'-asän: «Iktab a-s Älmasex, ilzam ad-inhöy tähänšariðt, inkär-dd asäl wa s-kärað jer-inömmuttan,

⁴⁷ ötwөjjөн ðarät-a-wen isälan n-tätubt d-tenäšše n-ibäkkäðän s-isəm-net i-tiwsaten iket-däx-näsnät, isänt a-wen däx-Yärusšalam.

⁴⁸ Käwäned a jөx tjuhawen n-a-wen iket-net,

⁴⁹ näkk dax, ad-hawän-dd-sөssiwөyäx a-wa s-hawän-ija Abba-nin ärkäwäl-net, a-wen-däx a fäl wär feläm ayrəm-wa-däx, a tökkäs tärna ta dd-fälät isönnawän wär käwän-tölsa.»

Tikawt n-Yisa i-išönnawän

(Marqes 16:19-20)

⁵⁰ Ilwäy-tän ðarät-a-wen har edes i-tadäbayt ta n-Bitanya, idkäl ifassän-net, ija däx-sän älbäraka.

⁵¹ Itajj däx-sän älbäraka härwa a-s där-sän ibða, immөdkäl s-išönnawän.

⁵² Ärkäxän-as öntäned dihen-däx tözzar, öqqälän Yärusšalam öknän däx-tedäwit.

⁵³ Hak asäl ðarät-a-wen, timäqqusän däx-ehän n-ämudd wa mäqqärän ihän Yärusšalam, tiimölөн Mässinäx. Amin!

**Ălənžil n-Ÿisa Ălmasex: Kitab Ălmuqăddăs
Tamasheq: New Testament**

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

b95f369b-a236-5ca8-8cab-11f74279d73c